

# WANTOK

NIUSPEPA BILONG YUMI OL PAPUA NIUGINI STRETI 30 YIA NAU

32 pes

Namba 1,356

Wik i stat long Fonde Jun 22, 2000

70t

Insait

**Hevi long pe  
bilong ol viles kot**  
-pes 2

**Ol palamen  
ripot**  
-pes 3



**Nius bilong ol  
Niugini ailan**  
-pes 4

**Sik AIDS na  
ol Heft ripot**  
-pes 12

## Ol tisa i noken straik yet, PNGTA i tok

... "Gavman i no pasim dua yet"

### YAKAM KELO i raitim

ASOSIESEN bilong ol tisa long PNG, PNGTA i singaut long olgeta tisa insait long kantri long noken straik yet inap ol i pinisim olgeta rot bilong pait long hevi na wari bilong ol, Jenerel Seketeri bilong PNGTA Hosea John i tok.

Mista John i tok long Fraide dispela wik bai PNGTA i bung wantaim Nesanel Menesmen Komiti long toktok long hevi bilong potnait pe na ol alawens we ol tisa i laik straik long en. Na ol bai bihainim yet dispela buk we i soim olgeta wok na level we ol tisa i stap long en. Dispela buk em Teachers Work Value Study we i gat ol toktok bilong wok, alawens, haus, balus tiket, wok longwe ples na arapela wok na hevi bilong ol tisa.

Mista John i tok dispela hevi bilong ol tisa i no long potnait pe tasol we ol i askim long gavman i apim i go antap long 200 pesen (%). Olsem na PNGTA bai wok bihainim dispela buk we i ken tokaut long olgeta hevi bilong tisa.

Em i tok PNGTA i bin mekim ol toktok i kam inap nau na i bin kamapim sampela gutpela toktok pinis wantaim gavman. Ol sampela gutpela samting we i kamap pinis em;

- K500 nau i go antap long K1000 boding diuti alawens bilong ol hetmasta.

- K800 bilong ol tisa insait long boding diuti long wanwan skul.

- Ol elementri tisa i kisim pe i go antap long level 5.

- Bus na longwe skul alawens olgeta tisa i mas kisim K1,000 wan yia. Gavman i no oraitim tasol PNGTA bai go bek toktok gen long dispela long neks wik.

- DMA (Domestik Maket Alawens). Gavman laik givim ol hetmasta na deputi hetmasta long level 7 i go antap K1,500 i go long K3,000. Tasol PNGTA i no laik bikos ol tisa long dispela level em planti i stap long ol taun na siti. PNGTA i laikim ol tisa long bus na rurel skul husat i stap long Level 2 i go long Level 5 long kisim dispela alawens bikos planti tisa tru i stap long ol rurel skul.

Jenerel Seketeri Hosea John i tok ol tisa i olsem save lain na ol i mas bihainim step o rot bilong pait long kain hevi olsem. "Olsem na kain salens bilong straik em las wok bilong mekim sapos olgeta rot i blok na gavman i no harim tru ol wari na hevi bilong ol tisa insait long kantri."

Mista John i askim ol tisa long givim PNGTA sampela moa taim long go het yet long ol toktok na wok ol i mekim pinis wantaim gavman bikos gavman i no pasim olgeta dua yet long ol tisa. Olsem na PNGTA i no inap sapatim singaut bilong ol tisa long gavman i apim pe bilong ol i go antap long 200% yet. Bikos dispela em i bikpela askim we i bikpela tumas na ol toktok wantaim gavman i mas go het pastaim, em i tok.

Mista John i tok 6-pela wik i go pinis ol toktok bilong stretim gut ol alawens na potnait na ol arapela hevi bilong ol tisa i bin kamap. Na

ol i givim i go long Salaris na Kondisen Monitoring Komisen (SCMC) long skelim na stretim wantaim nesanel gavman. Gavman i bin salim i kam bek na toktok i wok long go het yet long stretim ol hevi na wok bilong ol tisa.

Em i tok 7-pela mun tasol i go pinis na dispela buk ol i kolim Teachers Work Value Study i bin kamaut. Tasol em i kam aut long Septemba taim we baset i bin pinis na wok bilong redim baset bilong nupela yia i kamap.

Mista John i tok ol tisa i mas amamas tu long wok bilong ol Tisa Sevis Komisen (TSC) bikos ol i wok long karim ol toktok na hevi bilong ol tisa i go antap tok pait wantaim nesanel gavman. Olsem na ol wok i no stop yet, ol wok i go het yet long hevi bilong ol tisa.

Em i tok i tru ol tisa i save mekim ekstra wok moa long arapela pablik sevans na i save kisim pe aninit long ol arapela pablik sevans. Ol i save wok long apinun na nait o long wiken long redim program o lesen plen bilong ol sumatin long olgeta de na olgeta wik. Ol i save rit na rait na toktok long ol man olgeta de long mekim ol dispela manmeri i kisim save na kamap gutpela manmeri. Ol i save wok about o kisim sip na balus long longwe bus na maunten ples tru, Mista John i tok.


Em i tokaut olsem ol tisa i bin kisim liklik potnait pe i go antap em 10-pela krismas i go pinis na inap nau em nogat yet. Olsem na krai o singaut bilong ol long gavman i

apim pe na ol alawens bilong ol i go antap em ol i gat rait. Tasol ol i mas bihainim rot stret we ol i tisa i gat pinis na i stap. Inap olgeta rot i blok na nogat bekim, orait ol i ken kirapim straik long las tru, Mista John i tokaut.

Jenerel Seketeri bilong PNGTA i mekim dispela toktok long bekim singaut bilong ol skul tisa insait long hailans rijon i tokaut long risain long wok bilong ol na joinim

ol tisa long Momase na Niugini ailan rijon long kamapim straik. Ol tisa i laik straik long gutpela pe na ol arapela alawens bilong ol.

Asosiesen bilong ol tisa long hailans i singaut long gavman i mas apim potnait pe bilong ol i go antap long 200%. Wantaim sapat bilong ol arapela rijon ol i laik kirapim straik long tupela wik bihain sapos gavman i no givim ol wanpela gutpela bekim.



• Isan Elementri skul pikinini long het bilong maunten Kabwum long Morobe provins i soim tumbuna stail long danis na bilas bilong ol long Wanbel De bilong ol long las wik Trinde. Foto: Yakam Kelo.

**Nestlé MILO** IKEN WOKIM GUTPELA SAMTING LONG YU

**PLIS RIPOT**

**Hailans:**

Wanpela biknem bisnis man bilong Isten Hailans i dai long wiken long han bilong ol birua man.

Hailans Rijinel Plis Komanda Tony Wagambie i tok Paul Baiango i bin dai long Goroka las Sarere long samting olsem 6 kilok nait taim sampela man nogut i sutim em taim em wok long go bek long haus bilong em.

Mista Wagambie i tok plis i lukim olsem dispela em ol man i laik kilim dai man na i kamap. Ol bin sutim em i dai wantaim strongpela gan.

Leit Mista Baiango em i wanpela bikman bilong Undeandawayafu wanpisin we i wok long pait wantaim birua bilong ol em long Lindima Kanosa wanpisin.

Mista Wagambie i tok plis bai karimaut ol wok painim bilong ol bipo ol i sutim tok long husat tru i bin wokim dispela ripot.

Ol plis CID i mekim ol wok painimaut long dispela samting nau.

Wanpela plis mobail skwat yunit i beis nau long Kofina eria long Asaro Distrik bilong traim stapim moa trabel we i ken kamap bihain long dai bilong Mista Baiango.

Mista Baiango em bin kamap wanpela bikpela bisnis man taim em i stat long baim ol kofi bin long saat bilong rot.

Taim em i dai em i gat nem pinis olsem wanpela milenia na man i gat planti samting na ol kofi plantesen na faktori long en. Planti man i save long en olsem wanpela gutpela man bilong go aut na bungim ol gutpela pren na amamas wantaim ol.

Brata bilong en Reisis Klink i tok ol pipel i stap long taim bilong sori na olsem ol no inap long wokim wanpela samting egensin ol birua husat i kilim dai brata bilong em. Tasol long wankain taim, em i tok ol Underandawayafa wanpisin i no amamas long pasin we biknem lida bilong ol i dai long em.

**Mosbi:**

Wanpela skul sumatin long Kilakila Sekonderi skul i bin dai long wiken bihain sampela man nogut i kilim em.

Nem bilong sumatin em Herrybertho Awekuk na em i bilong Wes irian.

Plis ripot i tok manki ya husat i wokim Gret 12 i bin dai bihain long ol man nogut i kilim em taim em i wokabaut i go bek long haus bihain long pilai soka.

Bos bilong ol plis long Mosbi siti John Marru i tok ol nogat wanpela saspek yet tasol ripot bilong dokta inap helpim plis long en.

O sumatin na pren bilong em long Kilakila i sori tru long lusim gutpela yangpela manki na pren Herrybertho.

Ol toktok bilong hetmasta Steven Rowley na ol arapela klasmet na pren sumatin i bin toktok long ol gutpela samting we em i wokim taim em i stap laip tasol ol i sori long lusim gutpela yangpela man olsem em. Em bin hetboi bilong klas long 1998 na inap long em i dai, em bin go het long karimaut wok olsem wanpela skul lida.

**Kantri:**

Pot Mosbi na Sentrel provins i gat nupela plis bos. Man ya em long Tom Kulunga.

Mista Kulunga i senisim ples wantaim Raphael Huafolo husat i kamap olsem Asisten Plis Komisina long sait bilong operesens. Em i kisim ples bilong Fred Sheekiot.

Mista Sheekiot em i kamap olsem Asisten Komisina bilong Lojistiks. Moa senis i kamap long midel na ol arapela level bilong plis dipatmen.

**Mosbi:**

Wanpela woksop bilong skruim save bilong ol plis long baset i kamap long Mosbi long dispela wik. Na plis Komisina John Wakon i tokim ol lain husat i sindaun long dispela kos bilong lukim kos ya olsem bikpela samting na ol bai lainim sampela gutpela samting long en.

Woksop i bilong helpim ol plis long plenim na tilim mani long olgeta eria na i mani bai i no inap long wes nating.

Moa long 30 opisa we i gat long em ol bostlain plis bilong ol provins i bin stap long kos ya.

# Sir Mekere kolim ol senis long Komisen Ov Inkwairi bilong Palamen long dispela wik.

**WENCESLAUS MAGUN i raitim**

LONG lukim Komisen Ov Inkwairi i mekim gut wok bilong en, Praim Minista Sir Mekere Morauta i presentim namba tu rit bilong ol senis

long Komisen bilong Inkwairi long Palamen long dispela wik.

Em i tokim Palamen olsem i gat tupela as bilong kamapim ol senis long Komisen Ov Inkwairi.

Namba wan as, Sir Mekere

i tok, em bilong givim pawa long wanpela Komisen bilong Inkwairi long makim ligel kaunsel na teknikel na profesenel save man o meri long helpim wanpela Komisen, sapos Komisen i laikim, long eria bilong ol bikpela wok

insait long lo, teknikel o profesenel.

Sir Mekere i tok namba tu as, em hapim fi bilong ol fain. Em i tokim Palamen olsem planti ol Kot fi o fain em i stap yet long 1951 long ol hevi i kam aninit long Lo.

## Ol Viles Kot Mejistret bai kisim pe long 2001

GAVMAN i tingting long baim ol Viles Kot Mejistret long mun Ogas o Septemba 2001, Minista bilong Jastis, Kilroy Genia i tok.

Mista Genia i bekim ol askim long Gavana bilong Simbu, Pater Louis Ambane long wanem taim gavman bai baim ol Viles Kot Mejistret.

Mista Genia i tok, gavman i save olsem

i gat samting olsem K5 milien o K6 milien pe bilong ol Viles Kot mejistret i stap yet long gavman long baim ol.

Em i tok gavman i kisim bek pawa bilong baim ol Viles Kot Mejistret long han bilong ol provinsel gavman long sampela taim bikos gavman i luksave long dispela hevi na i gat laik long painim mani na baim ol viles kot mejistret pas-

taim long givim dispela pawa i go bek long ol provinsel gavman.

Em i tok nau yet gavman i sot long K20 milien. Em i tokim Palamen olsem em long dispela as na gavman i hapim takis bilong ol spirit o strongpela dring, smok na pokis bilong kisim inap mani long bungim eria bilong baset we gavman i sot long mani.

## Sauten Hailans i gat K16 milien long peim, Embel i tok

MISTA Embel i tokim Palamen tu olsem Sauten Hailans provinsel gavman i gat samting olsem K16 milien abrusim mak bilong baset.

Em tokim Palamen olsem em i no save long as bilong tok baset defisit tasol em i lukim kain ripot olsem i stap.

Em i tok administresen long

dispela taim i no mekim wanpela samting long stretim dispela hevi.

Em i tokaut long dispela bihainim sampela askim i kam

long memba bilong Imbongu, na deputi lida bilong Oposisen, Peter Peipul i mekim.



• Menesing Dairekta bilong PNG Gardener Justin Tkatchenko i soim Spika bilong Palamen Bernard Narokobi long paip wara we inap saplain wara long ol flawa gaden long palamen eria. Foto: Ivan Bayagau.

## PNG Kwinslen Ges Paipplain projek bai go het, Embel i tok

SAPOS i gat hevi bilong wanpela lida, em i no hevi bilong olgeta pipel bilong Sauten Hailans.

Em i tok pipel i givim ol lida

pawa bilong lukautim ol. Sapos ol lida i no bihainim lo, ol i noken hait bihain long ol projek long pretim gavman na ol pipel.

Mista Embel i tokaut long dispela bihainim askim i kam long Mista Peipul nogut disisen bilong saspensim

Gavana Anderson Aigiru bai bagarapim wok bilong kirapim PNG na Kwinslen Ges Paipplain.

# Embel saspensim Sauten Hailans na Westen provinsel gavman

MINISTA bilong P'rovinsel na Lokol Level Gavman, Philemon Embel i saspensim Sauten Hailans na Westen provinsel gavman long dispela wik.

Mista Embel i tokim Palamen long dispela wik olsem i nogat tok i stap long lo we i tok em i mas presentim wanpela ripot bilong ol as we i mekim em i saspensim dispela tupela provinsel gavman long publik.

"Aninit long Seksen 51 bilong Ogenik Lo, i nogat samting long karim ripot i go long Palamen o Pablik Akaunts Komiti," Mista Embel i tok.

Em i tokaut long dispela taim memba bilong Imbongu, na Deputi Oposisen lida, Peter Peipul i askim sampela askim long Mista Embel.

Mista Embel i tok pasin bilong wokim ripot long wan wan provinsel gavman i stap

aninit long Ogenik Lo. Em i tok opisa bilong em i save wokim wok painim long ol tok sut i kamap long ol provinsel gavman.

Mista Embel i tok, sapos ol opisa bilong em i painim as bilong saspensim gavman, orait ol bai raitim ripot na em bai kisim dispela ripot i go givim long Nesenel Eksekutyutiv Kaunsel long glasim na mekim disisen long saspensim provinsel gavman

o nogat.

Em i tok aninit long nupela Ogenik Lo bilong Provinsel na Lokol Level Gavman, NEC i bin givim daireksen long Sauten Hailans na Westen provinsel gavman long stretim ol bagarap i kamap insait long provins bilong ol insait long 21 de.

Mista Embel i tok dispela i no bin kamap na olsem gavman i saspensim dispela tupela provinsel gavman.

Palamen ripot wantaim WENCESLAUS MAGUN

Wok pasim bek talm bilong opim Woks tras akaun

WANPELA wok painimaut i go insait long ol paul pasin i bin kamap insait long Woks Dipatmen long ol yia i go pinis, i holim bek talm bilong opim ol Tras Akaun bilong Woks, Minista bilong Woks na

memba bilong Finsafen, Alfred Pogo i tok. Mista Pogo i tokaut long dispela taim em i bekim ol askim bilong Gavana bilong Is Niu Briten provins, Francis Koimanrea long wanem taim tru bai Minista Pogo i opim ol

Tras Akaun bilong Woks Dipatmen olsem em i bin tokim Palamen samting olsem tri o foa wik i go pinis. Long bekim dispela askim, Mista Pogo i tok, wanpela komisen bilong mekim wok painimaut i go insait long

Woks Dipatmen, i wok long karimaut wanpela wok painim yet long dispela. Mista Pogo i tok, wok painim i no isi na olsem taim ol i karimaut dispela wok painim yet, em i no inap long opim dispela spesel tras akaun yet.

Sepik bai kisim K2.3m long stretim rot

"Mi bai givim K2.3 milien aninit long rot mentenens program i go long Is Sepik na Sandaun provins sapos ol i soim Kes Fan Setifiket (CFC) bilong ol," Minista bilong Woks, Alfred Pogo i tok.


memba bilong Ambunti Drekkir, Judah Akesim long Palamen aste.

Mista Pogo i tok tu olsem bihain tasol long Palamen kibung i pinis, em bai go luk-luk raun long Is Sepik provins na lukim wanem ol rot na bris i bagarap tru na gavman i mas putim mani kwik long stretim ol.

Mista Pogo i tokaut long dispela taim em i bekim sampela askim i kam long

Sir Mekere bai sekim wok bilong NCDC edministreta

PRAIM Minista, Sir Mekere Morauta i tokim Palamen aste olsem em bai karim aut wanpela wok painimaut i go insait long sampela toktok i sut long Nesenel Kapitel Distrik Komisin (NCDC) edministreta, Bernard Tikip.



Sir Mekere Morauta provinsel gavman.

Sir Mekere i tokaut long dispela bihain long memba bilong Mosbi Not Is, na olpela Gavana bilong NCDC, Philip Taku i askim sampela askim long Palamen aste.

Mista Taku i sutim tok i go long Mista Tikip olsem em i gat asua long tok orait long makim K21 milien i go long ol skul bilong NCDC.

Sir Mekere i tok long sait bilong Mista Tikip, em i bin holim wok olsem wanpela edministreta bipo, na tu em i gat pepa bilong enjinia.

Long bekim ol arapela askim Sir Mekere i tok lo bilong NCDC em i no wankain long Ogenik Lo bilong ol arapela provinsel gavman na olsem pasin bilong saspending NCDC em i no wankain long pasin bilong saspending ol arapela

Sir Mekere i tok Mista Tikip i no stap insait long wanpela politikel pati na olsem wanem wok em i holim nau, em bai holim yet inap wok painimaut long toktok bilong


Gavman wok yet long plen bilong Galf na Sauten Hailans haiwe

MINISTA bilong Woks, Alfred Pogo i tokim Palamen aste olsem gavman bilong Sir Mekere na Zeming i wok yet long plen bilong Galf na Sauten Hailans haiwe. Em i mekim dispela toktok taim em i bekim sampela askim bilong memba bilong Kagua Erave, David Basua.

haiwe. Mista Pogo i tok long dispela as, gavman bilong Sir Mekere bai mekim gut plen bilong dispela haiwe na tu painim mani bilong wokim dispela rot. Long wankain taim, em i tokaut tu olsem Galf na Sauten Hailans haiwe em wanpela bilong ol nesenel haiwe.

Em i tok gavman bilong Skate i bin kamapim dispela plen tasol ol i no bin mekim gut dispela plen long wanem ol i no painim mani bilong wokim dispela

Minista bilong Trensport, na memba bilong Lae, Bart Philemon i tokaut olsem gavman i gat 10 yia plen long mekim dispela wok.




Stail mangi • Ol elementri skul mangi i mekim ples i lait wantaim ol stail mas na singsing bilong ol long dispela wanbel de. Dispela em long Isan ples, Kabwum distrik bilong Morobe Provins. Foto: Yakam Kelo.

Waieng bai glasim hevi bilong telepon long Goilala

MINISTA bilong Infomesen na Telekomunikesen, Peter Waieng i tokim Palamen aste olsem em bai sekim hevi bilong telepon long Anga veli, insait long ilektoret bilong memba bilong Goilala, Ajax Bia.

Em i tok long sampela eria Telekom i sasim bikpela mani tru long ol lain i save yusim telepon sevis. Long sampela eria ol i katim telepon sevis bilong ol sapos ol i no baim bil.



Peter Waieng

Mista Waieng i tok tu olsem dispela em i wanpela bikpela hevi ol pipel bilong arapela hap bilong kantri i bungim long wanem Telekom i wok long mekim planti ol senis insait long ristraksa program bilong ol.

Olsem na Mista Waieng i askim ol lain i gat telepon long baim bil bilong ol sapos ol i no laikim Telekom i katim telepon sevis bilong ol.

Mista Waieng i tokaut long dispela bihain long Mista Bia i askim sampela askim long Palamen long wanem as tru

Telekom i katim telepon sistem long wanpela eria insait long ilektoret bilong em.

Mista Bia i tok Telekom i bin katim dispela telepon sevis long 25 Disemba 1999 na bihain ol i konektim gen long 2 Mas 2000. Tasol long 11 Mas long dispela yia, Telekom i katim gen dispela telepon sevis na i kam inap aste, ol pipel bilong Goilala insait long Anga veli we Tolukuma Gol main i stap i no inap long kisim o salim tok long telepon.



Bai I Kamap Bihain Long 16-pela Dei

2000 NESENEL SENSES bai i winim olgeta senses bilong bipo, wanpela long sevis senses wokman, Mista Soanin Kilangit, i tok

Insait long ol senses, i gat ol kwesten ol senses wokmanmeri i save askim long kisim toktok bilong ol pipel na Mista Kilangit i tok olsem ol kwesten bilong 2000 Nesenel Senses i gutpela moa

"Ol dispela kwesten bilong 2000 Nesenel Senses bai i skelim gut ol hevi bilong developmen long ai bilong ol pipel," Mista Kilangit i tok.

"Dispela em i bikpela samting bikos em i pes taim tru bilong senses long askim gut ol kwesten long kisim toktok bilong ol pipel long hevi bilong developmen.

"Mi bin wok long senses bilong yia 1971, 1980 na 1990 na ol kwesten bilong ol dispela senses i no askim gut toktok long wanem kain hevi ol pipel i gat long developmen."

Mista Kilangit i bin skul long Yunivesiti bilong Papua Niugini long Pot Mosbi taim em i bin wok long senses bilong 1971.

Senses bilong 1971 i bin laspela senses Gavman bilong Australia i bin mekim long Papua Niugini bipo long Indipendens long yia 1975.

Nau Mista Kilangit i wok olsem leksera o titsa long IPA o Institiut bilong Pablik Edministraisen long Pot Mosbi. Bipo ol i save kolim IPA olsem Edministretif Kolij.

Long dispela wik Mista Kilangit i go long ples bilong em long Manus long skulim ol lain bilong em long wok bilong senses

Ol arapela senses savemanmeri olsem Mista Kilangit i go long ol arapela provins long skulim gut ol senses wokmanmeri long wei tru bilong mekim senses.

Senses bai i stat long namba 9 dei bilong mun Julai na i go inap long namba 15 dei bilong Julai.

Mista Kilangit i tok olsem ol kwesten bilong 2000 Nesenel Senses i gutpela olgeta bikos ol Papua Niugini senses savemanmeri yet long NSO o Nesenel Stetistikal Opis i bin stretim ol samting.


Em i tok olsem bipo ol lain bilong Australia i save raitim ol kwesten bilong senses na ol i no save gut long hevi bilong ol pipel.

Mista Kilangit i bin mekim dispela toktok long Fraide las wik taim ol senses savemanmeri i bin miting long Pot Mosbi long stretim gut wei bilong mekim senses.

Long wiken nau ol i bin i go long ol provins long skulim ol senses wokmanmeri.

Gavman bilong Papua Niugini na Gavman bilong Australia i sapatim 2000 Nesenel Senses.





# NIUGINI AILAN NIUS



## Nakmai winim Wes Nu Briten ileksen

**VERONICA HATUTASI**  
i raitim

OL PIPEL bilong Wes Nu Briten i gat nupela rijinel memba nau.

Man ya em Clement Nakmai husat i bin winim bai ileksen we provins i bin holim bihain long dai bilong leit memba Bernard Vogae long stat bilong dispela yia.

Vot we i bin kisim tupela wik long karimaut i bin pinis long wiken taim ol i kaunim ol na ol bin tokaut long wina long Sande.

Mista Nakmai bilong Piliol Ailan long Kandrien Ilketoret insait long Wes Nu Briten yet i bin kisim 8,151 na em i winim man i kam namba tu long en,

Isikar Matage long 290 vot. Mista Matage i bin pulim 7861 vot. Foma Jenerel manesa bilong Air Niugini Joe Tauvasa i bin kamap namba tri wantaim 6731 vot.

Mista Nakmai i bin winim sia long 19-pela kendidet husat i bin sanap resis long Wes Nu Briten rijinel sia.

Mista Nakmai i bin wok olsem grup Jenerel Manesa bilong Koporet Sevis wantaim Pasifik Fainens Kampani grup taim em i risain na go sindaun long ples bipo em i sanap long dispela bai ileksen.


Long kempein bilong em, em bin tok strong long pipel i mas kisim moa pawa na ol i ken wok hat long kisim gutpela sindaun. Na ol noken lukluk tasol long gavman i givim ol henaut mani long ol.

Em bin tok bikpela tingting bilong en em long helpim pipel bikos em i lukim olsem maski Wes Nu Briten provins i gat planti risos olsem timba, kakau, kokonas samting, em (provins) i no lukim tumas gutpela wok developmen i kamap long en.

Em bin tok provins i laikim strongpela man long go pas long en na yusim gut ol risos long developim provins.

Em bin tok sapos em i win, em bai wok wantaim ol komyuniti, ol sios, ol NGO, ol dona ejensi na ol praivet bisnis lain na gavman long skruim ol wok developmen long komyuniti, provins na sesenel level.

Mista Nakmai i bin sanap long bai ileksen olsem wanpela independen kendidet.



**Kopex stail...** •Dispela poto i soim wanpela lain famtil bilong Tapo viles husat i save stap klostu long Tokua ples balus long Kokopo i kam bek long gaden bilong ol long kar. Ol i karim ol gaden kaikai na ol sospen tu long kar. Ol i bin stop long baim kerosin, lol-wara na ol kaikai long Romphil Treeding long Tokua ples-balus taim Wantok Niuspepa i bungim ol. Poto: James Kila.

## Olpela Primia winim Gasel Open sia

SINAI Brown husat i bin olpela primia bilong Is Nu Briten na nau i holim wok olsem Deputi Gavana bilong provins i winim sia bilong Gasel Open insait long bai ileksen long provins.

Gasel Open sia i bin stap nating taim foma memeba nakikus Konga i bin risain long dispela yia.

Bai ileksen i bin ron long tupela wik na ilektorel opis i bin kaunim olgeta vot long las Sarere na tokaut long wina long Sande.

Mista Brown i bin kisim 4,412 vot na winim Henry Ningo man i kamap namba tu long en wantaim 616 vot. Mista Ningo i bin kisim 3,796 vot taim man i kamap namba tri, Stanis Ligur i

kisim 3,696 vot.

Mista Brown i bin stap olsem primia bilong Is Nu Briten long 10-pela kris-mas.

Ol ripot i tok ol samting long dispela ileksen i bin go gut tasol wanpela samting we ol ilektorel opisa na ol provinsel atoriti i wari long en em planti pipel i bin putim ol infomel vot long dispela bai ileksen. Narapela samting tu em planti i no bin vot bikos nem bilong ol i no stap long komon rol. Ripot i tok long 85,000 pipel insait long Gasel ilektoret, samting oisem 20,000 tasol i bin vot na dispela em i liklik mak.

## 3-pela kisim bagarap long han bilong plis

TRIPLELA memba bilong pablik i bin kisim marasin long haus sik bihainim bagarap we ol bin kisim long han bilong ol mobail plis skwat long Kimbe taun las wik. Sampela moa i bin kisim ol liklik bagarap taim ol arapela moa i bin stap wantaim pret.

Dispela samting i bin kamap bihain long ol memba bilong plis mobail skwat i sut nabaut long ples nating long hap we planti pipel i bung long en.

Ol ripot i tok ol mobail skwat memba i bin wokim olsem taim sampela lain i bin go insait long plis stesen na sut wantaim ol ston samting i go long plis stesen na kamapim bagarap tu long Provinsel Plis Komanda.

Ol ripot i tok as tru bilong ol dispela hevi em sikspela plis mobail skwat lain i bin holim pasim wanpela yangpela meri bikos ol i bilip olsem em bin wokim wanpela asua. Mobail skwat lain ya i bin stap long provins long givim sekyuriti long

bai ileksen.

Ripot i tok dispela sikspela mobail skwat lain i no bin sasim na putim yangpela meri long plis sel tasol ol bin kisim em i go long kwata bilong ol na bagarapim em.

Taim ol haus lain bilong meri i go long plis stesen long Sarere moning, meri ya i no bin stap. Tasol bihain taim em i go kamap long ol haus lain bilong en, em bin ripotim ol samting we ol dispela mobail skwat lain i wokim long en na long Mande apinun las wik, ol hauslain bilong em i bin go bung ausait long Kimbe plis hetkota long kisim sampela kliapela toktok long dispela na hevi i bin kamap we ol i sut i go long stesen wantaim ol ston, botel na hap diwai samting.

Ol ripot i tok taim ol pipel i lusim stesen ya, sampela mobail skwat memba i bin bihainim ol i go olsem long Kimbe soping senta i go long Remo Draiv na paiam gan nating we i kamapim

bagarap long sampela memba bilong pablik.

Bihainim ol trabel ya. Ekting Gavana Francis Auram na ol bikman bilong Talasea viles i bin bung na toktok long traim painim rot long stretim hevi ya.

Em bin tok ol mas bihainim lo long traim stretim hevi ya. Na edministresen wantaim plis long Kimba wantaim tu Niugini Ailans Divisenel koman i ken lukluk long samting ya na stretim.

Bung i bin kamap wantaim foापela samting we ol i laikim ol atoriti long lukluk kwik long ol.

Em long saspending ol dispela mobail skwat memba husat i bin bagarapim yangpela meri ya taim ol wok painimaut long dispela samting i kamap, karim wok painimaut long pasin we ol mobail skwat lain i bin paairim gan long pablik eria, salim kwik-taim ol mobail skwat lain i go bek long beis bilong ol long Lae na long Provinsel edministresen opis, PPC na NGI Divisenel Koman long Rabaul i lukluk long dispela hevi na stretim.



## Bana Oksileri plis greduet kisim salens' long skruim pis wok

SINGAUT i go long ol nupela komyuniti plis greduet long karimaut gut wok bilong ol long lukautim lo na oda insait long Bogenvil.

Singaut i bin go tu long komyuniti long sapotim ol nupela greduet husat i bin pinisim sikspela wik kos na kisim setifiket bilong ol long Bogenvil las wik.

Singaut ya i bin kam long Plis Komisina John Wakon na ol arapela bikman husat i bin witnessim greduesen bilong 40 nupela oksileri plis memba bilong Bana Distrik insait long sautwes Bogenvil.

Dispela em namba wan greduesen bilong komyuniti polising projek we Australia na Nu Silan wantaim i fandim.

Greduesen i bin kamap long Bana Distrik yet.

Tenpela yangpela meri tu i bin stap insait long nupela greduet grup. Ol bin putim ol naispela yunifom na mas long fran bilong ol bikman olsem Karolus Ketsimur em wanpela not Bogenvil memba wantaim Interim Bogenvil Provinsel Gavman husat i bin makim Gavana Momis, Plis

Komisina John Wakon, Provinsel plis Komanda bilong Bogenvil Joseph Bemu, ol bikman i makim Australia na Nu Silan Hai Komisina. Bana Wimens Kaunsil, Sios, ol foma paitman na Bogenvil Pipels Kongres.


Komisina Wakon i bin tok strong olsem plis em i olsem wokman bilong ol pipel na Bsns Komyuniti Oksileri plis i redi long statim wok long sevim ol pipel.

Projek Dairekta bilong Nu Silan Inspekta Tony Annandale i bin tok ol nupela greduet bai go bek long ol wan wan komyuniti na helpim long skruim wok bilong kamapim gutpela sindaun bek long Bogenvil.

John Murray husat i bin makim Hai Komisina bilong Australia i bin tok namba wan grup bilong ol greduet i gat bikpela wok long mekim.

Em bin tok sapot beis we Bana komyuniti i gat long ol i soim kain samting we bai kamap long Tonu na Buin we ol bai skruim projek i go long ol.

Em bin tok dispela em bikpela de long skruim wok bilong gutpela sindaun insait long Bogenvil.



# SEPIK NIUS



## Ol meri Nuku laikim nupela rot

OL MERI long Nuku Dineri i laikim gutpela sevis i go long ol komyuniti, distrik na eria bilong ol.

Lucy Keino em Progrem Kodineta bilong Aitape Daiosis i tok bihain long em i givim kos long ol meri insait long Nuku Dineri i no long taim i go pinis.

Misis Keino i bin im tupela wik lidasip kos long ol meri bilong ol daiosis insait long Nuku Dineri.

Em i tok bihain long kos i pinis, planti moa meri long

Seim na kaffe peris i bin laikim moa infomesen na Misis Keino wantaim grup bilong en i wokabaut long longpela rot long lukim ol meri na inapim askim bilong ol.

Em bin holim namab tu kos gen ol i kolim long "Laip bilong ol meri" na ol bin givim skul long ol samting olsem "Mi husat, wanem wok bilong mi insait long famili, hau bai mi lukautim famili na ol samting olsem.

Misis Keino i tok i moabe-

ta long ol meri husat i stap long longwe hap long luk-save olsem ol arapela meri tu long PNG i tingting tu long ol kain samting olsem na i no ol tasol i wari long ol samting olsem.

Em i tok situesen bilong ol meri long Nuku na Lumi i no gutpela. Laip i hat bikos pe bilong ol samting long stoa olsem rais, pis na flau i antap tumas. Rot i no gutpela na i hat long ol long go long Wewak. Pe bilong balus tu i antap tumas.

Em i tok bikos gavman i sot long mani, planti helt sevis long ol rurel eria i pas taim sampela i daunim mak bilong wok na ol wokman.

Mekim na planti man i dai.

Em i tok em i sori long lukim dispela. Em i tok taim ol pipel insait long taun i wari long ol hul long rot, planti pikinini, meri na man i wok long dai insait long ol rurel eria.

Em i tok tru ol meri i luk-save long ol hevi, ol i laikim rot bilong givim na kisim sevis i mas kamap gutpela.

## Vanimo Green memba painim ovasis helpim

MEMBA bilong Vanimo Green na Minista bilong Koreksenen Sevis Micah Wes bai painim ol rot maski sapos em inap go long ovasis. Long painim na kisim sampela helpim na go hetim wok ol i mekim pinis long planim na grom moa kakao insait long ilektoret bilong en. Bikpela tru long Kilimeri senses divisen insait long Bewani sab distrik.

Mista Wes i bin tokaut long dispela. taim em i soim amamas bilong em i go long ol pipel bilong em long ol i bin bung long Ossol komyuniti skul long las mun na bungim em. Taim em i mekim namba wan wokabaut bilong em bihain long ol i makim em olsem Minista bilong CIS i go long ilektoret.

Mista Wes i tok, ripot bilong 1988 na 89 i tokaut olsem ol pipel bilong Kilimeri senses divisen i bin planim pinis 23,000 kakao diwai insait long 4-pela viles. Na i tok, ripot i soim olsem klostu dispela namba i karamapim "36 na 37 hekta graun insait long Wod 14, na dispela em i gutpela nius tru."

Ol pipel laikim gutpela taim bai kam bihain long wok bilong kakao. Ovasis na planti nau i wok long kirap wantaim strongpela aik long planim na grom kakao. Tu planti kirap na katim bus na stat long planim kakao memba bilong Vanimo Green i tokaut.

Em i go het na i tok mani mipela olgeta save olsem bikpela nev bilong Papua Niugini. Tasol aninit long Ekonomik polisi bilong Sandaun Provinsal Gavman Gavman i mas painim mani na helpim ol pipel husat i soim mak long wok na helpim ol yet. Bikos, sapos dispela i no kamap bai dispela nau i kilim dai strongpela laik bilong pipel husat i laik wok na bringim gutpela sindaun i go insait long ples.

Micah Wes i tok, em bayusim wanpela ripot em i holim i toktok long wok bilong kakao insait long Kilimeri senses divisen. Long toktok wantaim ol ovasis bisnisman long kisim sampela helpim mani long go hetim kakao projek bilong pipel bilong em.



## Wok bilong painim ol wantok na famili...

• 5-pela bilong sampela man Malol i painim dai bodi long long nambis taim si bruk na kilim manmeri long Aitape long mun Julai, 1998. Ol is sanap arere long wanpela janu solwara i bin brukim. Planti manmeri tru i bin dai long dispela birua we i bagarapim ol pipel nogut tru. Olgeta manmeri husat i stap laip yet i save tingim dispela taim nogut yet.

Foto: Peter Maimo.

## Yakoi viles kisim 100 pik long Salvessen Ami long Lae

KLOSTU wanpela yia nau ol komyuniti i painim hat tru long kisim helpim i kam long Lokol Level Gavman long Aitape. I luk olsem LLG i nogat mani long kirapim ol komyuniti projek. Ol komyuniti nau i lukluk long ol NGO long kisim helpim.

Bihain long sunami Salvessen Ami i bin givim 100 pik i go long ol Wes Kos long Yakoi. Yakoi i kisim 4-pela pik na i tilim wanwan namel long 9-pela klen i karamapim moa long 700 manmeri.

Salvessen Ami i bin skelim pik i go long olgeta komyuniti long sunami eria. Sampela pik i go long Malol, Arop, Barupu, Sissano na Yakoi.

Benny Amaul i wanpela komyuniti lida long Yakoi. Em i bin wok olsem wanpela soldia bipo na nau i stap long ples. Benny nau i wok long mekim planti gutpela komyuniti wok long bringim senis na gutpela sindaun long Yakoi.

"Mi askim 10-pela pik long Kepten Kala Sere, bosman bilong Salvessen Ami long Mosbi. Em i tok

bai em givim dispela na ol Salvessen Ami yet i baim na salim i kam."

Namba wan sipmen em 40 ol kisim bilong ol lain bilong wes kos olgeta. Namb tu sipmen i bin kam em 20 go long wes kos yet, na narapela em 20 gen na las sipmen 20 nau mi kisim bilong ol pipel bilong Yakoi."

Dispela 4-pela pik, wanpela man, 3-pela meri i bin kam long Lae na Salvessen i bin baim olgeta trenspot kos bilong ol. Dispela em ol spesel brid pik we ol i ting bai i no inap kamap gut tumas long kain ples olsem Yakoi. Tasol Benny i tok ol i karim gut na ol i luk orait.

"Mipela kisim long lukautim long mekim mani bilong em bihain. Em karim nau mi tilim wan wan long olgeta famili bihain ol lukautim gut bilong ol long salim na kisim mani na lukautim ol yet long bihain taim."

Benny i tok dispela kain helpim i bikpela long kamapim mani long sapatim ol lokol komyuniti. Mani i kam long dispela rot ol pipel i ken

yusim long baim ol samting long stua na ol narapela sevis we i ken helpim ol.

"Mipela hia mipela painim hat tru long painim ol liklik mani bilong mipela. Mipela i stap tasol long buai, daka na donat. Pik em i wanpela bikpela samting we i helpim mipela moa long ples."

Planti man i save laikim long kam baim pik long mipela long hia long ol bikpela de olsem Krismas, o pati. Olsem na pipel save mekim gutpela mani long pik Benny i tok siks wik pikinini pik ol i save salim long K80. Em i kisim dispela prais long Aitape Vokesenel Skul. Prais i luk bikpela tasol Benny i strong olsem em i inap long dispela kain brid pik.

Bihainim dispela kain ol helpim, NGO Global Kea, i no long taim i go pinis i bin kirapim. Wanpela komyuniti senta long Yakoi. Dispela senta bai i stap olsem ples bung, we i i ken strongim bung wantaim pasin long serim ol tingting long kirapim ples.

"Ol i askim husat i laikim dispela

na ol Malol i laikim, ol Sissano i laikim na mi bin toktok strong long miting nau olgeta i pasim toktok long makim dispela i go long Yakoi bikos ol Yakoi tu i kisim bagarap."

Bihain long tok orait Global Kea i bin kam long Aitape na i bin kirapim dispela senta insait long tupela de. Ol wokman bilong dispela wok em ol lokol wokman yet wantaim ol narapela i kam long Australia. Dispela bilding em i las bilding ol i wokim insait long Yakoi.

"Planti wok bilong dispela komyuniti senta mi amamas long em namba wan samting em bilong helpim ol meri taim i gat klinik. Taim ol sista i kam long ples mi save sori long ol long wanem ol i save go skel na givim marasin long ol pikinini long nambis nating. Taim bilong ren ol i painim hat."

Benny i tok dispela nupela senta em i gutpela ples bilong ol mama i ken bung long ol wok bilong ol pikinini na tu em i strongpela haus na bai isi long klinik.

Long dispela projek Global Kea i givim tu tupela 5000 lita tenk wara

tasol ol i no bin sanapim. Dispela em ol komyuniti yet bai i wokim bihain long ol i pinisim tenk sten.

"Na tu em i gutpela long helpim mipela long holim ol miting wantaim ol pipel long dispela bikpela senta yet, sindaun gut, stori gut insted long mipela holim nating miting long as bilong diwai long nambis na i no gutpela tumas."

"Narapela em olsem long ol lotu o wanem kain ol lotu semina nambaut bilong ol i laik kam long Yakoi em i open long ol sios. Ol i welkam long yusim dispela senta."

"Olsem na dispela senta em i gat planti wok bilong en na mi bin hamamas tru ol i putim, na tu mi bin hamamas tru olsem fes taim mipela Yakoi i bin kisim wanpela kain helpim i bin kam ausait olgeta."

I nogat wanpela gavman projek insait long komyuniti. Long askim bilong Edukesen Dipatmen, ol pipel yet i bin kirapim pinis tupela elementri klasrum.

Tasol i gat hevi long ol skul samting olsem blekbod, sok, buk, pensil, rula, desk na ol samting olsem.


**BEEF CRACKERS**

**IGAT kick!**

**HEPI BIRTHDAY**

**25% MORE**

**5 BISKETS INSIDE-1 FREE**



# SAUTEN



# RIJON



## NCDC gat dinau olsem K135 milien i stap

### PEKU PILIMBO i raitim

Nesenal Kapital Distrik Komisen (NCDC) i gat bikpela dinau mani we em i no bekim yet na mani i wok long go antap na nau i stap long K135 milien.

Dispela toktok i bin stap long wanpela petisen ol wok manmeri, kontreptos na ol komyuniti i stap insait long Nesenal Kapital Distrik i givim go long Nesenal palamen long las wik.

Petisen i askim ol 4-pela memba bilong ol ilektoret i stap insait long Pot Mosbi long kam bung wantaim ol long tude na toktok long stretim dispela hevi bilong mani bikos mani bilong takis NCDC i kisim long ol manmeri ino mekim wok gut.

Ol i tok i dispela bung i mas kamap bai olgetra i keñ sindaun wantaim na stretim toktok bilong ol menesmen na operesen bilong NCDC na nau olgeta manmeri husat i save peim takis i go long NCDC i no kisim sevis ol inap long kisim.

"Mipela pre olsem nesenal palamen bai jhartim dispela krai bilong mipela na hariap long mekim save olsem VAT na narapela takis mipela save peim i ken kamapim sevis

bilong olgeta lain i stap insait long NCDC," dispela pepa itok

Ol dispela tok namel long ol palamen memba bai i ken putim wanpela grup we i ken lukim olsem menesmen bilong NCDC i iken kamap gutpela na paul pasin i noken stap moa.

Sapela askim we i stap insait logn dispela petisen i tok gavamn bilong Mekere Zeming i mas lukluk i go insait long wok bilong NCDC long dispela erias:

- NCDC i wok long stretim rot, baret na narapela samting long ples bilong ol bikman na lus tingting long liklik manmeri husat i peim takis na stap long ples olsem Morata, Gordons, Gerehu, Waigani, Tokara, Sabama na Kaugere.
- NCDC yut polisi ino wok gut.
- Yut emplomen skim kat i lukim planti stil na bil:het pasin i kamap.
- Givim K100 milien kontrak long stretim rot tasol ol setelmen na narapela eria i bagrap tru.
- Givim kontrak wok long bikpela kampani na liklik manmeri nogat wok.
- K3m Erima bris wok i no kamap hariap.
- Kainkain wok kontrak wantaim NCDC i nogat tenda na dispela i no tingim ol liklik manmeri.
- NCDC maket insait



• **Tupela bikman ya i laitim paia yusim rop olsem ol tumbuna i save mekim long bipo. Dispela em wanpela pilai ol Engliken manmeri i mekim long taim Praim Minista Sir Mekere Morauta i givim K20,000 long St Mary's haus lotu long Gerehu long Sande Jun 11, 2000. Foto: Ivan Bayagau.**

long siti bagrap tasol NCDC wokman save bagarapim ol manmeri na paitim ol nabaut.

• NCDC i no peim kontrak manmeri bilong 1999 i kam inap long Jun 2000.

Dispela bikpela mani NCDC i no peim yet i sanap olsem: Liklik kontrak wok inap K10m, dinau mani K4m, wokmanmeri ino kisim pei na Stet sea bilong POSF ol i save katim K4, takis bilong

IRC K6, K1m pei bilong wokmanmeri bilong NCDC, 22 pesen pei i go antap bilong ol wokmanmeri, pei bilong airim sekuriti K10m na NCDC rot lontrak mani inap long K100m.

Petisen i askim palamen na ol memba bilong Mosbi long indaun toktok wantaim na stretim ol dispela hevi bipo long olgeta samting i bagarap olgeta.

### Gavman saspenim Westen provinsal gavman

MINISTA bilong Provinsal na lokol level gavman Philemon Embel i rausim pinis provinsal gavman bilong Westen provins long Tunde dispela wik. Dispela em disisen bilong Nesenal Eksekutyutiv Kaunsil (NEC) long rausim o saspenim Westen provinsal gavman bikos long ol hevi na wok paul long sait bilong mani na wok bilong gavman.

Mista Embel i tokaut olsem em i givim 21 de inap long Gavana bilong Westen provins Nobert Makmop i mekim ol bekim na tokaut long ol wok na eria we gavman bilong em i ronim provinsal gavman. Na tu soim ol rekot na wok we mani i save go long ol. Tasol dispela taim (21 de) i abrus pinis na nogat wanpela bekim i kam long Gavana Mista Makmop. Olsem na long Tunde dispela wik NEC i mekim dispela long saspenim Westen provinsal gavman we Minista Philemon Embel i tokaut long en.

Long dispela yia tu provinsal gavman bilong Westen provins i gat planti toktok long ol hevi bilong mani olsem mani bilong baim loya, mani i go long ol wok bilong medikel saplai na arapela moa.

Na Gavana Makmop tu i kisim sas long sampela mani i paul aninit long nem bilong em. Tasol em i baim beil na kam ausait na go long kot.

Insait long Sauten rijon, Westen provins i joinim nau Oro provins husat i bin namba wan provins long kisim saspenen long 1999. Tasol Gavana Siembo i go long kot na Kot i putim bek provinsal gavman bilong Oro. Tasol Nesenal Kapitel Distrik Komisen (NCDC) i bin kisim saspenen na i stap yet tude.

Tripela provinsal gavman insait long Sauten rijon i bin bungim saspenen insait long nupela sistem bilong provinsal na lokol level gavman rifom.

## Kokoda Treil na Sogeri eria i gat komyuniti plis

### KENNEDY EDENE i raitim

OL yut insait long Sogeri eria i amamas long joinim risev plis long karimaut wok bilong lo na oda insait long Sogeri na Kokoda Treil. Ol i mekim dispela interes bilong ol klia long lukautim wok bilong turis long Kokoda Treil na tu long komyuniti.

Namba olsem 20 yangpela man long dispela hap i givim nem pinis long Plis Komyuniti Rilesen Yunit na ol lain bilong turis opis long traime lukautim wok bilong lo na oda insait long dispela eria.

Dispela ol lain yut i kam long hap bilong Depo Monument eria klostu long Sogeri na ol arapela i kam long

Mageri na i go antap long Vesulogo ples na ol ples klostu long Owens Kona long Kokoda Treil.

Kaunsila bilong Vesulogo na Owens Kona Belden Babea Mado i husat i bin poromanim ol yut i go long Sogeri Plis Stesin long las wik Fraide i tok em i amamas long lukim ol yangpela i givim ol yet long dispela wok bilong lukautim komyuniti.

Mista Mado i tok bihain long ol toktok i bin kamap namel long ol lida na Hai Komisina bilong Australia Nick Warner na ol turis opisa long Owens Kona, ol yut i amamas na i laik joinim plis risev wok.

Insait long plis wok ol bai mekim, ol i laik lukautim na was tu long ol turis wok insait long

Kokoda Treil.

Mista Mado i tok hevi bilong lo na oda em bikpela samting na i gutpela long ol yut yet i soim interes long go pas long lukautim dispela wok.

Mista Mado i tok i nogat man bai helpim ol long dispela hevi bilong lo na oda long eria bilong ol olsem na i gutpela long ol yangpela yet i soim dispela interes bikos hap bilong ol i save bungim planti hevi long ol raskol pasin long bipo i kam.

Em tok ol ripot nogut we i save kamap bipo long hevi we i save bungim ol turis long Kokoda Treil i mas pinis na em i laikim gutpela nius ripot i mas kamap long stretim gutpela nem bilong ol na komyuniti.



- Power Rice 1 Kg K 1.57
- Tablebirds Kwikkai 900 gr K 5.59
- Tablebirds Twin Pack K12.62
- Mortein Mosquito Coils K .95
- Omo 200 gr K 1.33
- Saveloys per kg K 3.95
- Beef Brisket Imported per kg K 7.77



- Blue Bird Sardines 425 gr K 1.95
- Ramu Sugar 1 kg K 2.27
- Maggi Noodles 85 gr K .55
- Hi-way Hardman Biscuits 125 gr K .40
- Globe Corned Beef 300 gr K 2.65
- Anchor Milk 1 Litre K 1.39
- Heinz Baked Beans 220 gr K .85

Planti moa kaikai prais i go daun long en!

Ph: 325 7566, 325 0863 Fax: 325 7096



# HAILANS NIUS

## Wai laik joinim Karimui wantaim Solt Nomane long 20 kilomita rot

### YAKAM KELO i raitim

MEMBA Bilong Karimui Solt Nomane, Simeon Wai i tokaut olsem ol pablik sevans wokman long distrik bilong em i save bungim planti bikpela hat taim tru bikos distrik i stap longwe tumas long edministresen senta long taun.

Mista Wai i tok edministresen sistem tasol i as bilong planti pablik sevans woka i no save stap

tumas long ol longwe na bus ples long wok. Bikos ol i mas go longwe hap tru long taun long kisim potnait pe, sapos i nogat rot ol i mas yusim sampela hatpela wei bilong go long het opis long taun na planti taim ol i mas stap liklik long bikpela opis long taun long stretim ol pepa na wok bilong distrik pastaim.

Mista Wai i mekim dispela toktok long bekim komplek bilong kaunsil presiden bilong Karimui lokol level gavman Kaliabe Giru we em i kom-

plen long ol pablik sevis long Karimui distrik i no mekim gut wok bilong ol.

Ol i save go long Kundiawa na Goroka na stap longpela taim tumas na i no kam bek hariap long wok bilong ol we planti sevis na wok i go bagarap nau.

Mista Wai i tok em i kliia long dispela hevi we kaunsil presiden i tok-tok long en tasol Karimui distrik i nogat rot bilong ka i go long en. Balus tasol. Nau tasol em i wok long traim joinim Karimui wantaim

Solt Nomane long wokim 20 kilomita rot. Solt Nomane tasol i gat rot i go long Kundiawa. Treseri opis na distrik treseri opis tu i stap long Kundiawa olsem na Distrik Edministreta i mas go long Kundiawa long stretim ol pepa wok na arapela edministresen wok long hap na bihain go bek long Karimui, Mista Wai i tok.

Em i sutim tok tu olsem Karimui i bin gat ol memba long bipo we i westim 20 krismas olgeta long palamen nating na i no bin tingim

long stretim distrik wantaim gutpela rot sistem bai distrik i ken gat ol gutpela wok na pablik sevans i ken wok gut long en tude.

Long sait bilong Karimui i bin gat tripela memba pastaim na ol i westim gutpela 20 krismas long palamen na ino stretim ol rot na ol bikpela sevis bilong distrik, em i tok.

Em i tok Karimui i ken kisim taim bikos ol memba long bipo i no bin tingim hevi na wok bai kamap tude.

### Karimui kaunsil presiden i no amamas long ol distrik sevis

KOMPLEN i kamap olsem ol pablik sevans long Karimui distrik long Simbu provins i no save wok gut. Ol i save ron i go kam long Kundiawa na Goroka long laik bilong ol na planti wok na gavman, sevis long distrik i pundaun olgeta.

Dispela komplek i kam long presiden bilong Karimui lokol level gavman Kaliabe Giru. Olsem na em i singaut i go long Minista bilong Pablik Sevis lairo Lasaro long sekim dispela hevi mekim sampela eksen long dispela.

Mista Giru i tok planti taim ol i save toksave long Simbu provinsal edministresen long dispela hevi tasol nogat wanpela samting i save kamap olsem na Mista Lasaro

em wanpela rot ol i laikim em i save long dispela hevi.

Mista Giru i tok tu olsem wanpela rot long mekim ol wok i ron gut gen em long Pesenel Menesmen long hariap makim nupela man long kamap Distrik Menesa bilong Karimui distrik.

Mista Giru i tok senis i mas kamap hariap na dipatmen i mas makim nupela man bilong Karimui stret we em i ken mekim wok long sevim ol pipel bilong em wantaim gutpela sevis na go pas long ol pablik sevans long mekim wok long sevim pipel.

Karimui distrik i no save kisim wanpela gutpela helpim na sevis longpela taim i kam inap rifom bilong provinsal na lokol level

gavman i kamap na ol sevis i wok long kamap isi, presiden Giru i tok.

Tasol em i tok long bringim gutpela sevis tru long ol pipel bilong Karimui em long makim gutpela save-man stret bilong Karimui distrik.

Em i tokaut kliia olsem bikos Karimui i stap longwe tumas, ol olpela Distrik Menesa i laik stap moa long Kundiawa o arapela hap we ol samting i isi long ol.

Dispela em i bikpela samting long mipela olsem na gavman i mas hariap stretim dispela bikpela wari bilong planti tausent manmeri bilong Papua Niugini husat i save stap long ol bus na longwe ples, Mista Giru i tok.

### Seravo baim skul fi bilong ol Henganofi studen

MEMBA bilong Henganofi Viviso Seravo i tokaut long baim skul fi bilong ol sumatin long ilektoret bilong em husat i skul long ol yunivesiti na ol koles insait long kantri.

Mista Seravo i laik stretim ol skul fi mak long K200 i go antap long K1000 we dispela mani bai i kam long Distrik Sapot Grent bihainim RAP mani bilong memba.

Ol studen husat i skul long Yunivesiti ov Papua Niugini, Yunivesiti ov Teknologi long Lae, Institut ov Bisnis Koles, Lutheran Seminari long Madang, Goroka Bisis Koles na Passam Nesenel Hai Skul kisim pinis pemon bilong skul fi long dispela yia.

Mista Seravo i tokaut olsem

ilektoret bilong em insait long Isten hailans provins i no save kisim gutpela developmen na i nogat gutpela developmen kamap. Tasol em i gat strong long ol manmeri husat i gat save long mekim wok bikos planti bilong ol nau i wok long winim ol skul insait long ol bikpela skul long Papua Niugini.

Mista Seravo i tok edukesen em namba wan samting long baset plen bilong em long ilektoret bilong em.

Em i askim ol studen husat i kisim ol dispela skul helpim long wok strong long stadi na skul bilong ol na winim skul bilong ol. Na noken pusim oal yet i go insait long ol bikhet pasin na trabel olsem i bin kamap pinis long

tupela yunivesiti long kantri.

Em i tok dispela nupela sistem bilong Teseri Edukesen Studen Asisten Skim (TESAS) polisi we i senisim pinis NATSCHOL sistem bilong bipo i mekim hat tu long planti studen husat i save kisim strong long papamama long wok gaden long ples.

Bikos planti studen i nogat inap mani long baim bikpela hap skul fi bilong ol yet. Na tu planti bilong ol dispela studen em famili bilong ol i nogat planti samting long mekim na pulim mani.

Long baim skul fi mak long K500 i go antap i hat tru long planti famili husat i save stap long ples, Mista Seravo i tokaut.

### Rais i ken groa long Isten Hailans

PLANTI lain long Isten Hailans provins i kirap nogut long lukim olsem rais i ken groa long provins bilong ol. Ai bilong ol i op tu taim ol i kaikai na pilim swit bilong rais long Korofeigu DAL stesin long Ungai Bena distrik.

Moa long 800 manmeri na ol skul sumatin i bin kamap long witesim rais fil de long Korofeigu stesin we ol i kamapim long soim olsem rais em i narapela kaikai tu insait long provins.

Seketeri bilong Dipatmen ov Agrikalsa na Laivstok Miri Setae i tok olsem rais em i olsem wanpela bilong ol kaikai we yumi planim long kaikai o salim na kisim mani. Olsem na ol manmeri i mas givim moa taim long planim ol kaikai bilong gaden olsem kaukau, patoto, kasava na taro bikos ol manmeri i save gut long wei bilong planim ol dispela kaikai.

Mista Setae i tokaut olsem bai i gat rais mil i kamap na em i tokaut tu long opim gen hani bi fektori long

Goroka.

Mista Setae i tokim ol studen bilong Goroka Demonstration Skul, Bena Bena Hai Skul na Korofeigu komyuniti skul long traim kamap didiman. Dispela bai helpim ol long go bek long ples bihain taim na mekim wok long graun bilong ol.

Provinsal DAL Edvaisa Bire Bino i tokaut olsem ol pipel bilong Isten hailans i save kaikai olsem 2000 ton rais we kos i olsem K30 milien insait long wanpela yia.

Em i tok rais i ken groa long Hailans na ol i ken lukautim gut i stap sapos i gat ol gutpela strongpela masin bilong holim rais i stap gut we ol pipel i ken kaikai long bihain taim i gat bikpela drai na ol kaikai long gaden i save drai.


Provinsal DAL opis bai skelim ol pikinini rais long ol lain manmeri ol i makim pinis long ol i ken kisim na planim long gaden bilong ol. Em bai mekim dispela taim ol rais long Korofeigu i redi long ol i kisim na skelim long ol lain fama.



• Ol sampela yangpela long Hagen taun i resis long kalap long PMV bas long apinun long go long haus.



# MADANG NIUS



## Lukaut long nupela kopra grup

WANPELA mausman bilong ol liklik kopra groas insait long Madang i tok lukaut i go long olgeta groas osem i gat wangepa giaman grup i wok long paulim ol manmeri na tok ol i gat narapela groas asosiesen.

Benny Babob bilong Karkar Allan long Madang provins i tok i gat sampela olupela opisa bilong CCEA na CMB wantaim sapot bilong politiks i traim kamapim dispela nupela grup long mekim mani bilong ol yet.

Mista Babob i tok: "Mi osem wangepa groa na memba bilong PNG Groas Asosiesen long Madang brans, Mi singautim

olgeta liklik groas insait Bogia, Rai Kos, Not Kos Rot, Karkar na Madang sentral long lukluk gut long husat ol man i stap insait long dispela grup."

Em i singaut long ol pipel long lukluk gut long ol dispela man na wanem kain ting ting ol i gat bilong mekim wok politiks.

Mista Babob i tok lukluk gut long wanem kain pasin ol dispela man i gat na i moa gutpela yu save wanem kain tingting ol i gat bikos abrus bai ol i tingting long narapela samting na ol liklik groas bai kisim taim bihain.

Em i tok i no gutpela long lukim osem planti toktok long

kala bilong skin bilong ol man na wei bilong kisim graun ol dispela lain i save kamapim taim olgeta manmeri i painim hat long kila PNG Kopra Groas Asosiesen na narapela ol lan i traim aht long stretim hevli i Kopra Industri.

Em i tok ol dispela grup i bin putim aweanes na sampela miting tasol ol ino bihainim olgeta lo na giamanim planti manmeri.

Ol tok bilong dispela grup na ol sapota bilong ol i no tru na dsiepla ol toktok i klostu osem ol giaman lotu nabaut na dispela i bagarapim rot bilong mani i kam insait long kantri.

## Nupela haus bilong sista i kamap

HELEN TUKA i raitim

WANPELA nupela novalet klostu bai pinis long Alexhshafen bilong ol yangpela Sista bilong Therese husat nau i stap long Banara autteseen insait long Madang provins.

Sista Superio bilong lokel kongrekesen bilong ol Sista bilong Therese, Sista Maria Gorreti i tok dispela tingting bilong sanapim nupela haus bilong ol Sista long Alexhshafen em bikos haus bai sanap klostu long bikpela mama haus bilong ol Sista bilong Therese.

Novialet em haus bilong ol yangpela meri husat i tingting long kamap Sista i ken stap inap long taim ol i mekim las tok promis osem ol i laik kamap Sista tru tru.

Sista Gorreti i tok i gat planti risen bilong wanem ol i laik sanapim dispela haus klostu long bikpela mama haus.

"Wangepa bilong dispela em ol

yangpela Sista i stap longwe na sapos kar i bruk daun long rot, ol bai i no inap kisim kailka i go givim."

Sista Gorreti i tok. Em i tok tu osem taim wangepa i painim sik bai i hat long kisim ol i go long hauslek hariap.

Em i tok ino ol samting bilong bodi tasol, i save gat planti woksop i save kamap long Alexhshafen na dispela i kan givim strong long ol yangpela husat i laik kamap sista.

Ol i bin tingting long sanapim wangepa haus bilong Sista long Banara bipo yet tasol i bin nogat map mani.

Ol Sista i stap long ples osem Maunt Hagen, Simbu, Aitape na narapela hap bilong kantri i bin helpim wantaim mani bilong sanapim dispela nupela haus.

OL sista i bin salim ol kailka ol i groim long gaden bilong ol na sampela la ave mekim bred.

Sista Gorreti i bin tok osem haus bai pinis long mun mei long dispela yia.

## Tapen kisim nupela dabol klasrum

WANPELA olupela skul i stap insait long Raikos i kisim helpim i kam long tokel memba bilong ol Stahl Musa.

Tapen, wangepa komyuniti skul i stap long Boda bilong Morobe na Madang i olupela tru. Planti bikman osem memba bilong Kabwum Ginson Sionu, Raikos MP Stahl Musa na sampela moa i bin go ru long dispela skul bipom long ol i kamap bikman.

Raikos memba Stahl Musa i bin hairim wan-

pela balus las wik na kisim ol meteriel bilong sanapim wangepa nupela pemenan dabol klasrum.

Membra i tok osem em i mekim osem bikos skul ya i olupela tru na i wok long bagarap nau.

Em i tok tu osem i moa gutpela long putim bek na helpim dispela skul bikos em bai halivim edukesen bilong ol pipel long planti yia bihain.

Mista Musa i rtok em bai katim sampela mani

long RAP (Rural Action Program) bilong em long las yia long mekim dispela dabol klasrum na ol joint distrik baset prairoriti komiti i bin tok orait long em.

Narapela skul Mista Musa i bin halivim em long Bambu.

Edukesen em i nambawan samting em bai mekim na na tu tingting bai Gavana Jim Kas, we ol i laik lukim osem olgeta plikinini long Madang i mas i go long skul.

## Provinsel gavman na foren timba kampani bagarapim Madang

BERTHA SOMARE i raitim

WANPELA mausman makim maus bilong ol papagraun, Florian Bahin i sutim toktok long ol outsait timba kampani na provisel gavman long korapsen insait long wangepa bung i kamap ino long taim i go pinis.

Olpela namba tu prima bilong Madang Provinsel gavman, Mista Bahin i tok gavman i wangepa bikepla samting husat i save blokim rot bilong developmen i kamap insait long wanwan ples we ol i katim timba.

Em i tok gavman i karim ol bikpela bikpela timba kampani tasol i kam insait long ol i save bagrapim ples stret.

Em i tok planti mani i go ol kampni na nesenal gavman i ol papagraun na ol ples i stap klostu long ples bilong katim diwai i no kisim i lukim sampela denis na developmen i kamap long ples bilong ol.

Long dispela tok kros bilong em, em i tok ol NGO tasol i save traim long helpim ol manmeri long ples long kisim sampela senis na tu helpim ol pipel long wok gut osem ol i noken bagarapim ples.

Em it tok long Madang ol NGO i bin helpim long sanapim Madang Fores Risos Onas na ol save man bilong narapela hap i save kam helpim ol long lukautim bus na diwai bilong ol na gavman i no save givim wangepa helpim stret.

Mista Bahin i tok gavman i no save helpim oil tasol ol suamtin bilong yunivesiti i save helpim ol manmeri long ples na toksavelong hamas diwai na hamas mani bai kamap long dispela diwai na gavman i no save putim wangepa han i kam insait long helpim ol.

Narapela Risos ona, Steven Yandima i tok gavman i mas tingting long helpim ol papagraun.

"Gavman i mas helpim mipela na skulim ol manmeri lon gples long wanem we ol inap gat gutpela sindaun," Mista Yandima i tok.

Em i tok planti taim gavman i no save toksave long papagraun pas-taim long oil i tokok wantaim bikpela kampani bilong katim timba o kisim narapela risos long graun bilong ol.

Mista Yandima i tok papagraun i no save stap insait long pasim toktok wantaim wanem kampani i laik kam insait long mekim bisnis bilong katim diwai.

Pipel mas lukaut long sik AIDS.

ANNA AWASA i raitim

DOKTA Puka Temu, Siaman bilong Nesenal AIDS i tok Papua Niugini bai inap long stapim sik AIDS sapos olgeta manmeri i kila na senisim sampela pasin we i save kamapim sik AIDS insait long kantri.

Em i bin salensim olgeta niusmanmeri insait long kantri long mekim gutpela disisen long kisim ol toktok long dispela samting i go long olgeta manmeri.

Em i bin toktok long wangepa bung we i bin kamap long sik HIV-AIDS long Pot Mosbi osem AIDS em i wangepa sik we i save bihain wanem kain pasin manmeri gat na hariap tru bai kalap long nupela man sapos ol manmeri i no kila long wanem rot i stap bilong abrusim dispela sik osem na planti manmeri i wok long kisim dispela sik nogut wanwan dei.

NAC daireka, Dokta Clement Malau i tok ol niusman meri i mas kisim stori gut na noken maus wara nating na pretim ol pipel.

Em i tok sik AIDS i no bilong ol pamuk manmeri, siman na ami tasol, olgeta manmeri inap long kisim.


Em i tok olgeta manmeri i mas lukautim gut na noken wokim puspup nabaut.

Dokta Malau i tok ol niusman meri i mas putim olgeta wanem samting i kamap long sik AIDS na tokim ol pipel stret.




• Tupela plikinini ya Nelson David Mape (Junia) na susa bilong em Sharidine Mape dree-up gut tru long yunifom bilong tupela na holim banana mau long karim Igo long Madang Urban Lokol Gavman elementri klas na serim wantaim ol klas meit bilong tupela. Dispela skul ya em op long tupela mun Igo pinis na em wangepa tasol i gat yunifom bilong ol suamtin bilong em. Foto: Ben Taumai.





# Lae Nius



## Wenge askim pipel long kamapim lida

### YAKAM KELO i raitim


MOROBÉ Gavana Luther Wenge i askim ol pipel long stretim lida i kamap gutpela lida bilong ol. Mista Wenge i mekim dispela toktok taim em i witnessim Wanbel De bilong ol Isan pipel bilong Kabwum distrik long las wik Trinde.

Mista Wenge i tok taim lida ino mekim gut wok, ol pipel i mas sindaun wantaim em na stretim em bai em i ken senis liklik liklik. Sapos lida i mekim bikpela trabel tru olsem stilim mani o arapela bikpela trabel, orait ol pipel i ken senisim em, Mista Wenge i tok.

Mista Wenge i givim tok piksa long kaving we ol Sepik save katim na stretim nus pes na bodi bilong em isi isi na gut tru inap em i kamap gutpela kaving tru. Em i laikim ol pipel i stretim na kamapim gutpela lida bilong ol bihainim wankain rot olsem.

Gavana Wenge i tok em i amamas tru long lukim Wanbel De bilong ol Yus lokol level gavman pipel insait long ples Isan. Bikos dispela kain wanbel i save kamapim gutpela bung wantaim long wok na gutpela amamas bilong sindaun gut wantaim long komyuniti.

Long dispela bikpela de tu, Mista



• Luther Wenge

Wenge i amamas long gutpela pilai bilong ol elementri skul sumatin bilong Isan na em i givim K2,000 long ol.

Namba tu bisop bilong Luterensios Reveren Kiage Motoro i tokaut long dispela taim tu olsem ol lida i save oltaim mekim planti bikpela bikpela toktok. Tasol em i ting i gutpela moa sapos ol lida i ken mekim wok wantaim ol pipel stret long level na mak bilong ol stret. Bai wanem samting ol i kism i ken stret long laik na tingting bilong ol stret.

Reveren Motoro i tokim Gavana Luther Wenge na memba bilong Kabwum Ginson Saonu i olsem

taim ol pipel i givim pawa long ol lida, ol lida i nogat wanpela samting long pret. Bikos ol i gat pawa bilong ol pipel i stap wantaim ol.

Reveren Motoro i tok i nogat as long ol lida i hait insait long dak glas ka o sanapim bikpela banis na sekyuriti long haus bilong em. Ol lida i hait insait long dak glas ka em ol i gat trabel olsem na ol i hait o ol i pret long trabel bilong ol na ol i sanapim strongpela sekyuriti gad long haus bilong ol. Reveren Motoro i tok.

Em i salensim tupela lida ya long noken pret na hait, tupela i mas pilim fri na wokabout long wok bilong tupela.

## Tokples tru long elementri skul

OL elementri skul insait long wanpela bus ples long Morobe provins i soim tru kala na wok bilong ol taim ol i opim bikpela Wanbel De bilong Isan pipel long Kabwum distrik long las wik Trinde.

Tisa i singaut, Bada Asi Bada, Bada Asi Bada. Dispela em long tok Inglis ol i save tok, left right left, left right left. Ol elementri studen i mas kam daun long fran bilong flak na olgeta taim tisa i singaut long tokples na ol i save bihainim.

Taim ol i apim flak bilong Papua Niugini i go antap, ol studen i singim bikpela song bilong Papua Niugini long tokples bilong ol.

Dispela i bin nais tru bikos nogat wanpela skul i bin singim PNG song ya long tok ples bilong ol bipo.

Gavana bilong Morobe provins Songang Luther Wenge i bin amamas tru long lukim dispela stail bilong ol pikinini bilong Isan elementri skul we ol i mekim olgeta samting bihainim tok ples bilong ol stret.

Namba tu bisop bilong Luterensios Reveren Kiage Motoro na memba bilong Kabwum Ginson Saonu i amamas tu long lukim dispela stail bilong ol elementri skul studen.

Dispela em i stail bilong ol skul pikinini long bus skul na i opim

tru ai bilong ol manmeri i kam long taun long we bilong ol long skul.

Gavana Wenge i soim amamas bilong gavman bilong em long provins na givim K2,000 long Isan elementri skul long ol i ken baim ol samting bilong mekim wok bilong skul wantaim.

Memba bilong Kabwum Ginson Saonu i tokim ol pipel tu olsem K10,000 i redi pinis long helpim nupela klasrum bilong Isan Komyuniti Skul.

Dispela mani i redi na skul bai kism taim Distrik Edministrata bilong Kabwum i pinisim ol wok bilong pepa na rekot.



• Stail bus stop. Nupela senis i kamap long Lae market. Dispela bus stop i kism nupela senis olgeta na ol bas bai ino inap bungbung moa olsem bipo.

## Ol tisa long Lae tu i laik straik

MAK olsem 100 tisa insait long Lae siti i autim tingting bilong ol tu long dispela bikpela straik olgeta tisa insait long Papua Niugini i laik kamapim egensim nesenel gavman long gutpela pe na alawens bilong ol. Tasol ol i no sapotim singaut bilong apim pe i go antap long 200%.

Ol i laikim tasol olsem gavman i mas apim pe bilong ol i go antap long 100% na stretim ol arapela alawens na hevi bilong ol bihainim ol ripot we i stap long Teachers Work Value Study buk.

Dispela buk i holim olgeta wok na level bilong ol tisa na wanem kain alawens na pe i mas go wantaim long wok bilong ol tisa.

Ol tisa long Lae i bin bung long St Marys Komyuniti Skul long Lae na singaut tu long rausim Teachers Service Commission bikos ol i ting dispela komisin i wok long blokim

planti wok na hevi bilong ol tisa long i go stret long nesenel gavman.

Ol tisa i ting gavman i no save kism stret olgeta hevi na wari bilong ol tisa bikos dispela komisin i save stap namel na blokim ol hevi na tok stret.

Ol i laikim dispela komisin i mas pinis na sapos i nogat eksen long dispela na ol arapela hevi ol i gat pinis long en, ol bai lusim wok bilong ol.

Tasol ripot i kam long Teachers Service Commission i tok olsem dispela toktok i no tru bikos ol i no save blokim ol hevi na toktok bilong ol tisa i go long nesenel gavman.

Jenerel Seketeri bilong Papua Niugini Tisa Asosiesen, Hosea John i tokaut tu olsem ol lain long Teachers Service Commission i wok long wok hat tru na mekim gutpela wok tru long pait long hevi bilong ol tisa i go long nesenel gavman.

**PHONE:**  
(675) 472-3912

**FAX:**  
(675) 472-3919

**IMPACT SIGNAGE PNG**

*Any Size,  
Any Shape,  
Any Amount*

- COREFLUTE SIGNS
- METAL SIGNS
- BUMPER STICKERS
- T-SHIRTS
- STUBBY COOLERS
- BILLBOARDS
- BUNTINGS
- POINT OF SALE

**FOR ALL YOUR PRINTING NEEDS**

P.O. Box 3705, Lae, M.P. 411, Papua New Guinea - Email: [impact@global.net.pg](mailto:impact@global.net.pg)

## Angliken yut selebretim Pentekos insait long krused

HELEN REI i raitim

SAMTING olsem 2,300 Angliken yut i kamap long Pentekos 2000 krused long Jun 4 i go 11 long Resureksen Katidrel long Popondetta, Oro provins.

58 yut i kam long Mosbi daiosis, 12 i kam long Niugini Ailan, faiv i kam long Aipo Rongo, 32 i kam long Australia, na 2,259 i kam long ol peris insait long Popondetta daiosis.

Dispela krused i bin stat wantaim Misa long Jun 4 na i pas wantaim wanpela Misa long pestode bilong Pentekos, long Jun 11.

Long olgeta moning taim krused i stap, tupela man i save givim toktok long topik bilong 'Stap Insait Long Bilip'.

Namba wan man husat i givim toktok em Steve Daughtry, nesanel

ABM Yut Liaisen Opisa.

Namba tu man husat i givim toktok em Pater Shelby Tangara, Din bilong Resureksen Katidrel.

Long olgeta abinun, ol yut i gat taim long kisim skul insait long 12 woksop aninit long het tok, Kristen Lidasip, Lotu bilong kalsa, Lotu bilong go pas long mekim samting, Musik Ministri, Krietiv Dens, Kristen Drama, Wok wantaim ol blesing bilong Holi Spirit, Kaunseling, Ministri bilong oraitim ol sik manmeri, Ministri bilong ol pikinini, Lukautim buk mani, edministresen, na Ol meri insait long ministri.

### Beten na felosip

Wan wan de i stat wantaim beten na olgeta abinun ol i pinisim bung wantaim beten na felosip.

Moa yet long selebresen, ol oge-

naisa bilong dispela bung i givim taim long ol yut long bringim sevis i go long komyniti long kain kain we.

Ol kain we olsem bringim wara i go long ol ol arapela yut grup i tek pat long dispela selebresen.

Ol i bin baim 5-pela teng wara long spesel kos na putim long wanpela wara saplai hap we ol i yusim long skelim wara i go aut long ol lain i tek pat long dispela selebresen.

Bihain long dispela selebresen ol i givim ol dispela teng wara long Ako, Sakarina, Oitande na Resureksen peris, ol peris husat i bin askim long gutpela wara bilong dring.

Ol i mekim narapela komyniti sevis long Fraide Jun 9, we ol i skelim 1000 plastik bek i go long ol yut husat i klinim ol pipia long ol bikpela rot bilong Popondetta taun.

## Kimbe krused go long Lihir

WANPELA Katolik grup bilong Wes Niubriten, 'Faith Voices Ministry' i go kamap long Londolovit taun bilong Lihir ailan las wik olsem wanpela krused bilong ol.

Planti ol bilip manmeri long Lihir Gol projek na ol ples klostu i bin bung insait long wanpela Katolik sios long harim tok bilong God long Tunde Jun 13.

Atingting bilong dispela krused, em 'Holi Spirit I Pairap'.

Wanpela Katolik le evanjelis, Francis Damasius bilong Peter ToRot Ministri long Rakunai long Is Niubriten i bin go pas long dispela krused.

Dispela krused i bin karim aut dispela auris program insait long tupela wik olgeta long Namatanai eria bilong Niu Ailan provins.

Ol Katolik bilong Lihir Ailan yet i bin askim dispela grup long go lukim ol na autim tok bilong God long ol bai i ken strongim bilip bilong ol.

Mista Damasius i tok, grup bilong ol i bin karim aut autris long pasin bilong autim testimoni, mekim drama na singsing, long kisim skul tok bilong God i go long ol bilip manmeri.

Mista Damasius i tok em i hop dispela krused bai helpim ol bilip manmeri long lusim sin na tanim bel na kisim Jisas long laip bilong ol.

## Gwahanke tokples baibel i kam aut

PAUL NENGAI i raitim

BIHAIN long 13 yia bilong tanim tok long nupela testamen i go insait long Gwahanke tokples insait long Saidor, long Raikos distrik bilong Madang provins, ol lain i save tokples Gwahanke i kisim namba wan nupela testamen long tokples bilong ol long las wik Sarere insait long wanpela spesel seremoni.

Samting olsem 1,500 pipel i save tokples Gwahanke insait long Saidor eria.

SIL Asosiet Dairekta bilong Tokples Afeas, Dunc Pfantz i givim ol namba wan baibel buk long Katolik, Luteran, Asembli Ov God, Foa Skea, Seven De Adventis, Sios bilong Krai na Evanjelikal Sios bilong Gwahanke long las wik Sarere.

Wanpela man bilong Saut Korea, Jee Young An, husat i wok wantaim Summer Institut bilong Linguistics (SIL) i bin go long Saidor long 1987 na i bin wok wantaim ol pipel bilong Gwahanke tokples grup long tanim dispela nupela testamen baibel.

Mista An i tok pastaim wok bilong em bilong tanim tok i luk hat, tasol bihain long 13 yia bilong hat wok, em i amamas long tanim nupela testamen i go long tokples Gwahanke.

Em i tok ol lain bilong em yet long Saut Korea, 'Global Baibel Translators of South Korea' i bin helpim em long kamapim dispela buk holi.

Papua Niugini Baibel Sosaiti i bin helpim long pablisim dispela buk long Saut Korea. Ol i bin wokim 500 kopi bilong dispela ol buk na ol i salim wan wan kopi long K50.

Noel Diru wanpela bilong tripela lokol man husat i bin helpim Mista An long tanim tok i tok ol i bin bungim planti hevi tasol wantaim helpim bilong God papa, ol i bin pinisim wok bilong ol.

Mista Diru i redi nau long tanim baibel i go long Guya Manu tokples insait long Saidor eria tu.

Em i hop long statim dispela projek long narapela yia.

# PNGCC i no wanbel long Nesanel Kaunsel Ov Kristen Sios Bil

PAPUA Niugini Kaunsel Ov Sios (PNGCC) i no wanbel long Nesanel Kaunsel Ov Kristen Sios Bil.

Insait long wanpela Pas, PNGCC i salim i kam long Wantok, PNGCC Jenerel Seketeri, Sophia Gegeyo i tok.

Ms Gegeyo i tok PNGCC i luksave olsem sampela lain i bin mekim dispela Nesanel Kaunsel Ov Kristen Sios Bil na givim long PNGCC long glasim.

"Mipela i bilip olsem husat manmeri i mekim dispela bil i mas kisim tingting bilong mipela pastaim long ol i raitim dispela bil olsem bai PNGCC i save long wanem samting i stap insait long dispel bil," Ms Gegeyo i tok.

Em i tok, olsem wanem bai gavman i harim tok bilong dispela nupela bodi taim gavman i no save sapotim olgeta wok PNGCC i save mekim long dispela taim.

Ms Gegeyo i tok tu olsem gavman i mas luksave long wok bilong sios na tok orait long wanem samting ol sios i ken mekim we gavman i no inap.

"PNGCC i no amamas tu long tioloji bilong dispela nupela proposel. Mipela i bilip olsem God i singaut long Palamen bilong Papua Niugini, long ol memba bilong Palamen long givim sevis long ol pipel bilong dispela kantri na wok long gutpela bilong olgeta. Tasol mipela i no wanbel long kamapim wanpela lo i ting olsem God i kamapim

wanpela Palamen," Ms Gegeyo i tok.

Em i tok ol sios i mekim planti wok insait long Intigrel Yumen Developmen pinis. Olsem na tingting bilong kamapim wanpela 'Skul bilong Intigrel Yumen Developmen na Nesanel Rekonsiliesen,' i mas sekim gut taim ol i kamapim lo bilong dispela skul.

Ms Gegeyo i askim tu sapos i gutpela long statim dispela nupela skul taim ol sios i wok long ronim ol kain skul olsem pinis na ol i wet long kisim gavman sapot.

"PNGCC i askim gavman long wok bung wantaim ol sios long promotim intigrel yumen developmen yusim ol straksa i stap pinis," Ms Gegeyo i tok.

## Mosbi Asdaiosis selebretim Jubili 2000

WENCESLAUS MAGUN i raitim

MOA long 2000 manmeri na pikinini i bin bung long Sir John Guise stedium long Sande 18 Jun 2000 bilong selebretim Jubili 2000 pestode bilong God Papa, God Son na God Holi Spirit.

Misa i bin stat long moning taim wantaim ol momase singsing grup i kamapim sampela gutpela singsing tumbuna bilong amamasim ol lain i kam pas long wetim misa i stat.

Insait long Misa, ol arapela singsing grup tu i putim singsing bilong ol long bringim Buk Baibel i go long alta, na bringim ofatori.

Ol kwai grup wantaim ol musik man bilong ol i kamapim sampela naispela singsing bilong lotu we i kirapim na pulim bel na tingting bilong ol bilip manmeri na pikinini long bung wantaim na lotuim God.

Asbisop Brian Barnes

yet i bin go pas long dispela bikpela Jubili 2000 Misa wantaim ol arapela pater bilong Mosbi Asdaiosis i stap wantaim long dipsela Misa.

Asbisop Barnes i tok dispela selebresen i bin stat long 1997. Long dispela taim em i kisim toksave olsem Pop i makim em olsem Asbisop bilong Mosbi Asdaiosis. Tasol long dispela taim em i no bin kam yet long Mosbi. Em i tok em i bin kam long Mosbi long 1998 na i amamas long wok bung wantaim ol jubili komiti bilong Jubili 2000 we Pater Michael Igo i bin kamapim.

Asbisop Barnes i tenkim edministreta bilong St Mary's Katidrel peris, Pater Rodrigo wantaim ol Jubili 2000 komiti memba long gutpela wok ol i bin mekim insait long las tripela yia.

Em i tenkim Papa God tu long givim gutpela taim bilong ol bilip manmeri i bung wantaim long selebretim dispela bikpela pestode.



• Ol Momase singsing grup i danis long amamasim Jubili 2000 taim ol Katolik i bung long bikpela misa long Sir John Guise Stedium las Sande. Foto: Issac Ikuavi.

## Kait em bikpela samting long pasin kalsa bilong Japan

VERONICA HATUTASI i raitim

PASIN Kalsa bilong wan wan pipel na wan wan ples na graun, bus na solwara em ol bikpela samting na long dispela taim, planti pipel long wol i wok long laik holim strong long ol.

Bihainim dispela tingting, Japan long dispela wik i bin holim wanpela kalsarel so bilong ol kait, ol top na ol arapela samting we i sut long pasin kalsa bilong ol.

Kait so i bin kamap long Park Royel Motel long Mosbi, stat long Mande Jun 22 inap long Tunde 23.

Embasi bilong Japan na Japan Faundesin i bin putim kamap dispela kait so long soim bikpela tingting we ol pipel i gat long kait na ol pasin kastom we i go wantaim kait.

Japan i holim rekot long wol olsem kantri we i gat planti ol kain kait. Kait i gat planti kain kain minig na ol i save flaim long makim ol spesel na bikpela de. Wanpela em long taim ol i selebretim bon de bilong namba wan pikinini man we long Japan ol i save holim long Me 5 long olgeta yia. Kait i bin go insait long



• Ol liklik sumo resla top.

Japan na kamap olsem kalsa bilong ol long yia 894 BC.

Narapela samting we i bin stap long so em ol tops. Dispela em ol kain kain seip na ol i save yusim ol dispela long pasim rop long en na tanim bilong mekim ol pikinini na ol arapela i amamas. I gat ol bikpela na liklik sais na seip top we ol i bin putim long pablik i ken

lukim.


Planti skul pikinini i bin go lukluk na ol bin gat bikpela laik long lukim ol kait. ol top, lukim laip na pasin kalsa bilong ol pipel bilong Japan long televisen na tu harim long ol mansave bilong ol husat i bin wok long mekim klia long ol skul pikinini na visita ol samting we i stap long dispela so.

Mitshuishi Chiaki em wokman bilong Japan Embasi i bin tok dispela so em i wanpela edukesenel na kalsarel so na tu rot bilong soim prensip we Embasi bilong Japan i save putim kamap long ol sumatin na pablik i lukim ol pasin kastam bilong Japan. Na ol tu i ken kisim tingting na amamas long lukautim na soim ol pasin kalsa bilong PNG.

Em bin tok las taim we ol bin holim wankain so olsem em long 19990 tasol long ol yia bihain, sampela mansave bilong ol i save kam na siong sampela bikpela de, ol i save soim ol dispela samting long pablik.

Em i tok kait so ya i wok long raunim wol long ol kantri we ol embasi bilong Japan i stap long en.

Em bin tok kantri Lebanon em las ples we kait so i bin kamap long en bipo em i kam long PNG na bihain long hia, ol kait bai go long Brunei.



• 86 narakain kait i bin stap long so. Dispela em Devil Kait.

## Siaman bilong Difens ritaimen fan kisim tok

WENCESLAUS MAGUN i raitim

SINGAUT i go long Minista bilong Difens, Muki Taranupi long rausim siaman bilong Difens Fos Ritaimen Benefit Fan, Kelly Naru.

Wanpela bod memba, Kenel Reginald Renagi i askim Mista Taranupi long rausim Mista Naru long sia bilong siaman bilong bod bilong DFRBF. Em i tok astingting bilong rausim Mista Naru long dispela posisen i kamap bikos Mista Renagi i rogat moa bilip long wok bilong Mista Naru.

Mista Renagi i tok maski Mista Naru em i wanpela loya, em i no sanap strong long mekim gut wok bilong em na long dispela rot i bin bagarapim gutpela wok ol arapela memba bilong bod na DFRBF menesmen i bin mekim long sampela taim nau.

"Maski em i kisim profesenel edvais, em i no bihainim. Sampela taim, siaman yet i save mekim disisen na mekim bod na menesmen i yusim mani," Mista Renagi i tok.

Em i tok olsem wanpela trasti na memba bilong dispela fan, Mista Renagi i tok em i no laik lukim wanpela man husat i no save putim mani i go insait long dispela fan, na tu wanpela man ausait long ami i go het long bagarapim nem bilong bod na bagarapim mani insait long dispela fan.

Mista Renagi i bin askim siaman Mista Naru long risain insait long 7-pela de i go pinis na givim bek ki bilong ka na bekim bek olgeta arapela mani em i gat dinau wantaim fan.

Em i tok ol memba bilong DFRBF em Siaman, Kelly Naru, Deputi Siaman, Vali Aisi husat i bin holim wok olsem olpela

Difens Seketeri, Kenel Philip Playah, husat i bin go wok long Canberra long Australia olsem wanpela edvaisa bilong ami tripela mun i go pinis, Rupa Mulinah, husat i bin holim wok tu olsem olpela Difens Seketeri, na em yet (Mista Renagi).

Em i tok Kenel Playah i bin risain insait long las tu mun tasol bod i no lukim risain pas bilong em.

Moa yet, Mista Mulinah i risain long Januari 1999 na gavman i no makim nupela bod memba bilong kisim ples bilong ol

Dispela em i tok i mekim DFRBF i sot long wanpela bod memba stat long las yia yet i kam inap long dispela yia na sapos bod i luksave long Kenel Playah i risain, dispela bai bringim namba bilong ol bod i go daun long tripela bod memba long dispela taim.

## Plis holim tupela ovasis man wantaim PNG paspot

OPIS bilong lukautim paspot bilong ol manmeri husat i laik go long ovasis o i kam long PNG i gat ripot nau long mekim ol paul na hait pasin long givim paspot long ol ovasis lain i kam long PNG.

Plis i bin holim pinis tupela ovasis lain long i gat PNG paspot we i no bihainim stret rot tupela i mas kisim paspot long en.

Seketeri bilong Foren Afeas Dipatmen Evoa Lalatute i tokaut olsem em i save long dispela hevi insait long opis bilong em long las mun yet tasol em i no bin laik mekim wanpela bikpela eksen yet long ol dispela woklain. Bikos ol i laik glasim gut ol evi-

dens na tu skelim sindaun bilong ol dispela woklain we ol i gat famili.

Mista Lalatute i tok ol dispela hevi i stap long han bilong wanpela investigetiv komiti long glasim na kamap wantaim evidens na rot bilong wanem mekim-save ol bai kamapim long ol dispela woklain.

Em i tok taim wok painimaut insait long dispela hevi i laik kamap bai ol i mas rausim ol dispela woklain i go stap ausait pastaim long larim ol wok painimaut i ron gut na nogat samting i stapim.

Bos bilong Plis, Plis Komisina John Wakon i

tok ol plisman i redi tasol inap taim Mista Lalatute i redim ol ripot na pepa bilong ol hevi ya na givim ol plisman long go het insait long wok painimaut.

Ol lain bilong plis fos tu i karimaut wok painimaut bilong ol long dispela hevi tu

Memba bilong Sentrel Bogenvil Sam Akoita i tok lukaut olsem dispela pasin bilong, givim hait paspot long ol ovasis lain i nogut tru long sekyuriti bilong kantri. Ol man nogut o trabel lain bilong ovasis i ken kam insait long PNG isi tru na mekim ol bikpela trabel long hia, Mista Akoita i tokaut.

## Kisim bagarap long taim bilong wok

GRAEME BININ i raitim

KONSTABOL Joyce Latu em i wanpela plismeri husat i save wok pastaim wantaim Kokopo Plis Stesen long Is Niu Briten provins. Em i tok olsem wanpela samting olsem mirakol i bin kamap long em olsem na em i stap laip tude.

Ol mak we wanpela naip i bin katim i stap yet antap long het bilong em na tu long ol pinga long han bilong em bai save mekim dispela plismeri i tingim bek wanpela de long mun Jun 1999 taim birua i bin kamap long em wantaim narapela tupela wanwok plisman long Kokopo plis stesen. Dispela em long taim wanpela man husat i bin smokim spak brus mariwana i bin katim ol wantaim wanpela gras naip.

Mi bin harim nek bilong dispela stail meri Buka i bin seksek liklik taim em i bin autim stori bilong em long mi. Joyce em i gat 24 krismas na papa bilong em Latu i bilong Ramunpan long Buka taim mama bilong Joyce yet i kam long liklik ples lruie insait long Tinputz distrik Bogenvil Ailan long Not Solomons provins.

Long wanpela apinun taim olsem 4 kilok plis ka i bin lusim Konstabel Stafford Eki bilong Oro provins, Konstabel Alex Mamats bilong Tarara, Sentrol Bogenvil na plismeri PWC Joyce Latu long Kokopo plis stesen. Ol i bin kam wok long senisim ol lain husat i bin wok long santaim.

Bihain tasol long plis ka i lusim ol na go aut long patrol, wanpela meri Hailans i bin kam kamap long plis stesen. Meri ya i karim liklik pikinini long han bilong em krismas bilong pikinini i luk olsem wanpela o tupela krismas tasol.

Meri ya i bin luk pret na sotwin wantaim olsem na namba wan plisman long bungim dispela meri em Konstabel Mamats. Plisman i kirap na askim mama ya sapos em i gat sampela hevi na sapos plis bai ken helpim em. Mama i tokaut stret olsem man bilong em husat i wok long simukim spak brus i bin laik kilim em wantaim naip olsem na em i ronawe i kam long plis stesen.

Liklik taim bihain dispela "hap sens" o longlong man i kam kamap bihainim meri bilong em na Konstabel Mamats i bin leit tru long stopim man ya hariap bikos wantu tasol olsem lait bilong taim klaut i laik pairap, man Kainantu ya i bin planim gras naip i kam long baksait bilong meri na naip i go insait stret na kisim lewa bilong turangu meri ya. Mama i singaut wantaim na pundaun holim pikinini yet

husat i waswas long blut bilong mama bilong em. Turangu pikinini ya, sori long em bikos em tu i pret nogut tru na sindaun long blut bilong mama bilong em na krai nogut tru. Mama ya i bin dai olgeta long dispela taim.

Man, plisman Mamats em yet tu i paul olgeta long lukim dispela pasin nogut i kamap long ai bilong em stret.

Taim em i laik holim pasim trabel man ya, em yet tu i kisim bagarap taim dispela man i katim em long het. Narapela plis man Stafford Eki i ron i kam long helpim wanwok bilong em tasol dispela man i planim gen naip long bel bilong boi Popondetta ya.

Trabel man ya i kirap na ron i go long pinisim Joyce Latu husat i stap long diuti opis. Em i tromei naip na katim het bilong plismeri tasol em i no kisim gut. Taim dispela tewel man i laik katim Joyce gen, plismeri i kisim wanpela sia na wok long abrusim naip long en. Joyce Latu i bin ting olsem em tu bai dai long dispela taim tasol nogat, sampela memba bilong plis mobail skwat long Tomaringa i bin kam kamap na holim pasim man nogut ya. Ol i bin senisim nus na pes bilong em.

Long dispela taim yet tu, plismeri Joyce Latu i lukim blut i pulap long yunifom bilong em olsem na ai bilong em i raun na em i pundaun hap dai.

Ol i karim em na tupela wanwok bilong em i go long Vunapope haus sik taim ambulensi i kam kisim dispela dai meri i go long haus sik mog. Ol sampela lain wantok i bin kam kisim liklik pikinini.

Taim Joyce Latu i opim ai bilong em bek gen long haus sik ol i bin tokim em na narapela plisman Alex Mamats olsem wanwok bilong ol em ol i no bin inap sevem em long Vunapope olsem na taim ol i laik karim em i go long Nonga Base Hospital, Konstabel Stafford Eki husat i bin gat 25 krismas i bin lusim laip bilong em. Tupela wanwok bilong Stafford i bin sori nogut tru na krai taim ol i slip yet long haus sik bet long Vunapope.

Tude Joyce Latu wantaim Alex Mamats i wok nau long Buka plis stesen long bringim gutpela sindaun i kam bek long Bogenvil. Tupela i memba bilong wanpela skwat bilong ol plisman na meri bilong Bogenvil yet husat i bin kisim treining long Bomana Plis Koles long yia 1998.

Joyce Latu nau i marit pinis wantaim narapela plisman bilong Kerema yet em stail mangi ya. Gilbert llave husat i save wok wantaim Sauten Komanda Plis Tas Fos. Mipela wisim ol amamas long ol taim i kam bihain

# HIV/AIDS lo bai gutpela long PNG

**VERONICA HATUTASI i raitim**

INSAIT long wanpela wok-sop we i bin kamap long Mosbi i no longpela taim i go pinis, loya bilong Nesenel AIDS Kaunsil (NAC) Bomal Gonapa i bin tok PNG i nogat lo yet bilong lukautim ol HIV/AIDS pipel.

Tasol em bin tok NAC i wok long lukluk long dispela samting.

Em bin tok Pablik Helt Ekt i sut long ol sik Seksuerli Transmitit Disis (STD) tasol bikos sik AIDS em i kamap nupela tasol long kantri, PNG i nogat lo long en.

Mista Gonapa i bin tok kwesten i stap long ol atoriti i mas mekim klia sapos sik HIV/AIDS em wanpela sik we wanpela i ken kisim long narapela o bhainim medikol mining we ol no klia yet long em.

Mista Gonapa i tok i moa-beta long kamapim nupela lo we bai karamapim HIV/AIDS.

Stet i bin sanapim NAC long 1997 wantaim tok orait bilong Palamen. Na wok

bilong Kaunsil ya em long kodinetim na developim ol polisi long edresim HIV/AIDS. NAC long 1998 i bin kirapim NAC Seketeriet na i bin inapim dispela.

Long dispela taim, NAC i karimaut wok long developim ol polisi we bai karamapim ol samting i sut long HIV/AIDS long olgeta level bilong sosaiti.

Em bin tok Humen Raits Lo we i karamapim olgeta manmeri na pikinini i tok olgeta i gat rait long laip em i stap na dispela i karamapim tu ol lain wantaim dispela sik bikos em i besik humen raits bilong pipel, maski yu husat.

Tasol em i tok long stap gut insait long sosaiti, komyuniti na kantri, i mas gat ol lo long lukautim ol pipel na long ol pipel i bhainim. Em long Mama lo bilong kantri yet na ol ligel, sosel, rilijes, medikol na ol arapela lo moa olsem.

Em bin tok lo i gat bikpela pat long pilaim long laip bilong sik HIV/AIDS lain bikos em i em i stiaim rait namel long ol lain i gat dis-

pela binatang bilong sik ya na ol arapela memba bilong komyuniti na tu namel long wan wan man wantaim sik ya na Stet. Em bin tok sapos i gat lo long sik HIV/AIDS, em bai gutpela bikos dispela bai mekim klia ol samting olsem sapos bai i gat kompalseri tes, bai lo i lukautim ol long ol samting olsem rausim ol long wok sapos kampani o ol boslain i painim olsem wanpela wok manmeri gat HIV/AIDS binatang long ol.

Mista Gonapa i bin tok sampela gutpela lo bilong lukluk long en taim ol laik kamapim lo long HIV/AIDS em long :

- Lo we i tambuim diskriminesen o abrusim o no laikim ol pipel wantaim sik HIV/AIDS long sait bilong wok, haus, kisim medikel tritmen. rot we ol i toktok, wokim poroman na stap wantaim ol arapela na long sait bilong kisim ol sevis;

- Humen raits lo we i luk-save long raits bilong ol lain i gat HIV, ikwal raits, rait long praivesi, rait long helt kea na lo bilong lukautim ol dispela

rait;

- Lo i karamapim ol lain i stap insait long wok we i ken kisim na givim sik i go long ol arapela na ol em, ol homoseksuels (ol man yet i wokim pasiri, nogut long narapela man), ol pamuk manmeri na ol lain husat i save kisim ol drag olsem mariwana na ol arapela strongpela drag;
- Lo long noken tokaut long ol lain husat i gat sik HIV/AIDS
- Lo we i stapim ol rot long daunim sik HIV/AIDS long kisim ol arapela pipel. Tok piksa em lo we i lukautim pasin bilong givim o salim ol kondom (gumi), nidel o lo long stapim etvetismen bilong kodom na ol arapela toktok bilong bhainim seif mesej long manmeri i slip wantaim.
- Lo we ol man bai pilim fir long kisim HIV/AIDS tes na
- Lo we i enkarijmautim infomesen we ol man bai gat gutpela save long sik na rot we em i save kisim ol man, na kamapim na skruim ol polisi long HIV long ples bilong wok.

# Sik TB i strong yet long PNG

SIK TB em wanpela olpela sik we kantri i laik daunim tasol em i hat yet long mekim dispela. Olsem na sik i wok long kisim planti manmeri na pikinini long dispela kantri yet.

Insait long olgeta wan wan yia, helt dipatmen i save ripotim samting olsem 5,445 pipel long PNG i kisim sik TB, Sinia Medikel Etvaisa wantaim Nesenel AIDS Kaunsil bilong PNG, Dokta Ninkama Moya i bin tok long HIV/AIDS semina long Mosbi i no longpela taim i go pinis.

Samting olsem tu bilien pipel long wol i gat sik TB long tude.

Na long PNG yet moa long 5,445 pipel i save kisim dispela sik insait long wan wan yia, Dokta Moya i tok.

Sik TB i save kamap long ol komyuniti na ples we ol pipel i stap pas pas wantaim na i nogat spes long muv long en. Na i nogat gutpela ol samting olsem wara, ples bilong tromoim pipia long en na ol kain samting olsem. Sapos wanpela; a man insait long komyuniti na famili i gat sik TB, bai sik i kalap i go long narapela. Rot we narapela man o meri i kisim dispela sik em long pulim win i gat binatang bilong sik TB long narapela, moa yet sapos ol i slip, sindaun o stap klostu long wanpela arapela. Na tu haus o ples we ol i stap long en i nogat gutpela windua. Sik TB i save bagarapim kru bilong man, bel na ol planti arapela hap bilong bodi.

Dokta Moya i bin tok wantaim HIV/AIDS, sik TB i wok long go bikpela moa bikos gutpela binatang we i save luakutim bodi long ol sik nogut olsem TB em binatang nogut bilong sik HIV/AIDS i bagarapim.

Em bin tok dispela i wankain wantaim ol arapela sik olsem malaria, niu-monia sampela kensa.

“Sapos man i gat sik HIV/AIDS na bodi i bagarap, bai sik TB tu i kamap bikpela”, Dokta Moya i bin tok.

Em bin tok planti ol bikpela manmeri long PNG i save kisim YB bilong lang. Na ol pikinini i save kisim TB bilong ol rop i karim blut. Tasol gutpela samting em i gat marasin long pinisim sik TB.

Hap kona i karimaut ol toktok long sik HIV/AIDS Namba tu hap

**Wanem samting i kamapim sik AIDS?**

Taim ol binatang nogut i save bagarapim sistem o ol gutpela binatang we i save lukautim bodi long ol kain sik, bodi i no inap long pait moa long abrusim ol strongpela sik na kensa. Em save kisim longpela taim long ol strongpela sik long pinis taim manmeri i kisim marasin. Tasol sampela kain kensa olsem kaposi's sarcoma i save kamap long ol lain i gat sik AIDS.

HIV binatang i save bagarapim wanpela kain gutpela binatang i lukautim bodi ol i kolim long CD4 sel o binatang. Strong bilong sik na mak we sik manmeri i kamap orait o sik i go nogut i sut long level bilong CD4 sel. Sapos mak long CD4 sel o binatang i go daun, sik bai go bikpela na sapos CD4 sel i go planti inap long mak bilong nomol level, sik bai kamap orait.

**Rot we HIV/AIDS binatang i save kalapim man**

HIV/AIDS em i wanpela hatpela sik long kisim na dispela em gutpela nius. Dispela em bikos man i no inap long kisim sik olsem sik TB, flu o kus. Tasol em ken kisim long reip o pasin bilong bagarapim meri, bagarapim pikinini (child abuse) na kisim sut long blut i gat binatang bilong HIV/AIDS long en). HIV/AIDS i gat kain rot yet we em save kalap long wanpela man i go long narapela.

Hia em ol rot:

- Slip wantaim narapela patna husat i gat binatang bilong HIV/AIDS.
- Mama i gat binatang bilong HIV/AIDS i ken givim binatang nogut long bebi em i karim long bel na taim em i bon em i gat dispela sik pinis. Bebi i ken kisim binatang nogut ya taim em i susu long mama.
- HIV/AIDS binatang i ken kalap long narapela taim ol i serim nidel na ol arapela sap samting we ol i yusim long wokim ol tatu o ol makmak long skin, sutim ia na nus long wokim hul, ol lain i kisim drag i serim nidel (IDU), pasin bilong katim skin bilong ol yangpela man long pasin kastam na ol arapela samting moa olsem we ol save katim skin bilong man long wokim ol bilas.
- Holim blut i gat binatang nogut na ol arapela pipia olsem pispis taim yu gat kat (soa long bodi, maus o kain olsem) long wanpela hap bodi bilong yu. Sapos yu nogat kat long hap bodi bai yu orait bikqs binatang nogut i nogat rot long go insait long bodi.
- Kisim binatang nogut long blut trefusen o pasin long kisim blut long haus sik taim man i sik o gat eksiden na i sot long blut. Em i hat long kisim sik ya long dispela rot bikos ol dokta i save glasim gut olgeta blut we ol i save kisim na yusim long blut trefusen sevis. Tasol HIV binatang i ken stap sapos dona o man husat i givim blut i stap long windua piriwet. Dispela i min olsem em i donetim blut taim sik i stat tasol taim ol i kisim blut tes, em i kamap negetiv o blut i no soim olsem em gat HIV binatang yet long en. Tasol dispela i no save kamap tumas.

**Yu no inap long kisim HIV/AIDS long ol dispela rot**

Man i no save kisim HIV binatang taim em i sekanim narapela man husat i gat dispela sik, holim em, kaikai wantaim em, yusim wankain toilet na ol kain rot olsem.

Man i no inap long kisim AIDS taim moskito, hetlais na ol arapela kain insek o binatang i kaikai em. man i no inap long kisim sik AIDS taim em i slip long wankain bet we narapela i gat dispela sik i slip long en, stap long sem haus wantaim ol arapela famili memba, holim han bilong ol, go long sem skul o klasrum o wok long sem opis. Narapela man i no inap long kisim sik AIDS long pasin bilong kus olsem yu kisim sik TB o flu.

**Windo piriwet em wanem samting?**

Windo piriwet em taim man o meri i kisim sik HIV inap long taim blut bai tes positif o sapos ol i kisim tes em bai soim olsem man o meri i gat dispela sik. Em save kisim namel long tupela wik na tripela mun bipo blut tes bai soim positif. Sapos blut tes i soim olsem em i negetiv o nogat HIV binatang long en long windua piriwet em no min olsem man o meri i nogat sikHIV. Na sapos dispela man o meri i slip wantaim narapela patna, em bai givim sik ya i go long narapela. I moabeta long dispela man o meri long noken slip wantaim patna long dispela taim. Na i gutpela long ripitit blut tes gen namel long tupela wik na tripela mun.

**Wanem ol sain o mak bilong luksave olsem manmeri i gat sik HIV/AIDS?**

Ol lain wantaim HIV/AIDS i ken stap gut olsem ol arapela manmeri na wok long planti krismas. Man o meri i no inap save olsem em gat HIV/AIDS. Tasol taim sik i go nogut na sistem we i save lukautim bodi long ol sik nogut i bagarap, man o meri wantaim sik ya bai lusim skin, pekpek wara i go long wanpela mun samting maski em kisim marasin, soa long maus, fiva o gat skin i hot moa long tripela wik, kus we i no save kamap orait taim man i kisim marasin. Sampela sik we yumi gat long PNG olsem TB na taifoid fiva (pekpekim blut) em ol i ken kamap long wankain rot na i moabeta long lukim dokta long sekim yu long en.

Moa long neks wik....

## Orogen na Natgro givim helpim long sapotim PNG Medikol Sosaiti

PAPUA Niugini Medikal Sosaiti long las wik i bin kisim K5,000 donesen mani long tupela kampani bilong helpim long holim bikpela bung bilong em long mun Septemba long dispela yia.

Stat yet long mun Mas long dispela yia, Sosaiti i wok long karimaut fan resing bikos taget mak long mani we ol laik bungim long holim bikpela bung ol i kolim long 2000 PNG Medikal Sosaiti Simposium long dispela yia em long K100,000.

Bung bai kamap long wanpela wik long mun Septemba na ol bai holim long Park Royel. Moa long 200 bikman na ol saveman long medikol eria insait long kantri, rijen na tu sampela bilong Australia, Amerika, Nu Silan, Inglan na wol bai stap long dispela bung.

Hagen beis kampani em Natgro Manesmen Limitit long las wik i bin givim K3,000 donesen taim Orogen Minerels i givim K2,000 long Sosaiti long sapotim ol long ol fan resing wok bilong ol.

Dispela i kisim mani mak we Sosaiti i resim i kam inap



• L-R: Joe Turia em Pablik na Gavman Rilesen Manesa bilong Orogen Minerels kampani i givim sekmani na sekan wantaim Siaman bilong Ogenaising komiti Dokta Joe Bana-Koiri. Namel em Presiden bilong Sosaiti Dokta Sapuri i sanap na lukluk i stap. *Poto: Isaac Ikuavi.*

nau i go long K45,000.

Presiden bilong Sosaiti Mathias Sapuri taim em i tok tenkyu i go long tupela kampani ya long donesen bilong ol i bin tok nau ol i tagetim ol polisi meka bilong kontributi i go long dispela grup we i save mekim ol bikpela na gutpela rises wok na ol arapela samting we i sut long marasin bilong Helt Dipatmen.

“Bai mipela i askim Praisin Minista Sir Mekere Morauta long sapotim mipela.

“Mi” bilip olsem sapos ol wan wan politisen bilong sauten rijen i givim K3,000, bai mipela i bungim taget mak.

“Sosaiti i sapotim strong ol helt polisi bilong gavman,” Dokta Sapuri i tok.

Em i tok Saientifik Komiti

we Profesa Isi Kevau i kirapim i wok long kisim ol pepa we ol bai prisenim long simposium ya. Dettlain bilong kisim ol pepa ya em long Jun 30. Het tok bilong simposium em “Emerging Diseases in the New Millenium” o long Tok Pisin em “Ol sik we i wok long kamap long nupela milenium.”

## Palamen ripot wantaim WENCESLAUS MAGUN

### Waiko presentim bil bilong senisim UPNG Lo

MINISTA bilong Edukesen, Dokta John Waiko, i presentim wanpela bil long Palamen long Tunde long senisim Yunivesiti bilong Papua Niugini Lo na wok bilong em na long kamapim wanpela yunivesiti ristraksa program na edministresen. Dokta Waiko i tokim Palamen olsem wanpela yunivesiti ristraksa program na edministresen bilong yunivesiti.

Em i tok as bilong mekim ol dispela senis em i bikpela samting bikos sapos i nogat ol

dispela ol senis, yunivesiti i no inap karim aut wanpela ristraksa program bilong yunivesiti na mekim ol senis insait long edministretiv divisen na pesenel.

Dokta Waiko i tokim Palamen olsem wanpela yunivesiti ristraksa program na edministresen bilong yunivesiti.

Em i tok i gat tupela bikpela tingting bilong kamapim dispela ristraksa:

- Ristraksa bai helpim Yunivesiti long kamapim ol kwaliti program bilong en; na

### Ol yunivesiti i nogat gupela nem, Dokta Waiko i tok

OL yunivesiti bilong gavman long Papua Niugini i nogat gupela nem moa insait long ol yia i go pinis, long ai bilong ol pablik, Minista bilong Edukesen, Dokta John Waiko i tok.

Tasol Dokta Waiko i tok, aninit long nupela Vais Sansela, Yunivesiti bilong PNG, i bin lukim planti bikpela gupela senis i kamap.

"Yunivesiti i gat planti hevi, olsem hevi bilong lo na oda, tasol dispela em ol piksa bilong ol hevi i kamap long olgeta hap bilong kantri na i no long yunivesiti tasol," Dokta Waiko i tok.

Em i tok taim Vais Sansela bilong yunivesiti i bin lusim posisen bilong em long 1999, nogat man o meri i kisim dispela posisen yet. Tasol em i tok Yunivesiti Kaunsel bai makim nupela Vais Sansela i no longpela taim bihain.

### Waiko tokaut long sampela senis insait long UPNG Lo

SAMPELA ol senis bai kamap insait long UPNG Lo we Dokta Waiko i tokim Palamen long Tunde i olsem:

- Vais Sansela bai go het long bosim Yunivesiti edministresen, tasol bai i gat sampela Pro Vais Sansela husat bai helpim em. Dokta Waiko i tok tu olsem dispela Lo i rausim posisen bilong Deputi Vais Sansela;

- Ol i mas glasim gut husat ol lain i save kamap memba bilong Yunivesiti Kaunsel, na lukim olsem i mas gat gupela namba bilong ol maus manmeri bilong ol bikpela bodi na rausim ol memba husat i no mas stap insait long Yunivesiti Kaunsel;

- Senisim nem bilong Akademik Bod bilong Yunivesiti i go long 'The Senate' na tokaut gut long wok bilong ol memba bilong 'The Senate' wantaim ol Yunivesiti Kaunsel. Dokta Waiko i tok dispela bai kamapim gupela wok long dairektim akedemik wok bilong Yunivesiti, kain olsem long mentenim stendet na lukim olsem ol greduet i gat gupela kwaliti bipo ol i pinisim skul bilong ol;

- Bungim tupela komiti, Yunivesiti Fainens Komiti na Yunivesiti Plening Komiti wantaim long rausim planti ol hatwok na westim taim bilong ol wok manmeri bilong yunivesiti. Dokta Waiko i tok ol bai kolim dispela nupela komiti, 'the University Resources Committee'. Em i tok wok bilong dispel komiti, em long mekim plen

na putim na yusim ol risos (mani na ol arapela propeti) bilong Yunivesiti;

- Rausim ol namba wan Fakelti na namba tu, na Dipatmen bilong ol Stadi insait long ol Fekalti. Dokta Waiko i tok bai i gat ol Skul i wok klostu long ol Fakelti taim bai i gat senis insait long ol ples bilong wanem kain ol kos insait long ol dispela Skul. Em i tok bai i gat ol ful taim din i lukautim ol Skul;

- Ol wok manmeri bilong yunivesiti i mas wokim gut wok bilong ol. Dokta Waiko i tok yunivesiti em i ples bilong ol wok manmeri bilong PNG long bihain taim, olsem na ol sumatin i mas lainim gupela pasin bilong wok long ol wok manmeri bilong yunivesiti long sait bilong edministretiv na akedemik. Em i tok yunivesiti i kamapim wanpela lo bilong ol wok manmeri bilong yunivesiti, stat long Vais Sansela i go daun long ol junia klak na tu ol ausait lain na ol wok manmeri bilong PNG wantaim;

- Nau yet ol i glasim ol lo bilong ol sumatin, long lukim olsem ol sumatin i bihainim lo, wankain olsem ol lo bilong ol wok manmeri bilong yunivesiti bai ol i soim gupela pasin long ol sumatin. Dokta Waiko i tok sapos ol lain i brukim ol dispela lo bai i gat sampela mekim save i kamap; na

- Ol i glasim Supaneuesen Skim bilong yunivesiti long mekim em i wok wankain olsem ol Supaneuesen skim bilong dispela taim.

## Plantu mani stap long olpela kokonas diwai

### PEKU PILIMBO i raitim

Papua Niugini nau i toktok wantaim Senta bilong Developim Industri (CDI) long helpim kantri kamapim ol samting olsem tebol, sia, kapbod na narapela ol samting wantaim olpela kokonas diwai i stap insait long ol plenteisen bilong kantri.

Eking prinsipal bilong Lae Timba na Forestri Trening Koles long Lae, Mista Vagi Levo i tok ol i kamapim wok painim aut long dispela samting na ripot ol i salim i go pinis long CDI.

CDI em i wanpela grup we i save helpim ol manmeri husat i painim hat long wokim bisnis bikos ol i no save long wanpela samting long ol developing kantri insait long Kariniem, Afrika na Pasifik.

Mista Levo i tok plantu olpela kokonas diwai i save stap long

kantri insait long olpela plenteisen na long ol ples na dispela ol gupela diwai i save bagarap nating taim ol manmeri no yusim gut.

Em i tok ol i bin mekim wanpela stadi na painim aut olsem kokonas diwai i gupela long kamapim tebol, sia, kapbod, ti trei, desk na planti arapela samting na ol manmeri i ken kisim mani long dispela diwai we i save lus nating.

Mista Levo i tok plantu manmeri i save laikim ol samting ol i kamapim long kokonas diwai bikos em i save stap longpela taim na tu save luk nais tru na plantu man save laikim long ol kantri bilong waitman na tu PNG.

Em i tok dispela ripot i go long CDI bai kisim helpim i kam na ol manmeri long kantri i ken kamapim mani wantaim olgeta olpela kokonas diwai bilong ol. CDI bai salim ol manmeri husat i save long

kamapim ol samting wantaim kokonas diwai na dispela ol lain bai helpim ol Papua Niugini manmeri long a nomo dispela samting.

Em i tok CDI bai helpim tu long kisim mani i kam insait long kantri sanapim wanpela fektori bilong kamapim ol dispela samting insait long PNG.

Mista Levo i tok ol i bin karim aut dispela wok painim aut long ples olsem Madang, Is na Wes Niu Briten na narapela provins we i gat plantu kokonas diwai i save stap long en.

Em i tok olsem ol i bin tram aut pinis sampela long Madang na i luk gupela tru olsem na nau ol i salim dispela ripot i go pinis long CDI long kisim helpim.

Em i tok i gat bikpela mani tru i stap long olpela kokonas diwai tasol ol manmeri i no klia olsem na taim helpim i kam CDI bai olgeta manmeri i luk save olsem mani i bin pulap

tru long olpela kokonas diwai.

Kodneta bilong CDI Vana Catsica husat i stap long dispela taim i tok ol nupela manmeri husat i no save long kamapim bisnis na laikim sampela helpim i kam long ol i ken toktok wantaim tupela mausman bilong ol long PNG. Wanpela i stap long IPA op s long Mosbi na narapela em Mista Vagi Levo long Lae.

Em i tok ol i no save helpim wantaim mani long statim bisnis tasol ol bai helpim tasol long givim saveman husat bai helpim long sanapim bisnis. Pei bilong dispela ol saveman i save kam long, CDI tasol ol narapela mani na samting bilong statim na reaim bisnis i mas i kam long yu yet.

Em i tok CDI bin helpim sampela bisnis long kamap insait long PNG na narapela ol kantri insait long developing wol.

### Beng bai putim ol EFTOS masin long ol skul

OL SKUL insait long kantri bai yusim kad sistem long peim ol skul fi.

Dispela i bihainim wanpela agrimen namel long Papua Niugini Benking Koporesen na Edukesen Dipatmen long putim ol EFTOS masin i go long ol skul we bai mekim isi long ol papamama long peim ol skul fi.

Long EFTOS sistem ol kastoma husat i gat SAVE kad i yusim masin ol i putim long ol stoa na ol arapela ples moa long rausim mani long en na ol no go insait long ol beng long autim mani.

Ol ripot i kam long Fainens Pasifik niusleta i tok Papua Niugini Benking

Koporesen na Edukesen Dipatmen i mekim wanpela agrimen pinis long larim ol skul i kamap olsem ol papa long ol EFTOS na dispela i min olsem PNGBC beng bai putim ol masin insait long ol skul we i tok yesa long gat masin.

Ol i kam wantaim dispela agrimen bikos ol i laik mekim isi long ol papamama na tu long ol woklain long beng bikos long taim bilong peim skul fi, lain long beng i save longpela tru.

Manesa bilong Ilektronik sevis Geoff Smart i bin tok dispela i wanpela rot we beng i bihainim long kisim benking sevis i go klostu long ol pipel.

Edukesen Dipatmen i wok long mekim ol wok redi long EFTOS masin na em bai salim ol agrimen fom i go long ol skul husat i gat laik long go insait long dispela samting.

Beng bai givim ol samting we ol bai yusim long EFTOS masin i go long ol skul na tu, trenim ol skul staf long wok bilong lukautim na yusim EFTOS masin ya.

Ol bai putim dispela sistem insait long Nesenel Kapitel na Sentrel provins na tu long ol arapela provins long kantri.

Sapos olgeta samting i stret na redi, ol bai putim dispela sistem i go long ol skul long dispela yia.

# RAMU SUGAR



*The Sweetest Thing*

# WANTOK

NIUSPEPA BILONG YUMI OL PAPUA NIUGINI STRET

# Stretim wari bilong ol tisa

OL skul tisa i stap na planti bikpela wok na ol gutpela senis i kamap long kantri na long ol ples na laip bilong wanwan manmeri insait long Papua Niugini. Ol tisa em ol namba wan lain bilong brukim kokonas bilong yumi olgeta we het bilong mipela olgeta i klia long rit na rait na bihain moa save na tingting i kamap long yumi.

Long apinun ol tisa i save sindaun na redim ol progrem bilong tumoro bai ol skul manki i skul olsem wanem. Long nait tu em i save sindaun na tikim ol buk o tes pepa bilong ol skul pikinini. Na ol i save gut tru long pasin na save bilong wanwan pikinini insait long skul. Ol dispela samting i no kamap isi, ol i mas wok hat tru long lainim na save gut long wanwan sumatin.

Ating het bilong ol tisa i save pen tru na ol i save tait tru, tasol yumi ol papamama i no save.

PNG Tisa Asosiesen (PNGTA) i tokaut olsem ol tisa i bin kisim liklik potnait pe bilong ol i go antap 10-pela krismas i go pinis. Na dispela em longpela taim tumas bikos nau prais bilong olgeta kaikai na ol samting olsem balus fea, ol kolos, trausis na siot, skul fi na planti arapela samting moa i go antap pinis. I no wankain moa olsem 10-pela krismas bipo. Olsem na gavman i mas tingim nau na apim potnait pe bilong ol tisa i go antap bihainim level bilong ol prais long kaikai na ol samting bilong stua na ol arapela sevis we i go antap tude.

Long dispela yia yumi lukim olsem ol tisa i stat long mekim nois bikos ol i laikim pe bilong ol i go antap na tu ol arapela alawens tu i mas go antap. Ol i singaut long pe bilong ol i mas go antap long 200% na dispela em bikpela mak tru long pe i go antap long en.

PNGTA i skelim olsem dispela 200% em bikpela mak tru tasol ol i gat bikpela wok na toktok i stap yet long toktok wantaim nesene



gavman long hevi bilong ol tisa.

PNGTA i tok dispela toktok bilong ol wantaim gavman i no long apim potnait pe tasol, nogat. Ol i toktok tu long apim ol arapela alawens bilong ol tisa, lukluk long stretim ol hevi bilong haus, balus tiket na ol arapela hevi we ol tisa i save bungim long wok bilong ol.

Sampela bilong ol dispela wari o hevi bilong ol tisa em gavman i oraitim pinis olsem long apim potnait pe bilong ol elementri tisa i go antap long Level 5 pe na boding diuti alawens bilong olgeta tisa

nau i go antap. Ol arapela alawens bilong Domestik Maket Alawens na ol longwe bus skul alawens em PNGTA i wok long tok pait yet wantaim gavman.

PNGTA i no sapotim ol tisa yet long kamapim straik insait long kantri bikos ol i skelim olsem dispela em las samting ol tisa i ken mekim sapos olgeta rot na wok bilong toktok wantaim gavman i pinis tru. Na gavman ino harim tru wangepela toktok bilong ol tisa, orait ol i ken kamap wantaim straik.

Ating straik bilong ol tisa inap

kamapim bikpela hevi tru insait long kantri bikos ol skul sumatin bai inogat skul. Ol bai lusim planti samting we ol i laik lainim long klasrum. Na tu skul fi bilong ol papamama bai lus nating bikos ol pikinini i no lainim olgeta samting long skul. I gat olsem 26,000 tisa insait long kantri long komyuniti skul i go antap long hai skul na ol bikpela trening skul tu wantaim.

Gavman i mas rispektim ol tisa na stretim hevi bilong ol gut wankain olsem gavman i mekim long ol PNG Nesing Asosiesen na

ol Komyuniti Helt Wokas insait long kantri. Tupela wantaim i wankain bikos ol nes na sista i save sevim, laip bilong yumi long hevi bilong sik na birua. Na ol tisa tu i save stap long givim yumi save bilong mekim kamap ol gutpela gutpela wok na ol samting bilong bringim amamas na gutpela sindaun long kantri, komyuniti na yumi wanwan wantaim famili.

Singaut bilong ol tisa i no ken lus nating, gavman i mas stretim long gutpela rot ol i ken kamap wantaim.


• Gavman i saspensim pinis provinsal gavman bilong Sauten hailans na Westen provins long Tunde dispela wik. Dispela saspensim i bihainim ol toktok bilong mani i paul na ol samting i no stap stret long wok bilong tupela provinsal gavman ya. Minista bilong Provinsal na Lokol Gavman Afeas Philemon Embel i tokaut olsem gavman i bin givim 21 de long tupela Gavana, Anderson Agiru na Nibert Makmop long tokaut na soim ol rekot na wok bilong tupela we i ken soim olsem nogat samting i rong long edministresen oilong tupela. Tasol tupela i no kamap wantaim wangepela bekim na inap Tunde long dispela wik, Nesene Eksekutyutiv Kaunsil (NEC) i ausim tupela provinsal gavman ya.

Dispela namba tri saspensim bihain long rifom sistem i bin kamap long 1996. Namba wan saspensim em Oro provinsal gavman, bihain em Nesene Kapitel Distrik Komisn (NCDC) na nau em Westen na Sauten Hailans provins.

• Bai ileksen long Wes Nu Briten provinsal sit na Gasel Open sit i pinis long Sande dispela wik we olpela Primia bilong Is Nu Briten provins Sinai Brown i winim ileksen long kamap memba bilong Gasel Open. Na long Wes Nu Briten rijinol sit em olpela beng menesa Clement Nakmai i winim dispela sia. Tupela bai kamap long palamen long dispela wik long kisim sia bilong tupela. Tupela bai ileksen wantaim i ron gut na inogat ol trabel na hevi i kamap.


Sinai Brown i winim Gasel Open sit bihainim long olpela memba Nakikus Konga i risain long palamen olsem memba bilong Gasel. Clement Nakmai i winim Wes Nu Briten rijinol sit bihain long olpela Gavman

## OL HAPHAP NIUS LOGO



• **Praim Minista Sir Mekere Morauta.** bilong provins Bernard Vogae i dai long dispela yia.

• Oposisen lida Bill Skate i salensim Praim Minista Sir Mekere Morauta olsem dispela helpim o dinau mani bai i kam long Wol Beng i soim olsem Wol Beng i laik lukautim Papua Niugini nau. Mista Skate i tok planti ol toktok na rot insait long pepa bilong gavman we Wol Beng i wanbel long en em wankain



• **Oposisen lida Bill Skate.** tasol olsem pepa em i bin wokim bipo. Tasol Wol Beng i no laikim.

Mista Skate i tok nau Wol Beng i harim tok bilong PNG gavman na i laik givim dinau mani, em i lukim olsem planti bikpela toktok na disisen bilong lukautim kantri em Wol Beng bai i go pas long mekim na i no gavman bilong PNG. Dispela i soim olsem Gavman i salim PNG pinis long han bilong Wol Beng.

Tasol Praim Minista Sir Mekere Morauta i bekim strong olsem Oposisen ino klia tru long ol wok na toktok gavman i mekim wantaim Wol Beng long kisim dispela dinau. Em i tok dispela dinau mani em bikpela samting long helpim PNG bikos long taim nogut we

kantri i gat hevi long mani. Em i tok olpela gavman bilong Bill Skate i as bilong bikpela mani bilong kantri i lus na kantri nau i sot tru long mani.

• Nesene gavman i gat bikpela dinau long ol viles kot opisa long 4-pela krismas olgeta i kam inap nau. Dispela dinau i kamap olsem K6 milien olgeta. Minista bilong Jastis Kilroy Genia i tokaut long dispela long palamen haus long dispela bihain long Gavana bilong Simbu Pater Louis Ambane i askim long wanem as na nesene gavman i kisim ol wok bilong viles kot i go bek long lukaut bilong ol. Mista Genia tok nesene gavman i kisim bek wok bilong viles kot i kam bek long ol yet i ken lukautim bai ol i ken stretim dispela pemen bilong ol viles kot opisa. Ol i ting long baim olgeta viles kot opisa long mun Septemba long dispela yia. Dispela wok bilong lukautim mani na wok bilong viles kot i bin go long lukaut long provinsal gavman tasol ol i no bin baim ol viles kot opisa long taim. Olsem na nesene gavman i kisim bek dispela lain.

• Mosbi na Sentrel provins i gat nupela bos bilong plis nau. Nupela bos em Tom Kulunga husat i senisim Raphael Huafolo. Mista Huafolo i muv igo antap long kisim wok olsem Asisten Komisina bilogn opere-sen we em i sensim Fred Sheekiot. Mista Sheekiot em nupela Asisten Komisina lukautim wok bilong Lojistik.

I gat luksave olsem moa senis bai i kamap yet long wok na posisen bilong ol sinia plis opisa insait long kantri. Mista Huafolo i tokaut olsem em i amamas long dispela senis na nupela posisen em i kisim long plis fos.



## Wok redi bilong 2001 Arafura i stat

ASISTEN dairekta bilong Arafura Gems Jan Waddy i bin kam holim miting long Pot Mosbi wantaim ol nesenel spots i gat tingting long salim tim i go long Arafura Gems long 2001.

Dispela Arafura Gems i save kamap bihain long olgeta tupela yia long Darwin, Northern Territory, Australia.

Arafura Gems nau i kamap olsem wanpela kompetisen long Asia Pacific we i kamapim strongpela kompetisen bilong ol spotsman na meri. Planti kantri i save yusim Arafura Gems long redim tim bilong ol long ol rijonel toname olsem Saut Pasifik Gems na tu Asia Gems.

Dispela Arafura Gems bai kamap long Mei 19-26, na i

### ARAFURA GEMS RIPOT

gat sampela ol nupela spots we PNG na tu ol arapela kantri i ken putim nem. Ol nupela spots nau em drag-onboat racing, intanesenel laipsaving, judo, ragbi lig, bis volibal, road cycling na soka (man) na tas ragbi.

Ol arapela spot i gat nem pinis em atletik, aussie ruls, badminton, boksing, basketbal, hoki, ragbi yunion, pistol shuting, squash, sepaktakrw, lawn bowls, sailing, sofba, swimming, tebol tenis, tenping bowling, triathlon, volibal na water polo.

Tim bilong Papua Niugini bai gat sans long traim ol tim bilong Australia, Asia na tu ol arapela kantri long

Pasifik. PNG i bin stap long olgeta Arafura Gems i kam inap nau.

Wantaim mini South Pasifik Gems long Norfolk Island long Disemba 2001, PNG ating bai salim wanpela strongpela tim long dispela Arafura Gems.

Siaman bilong PNG Arafura Plening Komiti Thomas Kahai i ting olsem wokabaut bilong Ms Waddy long PNG bai helpim wok redi long Arafura. Komiti bilong em i redi long dispela wokabaut bilong em hia we em i bin givim planti toktok long ol nesenel spoting bodi.

PNG i save painim mani bilong em long salim tim ya.

## Taekwando tim stap long Korea

### TAEKWANDO RIPOT

PAPUA Niugini Taekwando tim nau i stap insait long namba tri Korean Open sempionsip we bai kamap long dispela wiken.

Sif instrakta bilong PNG Taekwando Edward Kassman yet i go pas long tim wantaim 5-pela arapela paitman olsem Thomas Tawan, Tony Eka, Cratsee Tito, Rene Iru na George Solomon.

Kassman i tokim Wantok olsem em i namba wan taim PNG i salim wanpela taekwando tim i go long bikipela wol tonamen.

Kassman yet i bin go pinis long sem tonamel long

namba 12 Wol Taekwando sempionsip long Manila, Philipines, tupela yia i go pinis.

Dispela tim bilong PNG i wok long trening aninit long Master Jun Lee.

Em i bin kam long kantri aninit long agrimen wantaim Wol Taekwando Federesen long mekim na strongim taekwando spot insait long kantri.

Kassman i gat bilip olsem PNG tim husat i kamap namba wan long Saut Pasifik bai kamapim gutpela

poin. Insait long SP Gems long Guam, PNG tim i kisim tripela gol medal na tupela bron.

Sif Instrakta yet husat i save kamapim gutpela pait i bilip tru olsem ol boi bilong em i redi long dispela strongpela salens.

Samting olsem 40 kantri bai stap insait long dispela Korean Open sempionsip.

Na ol biknem kantri olsem Korea yet, USA na Chinese-Taipai bai gat bikipela sans long winim dispela tonamen.

## Ol opisel mas risain na sapatim klab bilong ol

### PMSA RIPOT

#### HENRY MORABANG i raitim

WANPELA singaut i kamap nau long ol opisel bilong Pot Mosbi Soka Asosiesen (PMSA) long noken joinim ol klab bilong ol.

Dispela singaut i kam long sampela sinia pilaia na tu wanpela kosa husat i no laik givim nem olsem pasin bilong sampela opisel i no luk stret long ai bilong ol soka sapota na tu pilaia.

Ol i makim namba tu vais presiden Mark Kelep, olsem opisel i save brukim sampela lo long sapatim klab bilong em, Cosmos.

Arapela toktok tu i kamap em ol i no amamas long sampela toktok we Mista Kelep i bin mekim long taim Yunivesiti i lus long Blu Kumuls las wik 4-0.

"Olsem opisel bilong PMSA, Mista Kelep i mas bihainim gutpela pasin bilong sapat na i noken bagarapim arapela tim.

"Taim wanem opisel i kamap na wok olsem eksekutyutiv, em i mas risain long klab bilong em na stap olsem namel man. Em i kamap referi bilong olgeta pilaia na i no bilong klab bilong em tasol," ol i tok.

Ol i tok tu olsem ol eksekutyutiv bilong PMSA i mekim gutpela wok tru. Nau yet soka graun i wok long pulim planti ol soka pilaia i kambek long fil. Tasol sapos ol eksekutyutiv na opisel bilong PMSA i mekim dispela kain pasin, ating bai kamapim planti tingting tru ya.

Soka bilong Pot Mosbi i laik kamap olsem bipo taim ol opisel bilong Guria i bosim PMSA. Olgeta samting o toktok i mas go long sait bilong Guria long mekim tim i kamap wanpela strongpela tim.

Aninit long lukaut bilong leit Andrew Waho, Guria i mekim planti ol asua tasol em i no save kisim mekim save.

Ol i tok konstitusen bilong PMSA i givim gutpela sapat na stabiliti long mekim wok bilong ol eksekutyutiv i kamap gutpela.

Ol i toktok strong olsem sapos ol eksekutyutiv i laik sapatim tim bilong ol, orait ol i mas risain na arapela ol pipel i kisim ples. Sapos ol i holim wok eksekutyutiv yet na sapatim klab bilong ol, dispela bai i no gutpela tumas.

Arapela gutpela piksa em, Baku Bakuwai bilong SP Brewery i kisim wok sekretari jenerel bilong PMSA. Orait nau, Mista Bakuwai i mas lusim wok kosa na larim ol arapela man i kosa.

Bakuwai nau i kamap wokman bilong PMSA na i no moa kosa bilong SP Brewery. Sapos SP Brewery i mekim trabel, nau Bakuwai bai sanap long wanem sait, em bai sapatim SP Brewery yet o PMSA.

Ol i tok dispela em ol sampela gutpela piksa we ol eksekutyutiv bilong PMSA i mas tingting sapos soka i laik kamap strong.

Tasol Mark Kelep i tok dispela toktok i no gutpela bikos em i no sapatim wanpela klab long Pot Mosbi.

Em i tok sapos em i sapatim klab, em i laik bilong em bikos soka em i no profesenel spot em i amata tasol. Na em i laik bilong em long sapatim wanem klab em i laik.

Vais presiden i tok sapos ol pilaia na kosa i ting dispela i no stret orait, ol lain husat i kisim wok long eksekutyutiv bilong PNG Futbol Asosiesen tu i mas risain.

Kelep i tok kain toktok i no kamapim gutpela sindaun long soka fil, na em i ting sapos ol wanem lain i gat toktok ol i mas kamap na lukim ol opisel.



• Yangpela boi ya i lainim we bilong kikim Aussie Ruls. Moa long 500 liklik mangi i bin kamap long trening kos bilong dispela Pikinini Aussie Ruls.

## Tigers rekotim namba wan win

### KENNEDY EDENE i raitim

KOIARI Ragbi Lig i gat 4-pela gem i stap yet bipo long em i statim fainel bilong em.

Na long ol gem i kamap las wik, Hook Tigers i reko-tim namba wan bilong em egensim Crystal Eels 22-16.

Kosa bilong Tigers Albert Ugunie em i lukluk long narapela win long dispela wiken. Em bai traim kamapim wanpela strongpela tim long difen na etek gut.

Crystal Eels i bin lus long

### KOIARI LIG RIPOT

wanpela top tim Sogeri Choice las wik na ol i tingting tu long winim gem las wiken tasol i popaia.

Kosa bilong Eels i mas lusim pilai na stap long sait-lain long mekim wok kosa. Tasol dispela bai i no isi gem bikos ol arapela tim tu bai putim strongpela tim tu, long ol narapela pilai, IBS Pukpuks bai traim bung bilong wantok bilong em Sirinumu Owls Panthers.

Pukpuks wantaim lus las wik bai putim strongpela lain

ap na bai pilaim olgeta stail gem bilong ol long winim dipela gem.


Long B gret IBs Pukpuks bai hamarim Owls, Trek Warriors ai nekim Sogeri Choice na Crystal Eels husat em stap long fran o top bai mitim Hooks Tigers.

Poins lata i sanap olsem nau Sogeri Choice 11 points, Eels 7, Warriors 6, Pukpuks 6, Tigers 3 na Sirinum Op's 1 points tasol.

B gret: Eels 10, Choice 7, Tigers 5, Sirinum Ops 3, Warriors 3 na IBs Pukpuks 2 points.



IKEN WOKIM GUTPELA SAMTING LONG YU




• (Antap): Fulbek bilong Brothers Wilson Maroko i laik autim bal long takol egensim Souths long Pot Mosbi ragbi lig resis las Sande. Brothers nekim Souths 20-18.

• Skulsoka eksen namel long Ela Beach na Korobosea we i kamap long Sir John Guise Stedium las Sarere.



• (Antap): Oi liklik skul meri long Pot Mosbi brukim bun long pilai net-bal.

• (Daunbilo lephan): Bara, noken brukim bun nating. Stail ya i wok long kamap long soka fil long Bisini.



• Aussie Rul bilong ol pikinini i wok long pulim planti man stret ya. Long piksa yu ken lukim ol mangi i lainim long resis long kisim bal.



# Brothers daunim pawa bilong Souths

## PRL RIPOT

BROTHERS nau i kisim namba wan ples long poin lata bihain long em i daunim pawa bilong Souths 24-8 insait long bikpela gem bilong Pot Mosbi Ragbi lig resis long Sande we i kamap long Llyod Robson oval.

Brothers husat i stap namba tu ples wantaim wan-pela poin tasol i win na kisim ples bilong Souths antap long lata.

Bihain long raun namba 12, poin i sanap olsem Brothers 21, Souths 20, Paga 18, Magani 15, Post Puma 12, Defence 12, Waliya 12, Kone Tigers 12, Dobo Warriors 10, Tarangau 8, Hawks 7 na Wests na Gerehu United i stap long tu poin yet.

Souths i gat klipela rekot na laik winim gem long Sande. Tasol ol boi bilong Robert Akunai i no wari, ol i kamapim gutpela gem stret na win.

Brothers i kamapim strong-pela gem na difen gut tru i go inap pinis bilong pilai long winim dispela gem.

Samting olsem 10 minit long namba wan hap, Nelson Wanga i ran 30 mita long go putim namba wan trai bilong



• Fawat bilong Brothers i tromoi han long traim stapim takol bilong pilaia bilong Souths long Pot Mosbi ragbi lig resis las Sande. Brothers win 24-8. Foto: Isaac Ikuavi.

gem. Em i no kikim gut konvesen na skoa i sanap 4-0.

Bihain long 30 minit, Souths i levelim skoa 4-4 taim senta Name Ossie i go putim trai. Arapela tupela trai bilong Brothers i kam long Wanga yet na Spark Lingenon long surikim skoa i go long 12-4 inap long hap taim.

Bihain long namba tu hap,

Brothers i wok long soim strong yet tasol ol Souths i no giv ap na ol tu i kamapim strong gem tu.

Samting olsem 15 minit, Peter Mangope i putim narapela trai. Tasol Brothers i wok long strong moa na Catship Agesamo i skorim narapela trai bilong ol Brothers. Konvesen i no gutpela na

skoa i sanap 16-8.

Brothers i kisim arapela penalti gol bihain long wan-pela asua i kamap long go pas 18-8. Wanga i skorim namba tri trai bilong em long surikim skoa 24-8 long winim dispela gem. Trai ya i kamap long las minit bilong pilai taim Souths i wari long lus na i no tingting gut tumas long pilai.

# Mangi Hailens i gat kik long pilai soka

SAPOS you ting olsem ol mangi Hailens i no save long stail bilong pilai soka, em yu i gat rong tingting.

I tru olsem pilai bilong ol Hailens em ragbi lig na sapos yu laik traim ol long dispela spot, sore tumas yu mas lukaut long wanem ragbi lig em bun bilong ol stret. Na planti long ol i mekim nem pinis na planti i mekim nem yet long pilai ragbi lig.


Long sait bilong pilai soka em o hailens i nogat nem tumas long dispela spot.

Em bipo, tasol nau long mangi hailens tu i gat nem long pilai soka. Na insait long olgeta 5-pela hailens senta olsem Isten Hailens, Simbu, Westen Hailens, Enga na Sauten Hailens em ol i gat wan wan asosiesen i afiliet igo insait long nesanel soka bodi.

Nau yet dispela ol senta i ektiv tru long wok bilong developim na kamapim planti gutpela soka pilaia long divisen bilong man na meri stat long junia i go antap long sinia level.

Long dispela as yumi i wok long lukim ol hailens mangi i wok long pilai i kam antap na mekim nem bilong ol insait long dispela spot - soka.

Wanpela long ol dispela hailens mangi em Bobby Kenkua husat bai lukim 21 Krismas bilong em long mun Ogas dispela yia. Bobby em bilong liklik ples Yanabo insait long Kainantu distrik - Isten Hailens, tasol mama bilong em i karim em long Lae we em i groap na stat pilai soka



• Bobby Kenkua. Foto: Sape Metta.

long hap.

Mama i karim Bobby long Ogas, 1979 na taim em i kamap na lukim 7-pela krismas bilong en long 1986, em i go long skul long Igam Bareks we em i save i stap wantaim Difens Fos soldia papa na famili bilong en.

Long skul ol i save i gat spots de Bobby wantaim ol wan skul bilong en i save pilai ol kainkain spot olsem soka, ragbi lig, volibal na basketbal.

Bobby i no save laikim ol arapela spot.

"Long dispela taim mi save tok, ol arapela spot em bilong ol geligeli, na ragbi lig em fit nating olsem na mi save pilai ragbi lig," Bobby i tok.

Em i tok em i save brukim bun wantaim ol poro bilong en long wanem olsem wan-pela pikinini hailens, em i save laikim tru ragbi lig.

Tasol dispela i tenis tupela yia bihain taim Bobby i lusim interes long pilai ragbi lig na kalap i go na stat long pilai soka bihain long em i lukim 9-pela krismas bilong en.

Long dispela mak em i no stop. Em i mekim soka i kamap olsem nambwan spot bilong em.

Bobby i tok, "Olsem wan-pela liklik mangi long skul, mi save tren na pilai hat tru. Mi no save les long trening. Mi save mekim olsem igo igo na bihain long mi pinisim skul, mi joinim Difens soka klab na pilai long junia divisen bilong dispela klab insait long Lahi Soka Asosiesen stat long 1996."


Em i tok olsem wanpela yutiliti pilaia, em i save kamapim planti kainkain stail bilong pilai.

Mekim olsem i kam antap long 1997 na 1998 ol selekta bilong Lahi Soka Asosiesen i makim em long istap insait long junia skwat bilong dispela asosiesen we em i pilai raun long ol senta olsem Pot Mosbi, Madang, Wau/Bulolo, Ramu na Lae yet.

Na bikos long ol gutpela stail pilai bilong en, ol junia selekta bilong PNGFA i makim em long stap insait long PNG U/23 skwat we ol i raun igo daun long Nu Silan (NZ) na patispet long Junia U/23 Ocenia Taitel.

Bobby i tok long dispela Oceania Taitel PNG i no pilai gut long kamap na stap insait long top 3. Tasol dispela raun em i gutpela long wanem olsem wanpela mangi hailens em i pilai agensim ol pilaia bilong ol arapela ovasis kantri na em i kisim gutpela eksperiens long pilai soka wantaim ol.

## Player's Profile:



Name: Terry Kama

Nickname: Terence

Age: 20 yrs.

Village: Marane.

Province: Chimbu

Education: Grassroot.

Position: 7 (five-eight)

Team: Simbu Warriors.

Other favourite sports: volibal

Favourite drink: Coca Cola and Solo.

Favourite food: Rice & Besta tinned fish.

Favourite sportsperson: Markus Bai.

Best advice received from: Coach Bal Numapo.

Likes: Son Robert.

Dislikes: Drugs.

Ambition: Wear a Kumul jersey.

Other representative duties: 86 Junior Highlands Zone vs Australia Junior School boys.

If you had one wish: To be a good sportsman.

# Ol Bogenvil boksing opisel i mas risain olsem protes

WANPELA singaut i kamap nau olsem olgeta Bougenvil boksing eksekutiv wantaim PNG Boksing union i mas risain olsem protes long indai bilong yanpela boksa Tony Miriks.

Ol eksekutiv bilong boksing union em olgeta man Bougenvil stat long presiden i go long tresera.

Tonamen dairekta bilong PNG Boksing Union Clement Matona i tok Miriks em i dai long nait bipo long Olimpik Tos i kam long PNG. Miriks painim indai bihain tasol long em i kambek long Olimpik Gems boksing trials long Sidni, Australia.

Mista Matona i tok planti ol Bougenvil boksa i karim: nem bilong PNG long ovasis tonamen olsem Arafura Gems, Osenia Gems na Saut Pasifik Gems na indai bilong ol i no gutpela tumas.

"Indai bilong Miriks i olsem lukdaun pasin long ol pipel bilong Bougenvil husat i save makim PNG maski long

hevi bilong politiks nau," Matona i tok.

Em i askim presiden Steven Tsivele, vaispresident John Angamata, sekretari Olke na tresera Raphael Kora long lusim boksing na sapatim o joinim arapela ol spot.

Tonamen dairekta i tok planti ol boksa olsem John Aba na Howard Gereu tu i dai long semkain pasin. Gereu i dai taim ka i tainim tasol tripela arapela pasindia husat i go wantaim em i no kisim bagarap.

Matona i tok em i save go pas long lukautim boksing long Bougenvil na em bai traim oge-naisim toname wanem Solomon Islands na arapela Saut Pasifik kantri.

Em i tok em nau bai oge-naisim boksing olsem provinsal tonamen tasol na i no inap makim nesanel eksekutiv bodi, PNGABU.

Matona i tok long soim rispek na wari long ol Bougenvil boksa i dai, Bougenvil bai i no inap salim ol boksa long nesanel sempionsip bilong dispela yia.

# Chevron helpim liklik Aussie ruls

## AUSSIE RULS RIPOT

CHEVRON Niugini i givim K10,000 long Nesenei Kapital Distrik Ruls Futbol long ranim kompetisen bilong em long dispela.

Nem bilong kompetisen nau bai kamap olsem Chevron NCD Ruls Futbol competition.

Gavman na Pablik Afeas menesa bilong kampani, John Wagambie i givim dispela mani long presiden

bilong NCD Ruls Dominic Kaumu long Sarere moning.

Mista Wagambie i tok spot em wanpela rot we i ken bungim olgeta kainkain pipel wantaim. Em i toktok strong long ol yangpela i mas kamap long spot na pilai we ol i ken lainim gutpela pasin bilong pilai na disiplin.

Mista Kaumu i tenkim Chevron long gutpela helpim bilong em. Em i tok em bai yusim dispela mani

long traim bringim kamap gutnem bilong dispela spot na tu stretim haus pilai.

Long Sarere moning tu samting olsem 500 ol skulmangi i bing bung long Pikinini Pilai Spots De. Ol wanwan pilaia i bin baim K10 rejista fi na tu ol i kisim wanpela aussie ruls bal na kep.

Insait long dispela spot de, ol pikinini i laik ol sampela stail na teknik bilong pilai aussie ruls. I tru dispela spot i nogat planti

sapota, tasol spot ya i pulim tru lewa bilong planti ol yangpela mangi.

Kaumu i tok dispela program em ol i traim tasol long Pot Mosbi. Sapos bihain ol i painim aut i gutpela, ol bai traim na surikim i go long arapela provins.

Sampela ol pikinini i no kisim bal na kep, tasol ol ogenaia i laik ol i mas kamap long dispela kosing bilong ol mangi bikos em bai stap inap 10-pela wik olgeta.

# Kumul senta Gomia bai pilai gen

KUMUL senta David Gomia i no bin pilai ragbi long mun April i kam inap nau bihain long wanpela bagarap em i kisim long 1998.

Em i tok em bai pilai gen stat long neks mun bihain long em i kisim tok orait pastaim long wanpela speselist long bagarap bilong em.

Gomia i bin wanpela man husat i save pilai wantaim Hagen Eagles bipo long las yia.

Em i tok em laik kliaim tingting bilong ol man husat i ting bilong wanem na em i no pilai wantaim ol Maunt Hagen Eagles moa na sampela stori we i stap long niuspepa las wik ino tru na dispela i wok long bagarapim nem bilong em.

Gomia i tok: "Nogat wanpela man i toktok wantaim mi long wanem kain hevi mi gat. Wanem toktok i kamp i no bin kam long maus bilong mi," em i tok.

Em i no wanbel tru long dispela ol ripot i kam long niuspepa.

Gomia husat i bin stat pilai insait long PNG Kumul stat long 1993 i kam i bin tok wanpela bagarap em i kisim long rait han bilong em i givim liklik hevi long em.

Em i bin kisim dispela bagarap long 1998 taim em i go na traim pilai wantaim Brisbane Norths.

Em i bin go long hausik na ol dokta i katim han bilong em na putim wanpela ain insait long raithan bilong em.

Nau dispela yangpela man bilong Chuave i laik traim kisim tingting bilong ol dokta

long ol i ken rausim dispela plet (ain) nau o em bai pilai pastaim i go inap long pinis bilong dispela yia.

Bihain long dispela yia bai i gat Wol Kap resis i kamap long ragbi long Frans na England na em bai i no inap pilai long dispela yia sapos ol dokta i katim em long rausim plet long han na dispela bai stapim em long pilai wantaim ol Kumul tu.

Gomia i gat 29 krismas na mak bilong em i pinis long ragbi na dispela yia em i las sans bilong em long pilai long Wol Kap.

"Klostu bai mi pinis long pilai ragbi olsem na mi laik stap insait long dispela seleksen.

"Dispela Wol Kap i save kamap bihain long 5-pela yia na dispela yia em i las sans bilong mi," Gomia i tok.

"Olsem na dispela em i wanpela bikpela disisen mi mekim," em i tok.

Gomia i bin wanpela nupela pilaia insait long Wol Kap long 1995 taim Papua Niugini i bin pilai long England na ol Kumul i no bin stap insait long fainal bihain long ol i lus long Niu Silan long wanpela pul resis.

Dispela yia, Gomia i gat planti save long pilai insait long Kumul na wanpela strongpela man taim em i ron wantaim bai.

Em i bilip olsem sapos em i stap insait long tim bai tim i strong taim kepten Adrian Lam, Marcus Bai, David Westley na Bruce Mamando i kam insait long tim.



• Pikinini Pilai Aussie Rules program i kamap nau long Pot Mosbi. Hia yu ken lukim ol mangi Wardstrip Komyuniti Skul i amamas wantaim bal.

# Skul mangi helpim Cosmos long win

## PMSA RIPOT

WANPELA gutpela gem i bin kamap long Sarere we Cosmos i daunim biknem IBS PS Yunaited 2-1 long primia kik resis.

Na arapela tupela gem tu i bin kamap namel long Blu Kumuls na Yunivesiti. Ol plisman i bagarapim tru sindaun b'iong ol Blu Kumuls 4-0. Ol gol bilong Blu Kumuls i kam long biknem straike Steven Mune na Brian Tani.

Gem ya i bin rap liklik we planti ol pilai inap long kisim yelo na ret kat tasol referi Greg Smith i lukautim gut tru.

Gem namel long Cosmos em wanpela gutpela tru. Cosmos i wok long painim straike na askim yangpela Gari Moka bilong Sen Peters Anda 16 tim long lukautim fran lain.

Namba wan gem bilong Moka em taim em i bungim Rapatona. Em i bin kamapim gutpela gem na kosa Joe Turia na Francis Kupe i laik givim em sans.

Mista Turia i tokaut olsem em i yangpela boi tru tasol mipela i givim em sans long pilai long primia divisen.

"Mi amamas tru bikos Moka i soim olsem em i ken pilai primia soka," dispela em toktok bilong Turia taim Wantok i bungim em.

Insait long dispela gem, IBS Yunaited i go pas 1-0 long namba wan hap. Tasol insait long namba tu hap, Cosmos wantaim ol biknem pilaia olsem Desmond Waku, Roy Karang na yangpela Desmond Sow na Rodney Pulu, ol i blokim olgeta rot bilong PS Yunaited long surikim skoa.

Ol i pilai i go na Roy Karang i bekim gol wantaim wanpela gutpela penalti. Orait klostu long pinis bilong pilai, Gari Moka i sekim net bilong ol boi Sepik.

Ol arapela gem, Guria i nekim Kurti Andra 5-1.

Na long Sande, Rapatona i soim SP Brewery olsem ol i tu gut long winim ol 1-0. Dispela gem i bin kamap gut tru we tupela sait wantaim i pilai strong. I tru i gat sampela paul kik i kamap, ol biknem pilaia bilong tupela tim i lukautim gem na pinis gut.

Na long namba wan bikpela gem, Defence i nekim Wikila Tarangau 5-2. Defence i go pas wantaim skoa 5-0 long namba wan hap. Tasol ol boi

long Bomana i strong tru na kambek wantaim 2-pela gol.

Defence i tingting long surikim skoa i go antap tasol beklain bilong Tarangau i blokim olgeta rot.

Straika bilong Defence Steven Moany i putim tripela gol na arapela tupela gol i kam long Ikara Kanas na Michael Tobias. Na tupela pilaia i skorim gol bilong Tarangau em fulbek Peter Ruaba na Paul Umbio.

Stail mangi bilong Tarangau Eka Saxon tu i gat sans tasol em i save tanim na givim as tumas long bal ya. Sapos em i yusim gut het long pilai, ating em bai gat sans ya.

Ol pilaia i taitim bun long Tarangau em Jerry Malum, Boski Terang, Douglas Piska, Ruaba na Eka.

Na long sait bilong Defence, Vincent Wriken, Robin Sino, Selan Elijah, Joksy Chalapan and David Kaepapa.

Poin lata nau i sanap olsem ANZ Yunivesiti 24, SP Brewery 22, Rapatona 22, Defence 17, Cosmos 17, PS Yunaited 16, Babaka 10, Blue Kumuls 10, Wikila Tarangau 10, Tawala 9, Guria 8 na Kurti Andra 3

## Lahanis stapim win bilong Vipers

### PEKU PILIMBO i rattim

GOROKA Lahanis i soim pinis strong olsem ol i wanpela strongpela tim insait long SP Kap inta siti resis bihain long ol i dre wantaim Pot Mosbi Vipers 20-20 long las wik Sande long Pot Mosbi.

Lahanis husat i no winim wanpela gem i redi tru long memeim Vipers tasol ol i no laki tumas long Sande.

Ol Boi Goroka i kisim strong long Fatty Buka husat i yusim gut eksperiens bilong em long helpim tim i go pas 18-4.

Lahanis i brukim kiau taim fulbek Francis Seu i putim trai long wanpela bom i kam yet long Nime Kipo. Difens bilong ol boi Isten Hailens tu i gutpela stret na i givim hat taim tru long Pot Mosbi Vipers long skoa.

Senta bilong Lahanis Ivan Mosoka i skorim wanpela tryu na bihain poro bilong em long Vipers Jacob Kenosi-i bekim. Skoa nau i sanap Lahanis 12 na Vipers 4.

Fulbek Seu i skorim namba

### SP KAP RIPOT

tu trai long surikim skoa i go long 18-4.

Insait long namba tu hap, Vipers i skorim tupela trai i kam long Peter Sterlo na huka Michael Marum.

Referi i salim seken rowa Tai Onsie long sinbin na ol Vipers i yusim dispela long salim smok b'alus Simon Rumet long skoa. Poin bilong Vipers nau i 20-18. Dispela em sans bilong ol mangi Mosbi long win. Tasol ol yet i asua na givim penalti long Lahanis na ol i skoa long levelim skoa 20-20.

Insait long arapela gem, Enga Mioks daunim Simbu Angras 29-18, Rabaul Guria winim Waghi Tumbé 23-14, Mt Hagen Eagles nekim Lae Bombers.


Bihain long namba tri raun, Mioks i go pas wantaim 6 poin, Vipers 5, Rabaul Guria 4, Mt Hagen Eagles 4, Mendi Muruks 2, Simbu Warriors 2 na Waghi Tumbé and Lae Bombers i no rekotim wanpela poin.



**IKEN WOKIM GUTPELA SAMTING LONG YU**

Wik tu long Solomon Ailan hevi

# Honiara i bagarap



• Wilson em wangepa Malaita Igel Fos memba i sanap banisim Ela Motors kampani hap we ol i save salim ol ka. Ol papa bilong kampani ya i pret na i no moa wok i stap bikos long Solomon Ailan hevi we nau i abrusim tupela wik pinis. *Piksa i kam long Weekend Australian niuspepa.*

## Honiara, Solomon Ailan:

Hevi i wokim na klostu ikonomi bilong Solomon Ailan i go bruk daun olgeta. Ol beng i bungim hevi, planti man i no wok bikos ol i stapim ol taim hevi i stap, nogat bia bikos bruri o ples we ol i wokim dispela i pas nau i stap.

Tupela krismas i go, pinis, Solomon Ailan i bin wangepa gupela ples na ikonomi bilong em tu i bin wangepa gupela na helti wan. Tasol nau taim kantri i stap long hevi, ol paitman i bosim i stap biktaun Honiara, ikonomi i klostu bagarap olgeta. Ol hotel tu i klostu pas bikos ol no kism ol man na turis long ol long wanem ol i pret.

Praim Minista Bartholomeo Ulufa'alu li bin risain long las wik Fonde na lida bilong Solomon Ailan ku Andrew Nori i givim bek pawa i go long han bilong plis.

Ol ripot i tok Federel Gavman bilong Australia i laik helpim kantri i traim stretim hevi na em bin makim sinia Foren Afeas opisel Peter Baxter olsem spesel negosieta na tu salim nara-pela etvaise husat i gat gupela save long politiks bilong Solomon Ailan na hevi, Tony Reagan long helpim wantaim wok bilong stretim hevi ya.

Ol ripot i tok planti lain long Australia na Solomon Ailan i

wokim komplek olsem gavman bilong Australia i no wokim gupela pasin long evakuetim o rausim hariap ol lain bilong em husat i wok na stap long Solomon Ailans.

Ol i tok dispela i mekim planti Solomon Ailan pipel tu i paul na ol i ronawe i go long wan wan ples bilong ol.

Gavana bilong Sentrel beng long Solomon Ailan Rick Hou i tok hevi long sekyuriti we i wokim na planti ausait pipel na tu ol asples pipel yet bai skruim moa hevi long ikonomi bilong kantri.

Em i tok planti pipel i paul long pasin we Australia i salim kwiktaim ol lain bilong en i go aut long kantri. Em i askim tu wanem samting bai kamap long planti ol haus long taun we pipel i ronawe lusim na i nogat man i stap long ol o lukautim.

Lida bilong Isatabu Fridom Muvmen(IFM) Andrew Te'e i tok ol pipel i nogat samting bilong pret long en na lusim Honiara. IFM i gat samting olsem 1,000 memba long en na Mista Te'e i tok pablik long Honiara i noken pretim ol IFM lain bikos ol i lain bilong laikim gupela sindaun.

Tasol bihain gen long wangepa sekpoin, seketeri bilong IFM George Gray i bin tok. "bus i bilong mipela, Honiara i bilong mipela na mipela i ken go insait

long taun wanem taim mipela i laik na nogat man bai stapim mipela."

Samting olsem 300 man bilong Australia i stap yet long Solomon Ailan. Tasol ol i salim ol meri na pikinini i go long ples long nevisip HMAS Tobruk long las wik.

Ol ripot i tok maski ku lida Andrew Nori i lusim pawa na lo na oda long han bilong plis, ol MEF paitman i holim yet ol samting bilong pait.

Ol ripot i tok tu olsem long las wik, planti ol MEF i karim ol gan samting na spak raun lojg Honiara taun. Sampela bilong ol i belhat long ol nius ripot we ol niuslain bilong Australia i wokim na ol i tromoim ol tok nogut long ol.

Honiara i gat liklik lain MEF i holim ol strongpela samting bilong pait taim bikpela hap bilong ailan em ol Isatabu Fridom Muvmen lain i bosim.

Mista Nori i tok ol lain bilong em long MEF i wok wantaim plis long lukautim lo na oda long Honiara tasol ol ripot i tok long Fonde, ol MEF memba i wok long holim ol strongpela samting bilong pait na ol i spak raun amamas long rausim Praim Minista Ulufa'alu long sia bilong em.

## Nius long Fiji Hevi

### Fiji:

Ilekseen long kamapim demokrasi o fri gavman long Fiji i stap tupela krismas yet, ol bikman bilong Fiji ami we i lukautim kantri nau bihain long ehvi i bin kamap long las mun i tokim Komonwel Ministas grup we i stap long kantri bilong toktok wantaim ol lain husat i stap insait long Fiji hevi.

Tasol Foren Minista bilong Australia Alexander Downer i tok dispela i longwe tumas.

Em bin tok Ami bos Komodo Frank Bainimarama i bin tokim Komonwel grup insait long bung olsem bai ol rebel paitman na sapota bilong ku lida George Speight i no inap stap insait

long nupela sivilien gavman we ol bai makim long kism ples bilong Praim Minista Mahendra Chaudhry husat wantaim 30-pela arapela politisen em ol lain bilong Mista Speight i kalbusim i stap yet long Palamen, stat yet long Me 19.

Long ol ripot, ami we i wok long lukautim gavman long Fiji inap long ol i makim nupela sivilien gavman i tok ol bai bihainim yet malti resel mama lo we Mista Speight na grup bilong em i bin laik rausim long dispela hevi we i stap nau yet long Fiji.

Mista Downer i tok wok bilong Komonwel grup i no bilong larim fri ol kalabus politisen na Praim Minista Chaudhry tasol long

larim demokrasi i go bek long Fiji.

Long wankain taim tu, ol Difens Minista bilong Australia na Nu Silan i bin givim strongpela toktok i go long Fiji na Solomon Ailan long bihainim mama lo na demokrasi na noken bagarapim dispela tupela bikpela samting we i save holim gut kantri.

Tupela i tok ol i wari long hevi we i wok long kamap long rijen tasol tupela kantri i mas go bek long demokrasi na gupela gavman we ol pipel yet i makim.

Tupela minista i bin tok amamas long ol gupela toktok we i wok long kamap long traim stretim Bogenvil hevi.

## Memori bilong ol soldia bilong Amerika long Solomons



• Ol US Marines long Guadalcanal long Wol Woa II. *Piksa i kam long Weekend Australian.*

Bikpela pait i bin kamap long Guadalcanal Ailan long Wol Wo 2 we planti soldia bilong Japan na Amerika i bin dai long en. Piksa i soim memori bilong sampela soldia ya na namba wan long raithan em leit biknem Presiden bilong Amerika John F Kennedy husat i bin wangepa yangpela marin soldia long Guadalcanal long Wol Wo 2.

JF Kennedy i bin wangepa husat i stap long US nevi patrolbot "PT 109" taim em (bot) i bagarap na taim ol asples skaut we Moses Sesa na siks-pela arapela i wok long painim sapos i gat man i stap laip yet, ol bin painim dispela marin soldia husat i luk hangre na ol korel i katim em. Taim ol i askim husat em, em tok "Mi bilong Amerika na nem bilong mi em Kennedy."

Tasol i kam inap nau, Gavman bilong Amerika i no wokim yet wangepa samting long helpim Solomon Ailan.

Ol ripot i tok Guadalcanal Ailan em namba wan ples we ami bilong

Amerika i bin winim ol birua bilong ol em Japan long cikpela pait bilong Wol Wo 2, moa long 58 krismas i go pinis.

Ripot i tok long planti lapun bilong Amerika husat i bin pait long Wol Wo 2 long Pasifik, Guadalcanal i stap strong long memori bilong ol olsem ples bilong laip na dai, strong na win bikos em namba wan ples we ol soldia bin winim ol birua Japan ami.

Raita James Michener long buk bilong em i bin tok long planti bilong ol, Guadalcanal em i olsem samting i hat long eksplenim bikos ol save tokim ol olsem ol sodia bilong Amerika i no strong long pait tasol wanem samting i bin kamap long hap (Guadalcanal) na ol i winim birua em i bikpela samting. Na piksa ya i senisim pastaim tingting we ol i lukim olsem Amerika i sof tumas.

Ol ripot i tok nau yet Amerika i wok long lukluk long ol hevi long Korea. Midel Isna ol no wokim wangepa samting yet long helpim daunim hevi long Solomon Ailan.

## Empres bilong Japan i dai

### Tokyo:

Empres Nagako bilong Japan i bin dai long las wiken.

Empres Nagayo husat i gat 97 krismas em wido bilong leit Empera Horihoto bilong Japan.

Empres i bin sik na bungim hevi long kism win long Trinde nait long Impiriel Pales we ol famili bilong em i stap long en na lukautim em i stap.

Empera Hirohito i bin wangepa bikman bilong Japan inap em i dai long 1989.

Em i mama bilong sevenpela pikinini na Empera Akhito i wangepa long ol.

## I stap insait long famili

### Japan:

Yuko husat i gat 26 krismas i laik sanap olsem Liberel Demokratik Pait kendidet.

Japan bai holim Nesenel Ilekseen long dispela wiken.

Mis Obuchi i laik sanap resis long sia bilong papa husat i bin dai long stat bilong dispela yia. Meri ya i tok tru em no bin gat laik long joinim politiks tasol laik i kamap na go strongpela taim em i tingim papa bilong em.

Bubu man bilong em Mitsuhei Obuchi i bin wangepa politisen na em bin bosim kantri inap long 1963 na pikinini bilong em, Keizo Obuchi papa bilong Yuko i bin bihainim em.



• Yuko Obuchi, pikinini bilong leit Praim Minista Obuchi bilong Japan i tokaut long resis long ilekseen. *Piksa i kam long Weekend Australian niuspepa.*

# Tupela brata amamas wantaim bebi meme

## Mozambique, Afrika:

Wol Visen em wanpela Non Gavman Ogenaisesen grup i givim helpim long karimaut sampela projek long Mozambique

Wol Visen em i wanpela long ol NGO husat i go pas long helpim moa long 70 milien pipel insait long 100 kantri egens long poveti o pasin bilong stap trangu, hangre na pasin bilong lukim narapela olsem pipia manmeri (injustice).

Taim ol bikpela birua i kamap, Wol Visen i save givim helpim olsem dispela we i bin mekim long Aitape bihain long sunami long 1998. Tasol eria bilong em tru tru em long givim sapot long sait bilong wok developmen

Bihainim hevi na wo, Mozambique i holim nem olsem trangu kantri stret long wol. Taim hevi i bin slek na gutpela sindaun i kam bek long kantri long 1992 na ol pipel i stat long go bek long ples, ol no lukim wanpela gutpela samting bikos olgeta haus na ol kes krop na ol arapela samting i bin bagarap.



• Amimo Alfredo na liklik brata bilong en Rabilu wantaim bebi meme bilong ol. Piksa i kam long *Developmen megesin*

Tasol Wol Visen i bin kisim helpim mani i kam long gavman bilong Inglen long helpim samting olsem 26,000 fama famili.


Wol Visen i wok wantaim Agrikalsa Minista bilong

Mozambique na ol i trenim na helpim ol pipel husat i wok patna wantaim ol insait long ol komyuniti long ol ketel na krop fam.

Lukautim gout em wanpela projek long Mozambique we Wol Visen i kirapim na sapotim.



• Naispela piksa.... Tasol solwara i wok long karim graun olsem dispela piksa long wanpela hap nambis long Mozambique i soim. Dispela samting i wok long kamap long planti hap, ino long Mozambique tasol. Wara i wok long karim graun na klostu diwai ya bai raus olgeta. Piksa i kam long *Developments megesin*.



• Korea Taidel Flets long wes kos, i stat long Kanghwado ailan i go olsem long Shinan Chollanam-do provins.

# Ol Taidel Flets bilong Korea

Ol Taidel Flets long Korea i save sapotim na givim kaikai long planti pipel husat i stap klostu long en bikos long Nu Yia inap long Krismas, ol pipel i save kisim ol kaikai na abus bilong wara na soleara long en.

Flet tais graun long Korea i karamapim samting olsem 280,000 hekta (280 kilomita longpela na 30 kilomita waid). Rot we dispela flet taisgraun i kamap long en em ol graun we sampela ol bikpela wara long Asia na tait bilong solwara i save tromoim long en. Flet taitgraun eria i save sapotim planti pipel tru long Korea. Ol bikpela wara long Asia olsem Tangtze na Yelo Riva bilong Saina na Hangang wantaim

Kumkang bilong Korea i save karim milien tan graun i kam long ol maunten na fil na tromoim i go long soleara. Bihain long dispela, solwara long hai na lo tait i save karim na tromoim ol graun long nambis na long Korea, flet taisgraun em hap we dispela ol gutpela graun i pulap long en.

Taim wara i go daun o lo tait olsem ol i save kolim, ples i flet na i luk gut tru. Na ol kuka bai ron i go i kam, ol selpis i ol pisin tu sampela we i save kam long ol long-




• Ol yangpela ya i pilai wantaim graun malumalu tais o mad long Poryong, Ch'ungch provins. Ol piksa i kam long *Pictorial Korea megesin*.

long en.

Long wanpela skwea kilomita eria bilong flet tais graun, Korea i save kisim samting olsem US\$2 milien long sampela ol selpis na klem-sel olsem Rasa Klem. Long sama planti tausen pipel i save go long taidel flets.

Ol tiadel flets i hap long naispela piksa bilong Korea na i givim gutpela kaikai long bel na lewa bilong ol milien pipel husat i save kaikai long ol kuka, siwit, selpis na ol arapela kaikai bilong solwara

• Wanpela fisamen i kisim urita we i no bin go bek long wara taim haiwara i kam bek long taidel flets.



• (Daunbilo): Ol fisamen i painim ol kaikai olsem ol selpis, ol kuka na ol arapela kaikai bilong solwara long ol taidel flets eria.



# LAI PSTAIL

## Yus pipel long Kabwum i kamapim Wanbel

*'Wanbel bilong Yus, em strong bilong Yus'*

### YAKAM KELO i raitim

**L**ONG het bilong bikpela maunten namel long boda bilong Madang na Morobe provins i gat wanpela bikpela ples i stap ol i kolim Isan. Ples Isan i slip long het bilong traipela maunten tru we planti arapela maunten i raunim em na ol pipel i ken lukluk i go daun long solwara na Madang na Lae siti.

I nogat rot bilong ka i go na ples i longwe tru long ol taun na stesin na i hat tru long kisim ol gavman sevis bikos ol bikpela bikpela maunten i stapim rot bilong ol samting long go long Isan pipel.

Ol pipel i stap yet long pasin bilong tum-buna na ol i holim strong yet dispela pasin i stap. Ol i namba wan manmeri tru long pasin bilong ol bikos save bilong ol em long mekim gutpela pasin long arapela na serim samting wantaim arapela na toktok gut long arapela. Stori bilong Baibel i pulap tru long save na tingting bilong ol na taim ol i stori wantaim yu, ol bai givim tok piksa i go bek long stori bilong buk baibel.

Ples i kol tru tasol em i gat isi laip tu long ol manmeri ya. Ol i no save go longwe long mekim gaden bikos graun i pulap tru long gris na ol i save planim kaikai long wanpela gaden tasol olgeta taim. Taim ol i rausim kaikai, ol i save planim nupela kaikai long dispela gaden gen.

Isan ples i stap insait long Kabwum ilektoret long Morobe provins, klostu long Teptep stesin. Teptep stesin em boda bilong Madang na Morobe provins na em i olsem 10-pela minit long balus i go long ples Isan. Ol asples i tok long Teptep stesin, hap bilong ples balus em Morobe na hap em Madang. Haus sik na skul i stap long Madang sait na maket i stap long Morobe sait.

Ol pipel bilong Isan i save wokabaut olsem 4-pela de olgeta i go long Kabwum stesin. Ol i mas slip long rot na bihain kirap wokabaut i go olgeta long Kabwum stesin sapos i gat ol bikpela toktok bilong mekim long gavman o sampela hevi ol i laikim gavman i luksave long en.

Long maket, em i hat olgeta long ol i salim ol kaikai bilong gaden. Olsem na ol i save wokabaut olsem wanpela de olgeta i go daun long Wantoat stesin o nogat ol i save wokabaut tupela de olgeta i go daun long Leron bris maus rot na salim ol kaikai bilong gaden.

Yus lokol gavman kaunsil em i olsem kaunsil eria bilong 22 ples olgeta we Isan ples em wanpela long ol. Ol i gat 7-pela komyuniti skul na 7-pela klinik i stap olsem gavman sevis bilong ol dispela lain maunten pipel bilong Kabwum distrik. Na sampela wokmanmeri bilong gavman i stap long sevim ol pipel long hap. Yus lokol level gavman kaunsil em nupela kaunsil eria we i bin kamapim insait long nupela rifom sistem bilong nesenel gavman long 1996.

Taim mi bin kamap long ples Isan wantaim Gavana bilong Morobe provins Songang Luther Wenge na namba tu het bisop bilong Luteran Sios Mista Matoro, mi pilim oldrm mi gat strong. Bikos ol bikman bilong gavman na sios i kam wantaim mi long dispela bikpela maunten ples.

Insait long 2 ensin balus bilong North Coast Aviation mi sindaun klostu wantaim Gavana Luther Wenge na em i wok long soim mi ol ples stat yet long Erap eria na i go kamap long Isan. Gavana Wenge i bin raun bipo long ol dispela bus ples olsem na em i save long ol hap ya.

Pasin bilong ol dispela maunten pipel i gutpela na isi laip bilong ol. Olsem na insait long bikpela de ol i kolim 'Wanbel De' long Jun 14, 2000 ol i kilim pik na wokim kaikai na amamasim dispela de wantaim ol skul pikini-

ni bilong ol. Dispela 'Wanbel De' i kamap bikos i bin gat bruk bruk namel long ol pipel bilong Isan long taim bilong 1997 nesenel ileksen. Long 1997 nesenel ileksen, ol pipel i bin bihainim kainkain kendidet long kempen bilong ol na bihain long nau memba, Ginson Saonu i win, ol kendidet i go bek nabaut long hap bilong ol na ol pipel bilong Isan i sindaun bruk i stap namel long ol yet.

Wantaim dispela tingting bilong bungim ol bek, memba bilong Kabwum, Ginson Saonu i kamapim dispela rot bilong wanbel gen wantaim narapela na lusim tingting long bruk bilong plitiks ya. Het tok bilong dispela wanbel em; 'Wanbel bilong Yus em strong bilong Yus.'

Mista Saonu i bin tokaut olsem dispela Wanbel De em i gutpela bilong ol pipel long sindaun bilong ol yet insait long ples na komyuniti. Taim ol pipel i wanbel na sindaun gut wantaim, ol gutpela wok i save kamap. Sevis bilong gavman bai i go isi long ol pipel bikos ol i sindaun gut wantaim. Wok bilong sios o wanem kain wok bilong ol yet bai i go gut bikos ol pipel i sindaun wanbel na amamas wantaim.

Mista Saonu i tokim ol pipel bilong em olsem Wanbel em as bilong planti bikpela na gutpela samting long kamap.

Mista Saonu i tokaut tu olsem dispela hap bilong Isan em i bus na maunten ples tru. Na ol pipel ya i no luksave yet long planti nupela samting bilong taun na siti. Olsem na em i bikpela samting long ol pipel i mas stap gut wantaim bai ol i ken skelim gut ol nupela pasin na ol senis we inap kamap bihain. Na ol i ken kisim o rausim ol dispela senis

mas bung wantaim nau bai ol dispela wok i ken go het gut.

Em i tok Mista Saonu i no pret long dispela bruk pasin we i stap pinis. Em i kam insait tru long dispela bruk na ol i sem tru long em. Olsem na ol i sori na wanbel long em. Ol i soim dispela sori na wanbel bilong ol long memba wantaim wanpela pik.

Insait long ol pilai ol skul sumatin i bin putim kamap, ol elementeri sumatin i bin soim ol naispela danis na wokabaut mas

bilong ol. Tisa bilong ol i toktok long tokples na ol sumatin i mas bihainim. Ol i singsing long tokples bilong ol na brukim kundu wantaim.

Long taim bilong pulim flak bilong Papua Niugini i go antap. Ol i singim bikpela song bilong kantri long tokples bilong ol na mekim prea long tokples bilong ol.

Dispela i bin wanpela naispela de tru we i pulim tingting na bel bilong ol papamama na ol visita tu wantaim.



• Isan ples balus i stap antap tru long het bilong maunten. Sait sait em ol bikpela maunten i raunim. Ol foto: Yakam Kelo.



• Ol elementeri skul mangi i mekim ples i lait wantaim ol stail bilas na singsing long dispela wanbel de long las wik Trinde.

bihainim laik na tingting bilong ol yet.

Namba tu bisop bilong Luteran Sios Reveren Matoro i tok 'Wanbel' em pasin bilong God. God i laik wanbel wantaim ol pipel bilong em. Olsem na dispela Wanbel De bilong ol Isan pipel i no abrus. Em i bihainim laik tru bilong God. God i olgeta taim laik wanbel wantaim ol manmeri bilong em.

Wanpela bikman Thomas Boti i tokaut olsem long 1997 nesenel ileksen, ol lain bilong em long taun olsem Lae i bin go brukim ol manmeri wantaim kendidet bilong ol. Tasol nau ol i luksave na mekim bikpela tok sori long memba Ginson Saonu na ol i laik stap pas wantaim memba bilong ol. Em i tok ol pipel bilong Ginson Saonu na ol Isan pipel em ol wanpela lain tasol. Tasol ol i bruk i bikpela hevi tru na nau ol i laik bung na wanbel wantaim Saonu na ol lain bilong em.

Narapela bikman bilong Isan ples Robin Yalep i tokaut tu olsem ol i sori long bruk pasin ol i bin kamapim bipo na nau ol i laik tok sori na wanbel wantaim memba Ginson Saonu. Mista Yalep i tok ol i gat ol gutpela wok na progrem i stap pinis olsem na ol i

Stail bilong ol sumatin tu i narakain na ol bikman i amamas tru long lukim na dispela i mekim 'Wanbel De' bilong ol Isan pipel i kamap nais tru.

Long soim amamas bilong Morobe gavman, Gavana Songang Luther Wenge i givim K2,000 i go long helpim elementeri skul bilong Isan na memba Ginson Saonu i tokaut olsem K10,000 i redi pinis bilong nupela klasrum bilong Isan. Taim Distrik Edministreta i pinisim ol pepa wok bai dispela mani i ken go long helpim Isan komyuniti skul.

Mista Saonu i tokaut tu olsem mani bilong ol arapela projek long Yus lokol level gavman eria i redi na ol bai kisim taim distrik edministreta i stretim ol pepa wok bilong ol dispela projek.

Moa long 2000 manmeri i bin kamap long lukim dispela bikpela de bilong ol, ol i kolim 'Wanbel De'.

Ol bikman na arapela manmeri long arapela ples i kam tu long ples Isan long lukim dispela 'Wanbel De'.



• Lapun Mosarika (raithan), lida bilong Isan ples i sekan long memba Ginson Saonu na wanbel long ol pipel bilong em bai wok bung wantaim memba.

# Betanok pipel long Westen Provins i planim rais

**WENCESLAUS MAGUN i raitim**

Ol pipel bilong Betanok ples samting olsem 8 kilomita long boda bilong Papua Niugini na Indonesia insait long Westen Provins i no moa wetim gavman long go helpim ol. Ol yet i go het long helpim ol yet olsem ol tumbuna bilong ol i bin mekim bipo. Dispela taim, ol i kirapim rais projek.

Pastaim long mi stori long dispela rais projek, mi laik stori liklik long wanem ol sevis i stap insait long dispela ples na dispela ol sevis i helpim amas pipel.

Olsem mi tok antap, Betanok em i stap klostu long boda bilong PNG na Indonesia insait long wod faiveria bilong Ningrum Lokol Level Gavman, wanpela sab distrik bilong Kiunga long Westen Provins.

I gat samting olsem 100 famili i stap long Betanok. Betanok em i wanpela Katolik misin stesin. I gat ples balus, skul na helt sevis long Betanok we ol pipel i save kisim. Tasol i nogat rot bilong ka long Betanok i go long Kiunga o Tabubil na ol ples klostu olsem Okbrim.

Sapos ol pipel bilong Okbrim o Betanok i laik go long Tabubil em bai kisim samting olsem tripela de wokabaut. Na long go long Kiunga em bai kisim samting olsem wanpela de wokabaut.

Ol pipel bilong Betanok na Okbrim i save yusim saksak olsem namba wan kaikai bilong ol. Wantaim saksak i gat ol arapela kaikai bilong gaden tu olsem taro, yam, banana na kaukau.

Betanok em i stap long welbus na olsem ol i no sot long kaikai na kumu bilong welbus. Ol i yusim tu welbus long kisim marasin na welabus na pis long abusim kaikai bilong ol.

Tru tumas ol i holim strong tru pasin tumbuna na kalsa bilong ol. Bilip Kristen tu i go insait long Betanok na Okbrim na olsem ol pipel i bihainim bilip Kristen. Wanpela bikpela trenspot sistem bilong ol em wara.

Long las mun, Dairekta bilong Melanesian Envairomen Faundesesen, Reveren George Euling i bin go long Okbrim na

bungim ol pipel long dispela hap insait long wanpela wokabaut bilong wok bilong em.

Em i toktok wantaim ol pipel

Mista Wissinck i tok em i go daun long Lae, na kisim 6-pela kain rais long Trukai Industri long Erap na i go antap long Betanok

na skulim ol pipel long planim gut rais. Mista Wissinck i tok, ol dispela rais i no inap kisim ol sik nogut.

Ol i tok, ol pipel long ples i wokim masin bilong rais long diwai na i save rausim skin bilong rais. Bihain ol i save seksekim rais long basket kanda na rausim skin bilong rais long rais. Ol i save yusim skin bilong rais olsem kaikai bilong kakaruk na kukim rais long kaikai.

Dispela agrikalsa opisa bilong OTML i tok, nau yet OTML i yusim Betanok rais fam long bringim ol komyuniti lida, ol yut na meri grup i go long Betanok na lukim pasin bilong planim rais.

Em i tok OTML i wok bung wantaim ol agrikalsa opisa bilong gavman long skulim ol pipel bilong Kiunga long stori bilong rais i bin stat olsem wanem, na pasin bilong planim, kamautim na kukim rais.

Mista Wassinck i tok nau yet OTML i tingting long baim masin bilong rausim sel bilong rais (rice huller machine) long Taiwan o Indonesia. Em i bilip OTML bai baim dispela masin na bringim i kam long PNG na givim ol pipel bilong Betanok long pinis bilong dispela yia.

Narapela bikpela stori i go wan-



• Wanpela meri i yusim basket long rausim sel bilong rais.

bilong Okbrim na painim aut long wanem kain rot ol i bin bihainim long planim rais. Ol dispela stori, Reveren Euling i bungim na stori liklik long mi na nau mi raitim.

Mi bin kisim sampela moa stori bilong dispela rais projek long David Wissinck, agrikalsa menesa bilong Ok Tedi Mining Limited (OTML) na wanpela opisa bilong em David Norbert.

Reveren Euling i tok, long 1997, taim bikpela san i bagarapim Papua Niugini, wanpela man bilong Okbrim klostu long Betanok, nem bilong em Gosmas i bin go long Merauke, wanpela ples long Indonesia na kisim sampela pikinini rais i kam long sait bilong ol na planim.

Dispela rais i gro gut tru na ol pipel bilong Okbrim i soim bikpela laik long planim rais. Olsem na ol i go lukim Mista Wissinck, long helpim ol.

Mista Wissinck i tokim mi olsem, taim em i lukim ol i soim bikpela laik long planim rais, na ol pipel yet i go pas long kirapim dispela projek, em i amamas long sapatim ol.



• Wanpela man Okbrim i memem rais long rausim sel bilong rais yusim diwai masin.

Em i tok las yia, ol agrikalsa opisa bilong OTML i bringim ol dispela 6-pela kain kain rais i go long Betanok na stat long planim. Em i tok ol i bin salim sampela pikinini rais i go bek long Erap long testim sapos i gat sik o nogat na tes i soim olsem i nogat sik.

Wanpela agrikalsa opisa bilong OTML i tok, long Januari las yia (1999) OTML i bin givim ol pipel bilong Betanok ol dispela 6-pela kain kain rais long stat planim.

Em i tok long dispela yia, ol i go het long planim rais.

Em i tok, long 1999, ol i bin planim i no moa long wan hekta bilong gaden rais. Tasol long dispela yia, dispela opisa i tok, samting olsem 50 famili moa i soim laik na gaden rais i surik i go antap moa long wan hekta.

Mista Wissinck, dispela agrikalsa opisa, na Reveren Euling i tok, wanpela hevi i wok long bungim ol pipel bilong Okbrim na Betanok, em i olsem, i nogat gupela masin bilong rausim skin bilong rais.

taim dispela rais projek em i olsem, aninit long tok orait bilong OTML na gavman, OTML i no gat wok bilong lukautim ol pipel insait long Betanok eria. Long wanem, ol i no stap insait long eria bilong main (preferred area). OTML i ken givim wok long ol tasol sapos i nogat inap wok em i no wari bilong OTML.


Stori bilong OTML i helpim ol pipel bilong Betanok na Okbrim em i wanpela bilong planti ol sevis OTML i go ausait long eria bilong wok bilong ol long helpim ol pipel long ples.

Long dispela as, Reveren Euling i givim bikpela tok tenkyu long OTML na ol wan wok bilong Mista Wassinck long helpim ol pipel bilong Betanok na Okbrim.

Reveren Euling i singaut i go long gavman long sapatim ol lokol pipel bai ol i ken stretim sindaun bilong ol long ples long ol kain projek we i ken lukautim laip bilong ol long longpela taim i kam bihain



• Dairekta bilong Melanesian Envairomen Faundesesen, Reveren George Euling i bungim ol pipel bilong Okbrim na kisim stori bilong rais projek. Foto: Reveren Euling



# Snek i kamap man

Nau wanpela man i go singautim dispela snek Kama Kama. Na wantu dispela snek i harim dispela man i singautim nem bilong em.

Taim dispela man i ron i go daun long step. Na ola man dispela traipela snek i ronim dispela man i go daun long step ya. Ol bikpela lain man ol i paitim snek na kilim em i dai. Na ol i kisim i go long ples bilong ol. Nau ol meri i go kisim kaukau, banana na kapis. Na man bilong ol i karim dispela bikpela snek i dai pinis. Na sampela man i brukim paiawut.

Na sampela ol i mumum ston na ol meri saping kaukau. Ol man i mekim paia na putim ston antap long paia.

Na dispela snek ol i mumum long ston na bihain ol i rausim na kaikai. Tasol man man, dispela gris bilong snek i no liklik, moa moa yet. Tasol i manmeri i mekim save i go. Na ol i kaikai gris wantaim bel bilong em na ol i slip.

Tasol dispela snek long nait ya em i joinimbek gen. Orait em i joinim pinis na em i go ausait na i brukim wanpela bikpela diwai na brukim em

olgeta na em i go raunim olgeta haus

Na bodi bilong em i mekim strong na olgeta haus i bruk i pundaun. Na olgeta manmeri i slip long dispela haus ol i dai pinis wantaim.

Nau em i kilim olgeta manmeri pinis na em i wokabaut i go bek long maunten Tonaiya. Na em i stap yet long dispela maunten Tonaiya. Em i stap.

**Kevin Koatana B**  
**Wempango Viles**  
**Gulf Provins**



**Nem:** Marthina Bashan  
**Krismas:** 19 (meri)  
**Adres:** C/- Daan Janggro, Lae Sport Store, P.O. Box 2198, Lae, Morobe provins  
**Save laikim:** Go lotu, harim gospel musik ritim baibel, pilai soka na kaikai buai

**Nem:** Jeffrey Sam  
**Krismas:** 17  
**Adres:** Badili Vocational Training Centre, P.O. Box 177, Badili, N.C.D  
**Save laikim:** pilai soka, go waswas long nambis na harim rege musik.

**Nem:** Sharon Nohu  
**Adres:** Marianhill Primary School, P.O. Box 59, Wau Morobe provins  
**Save laikim:** Harim musik, kukim kaikai, pilai basketbal na rait i go long penpal. Yu ken man o meri. Krismas bilong yu mas 13 o 14. Mi promis long rait bek long yu olgeta taim.

**Nem:** Gimsie Geacsu Katu  
**Krismas:** 22 (meri)  
**Adres:** Yapalingan Village, F.M.B.S, Wantoat  
**Save laikim:** Volibal, stori, raitim leta long ol penpren, harim banel stori na baibel sering.

**Nem:** Lisa Gaecsa Macks  
**Krismas:** 20 (meri)  
**Adres:** Kwan-an Group, Yapalingan Village, F.M.B.S, Wantoat  
**Save laikim:** Basketbal, volibal, kuk, go lotu na stori wantaim ol pren.

**Nem:** Melton Rimbo  
**Krismas:** 20 (man)  
**Adres:** P.O. Box 5722, Boroko, NCD  
**Save laikim:** Go lotu, ritim baibel, harim gospel musik na mi gat bikpela intres long mekim pren wantaim meri long Papua Niugini.

**Nem:** Julius Henry  
**Krismas:** 17 (man)  
**Adres:** Friend of Environment and Natural History, P.O. Box 192, Madang provins  
**Save laikim:** Harim musik, pilai sport, raitim pas long pren, go lotu na save bekim pas.

**Nem:** Joseph Kolo  
**Krismas:** 18 (man)  
**Adres:** Turama Forest Industries Limited, P.O. Box 184, Port Moresby, NCD  
**Save laikim:** Ritim baibel, harim musik, pilai basketbal, ragbi tas, lainim nupela song nabaut na lukim gutpela samting long camp.

**Nem:** Kruse Melton  
**Krismas:** 19 (man)  
**Adres:** P.O. Box 5722, Boroko, NCD  
**Save laikim:** Go lotu, harim tok bilong God, singim ol gospel singsing mekim prea long bikpela long helpim yumi raitim pas long ol penpren na prenim wanpela meri Papua Niugini

**Nem:** Miss Angelina Asantewaa  
**Krismas:** 24 (meri)  
**Adres:** P.O. Box CC556, Cape Coast, Ghana, West Africa  
**Save laikim:** Raun, bungim ol poro, na kuk

**Nem:** Miss Philomena Amoah  
**Krismas:** 25 (meri)  
**Adres:** P.O. Box CC556, Cape Coast, Ghana, West Africa  
**Save laikim:** Sports, swim, kisim potosna raun.

**Nem:** Tindix 7 Isua  
**Krismas:** 20 (man)  
**Adres:** C/- Nickson TK, Malama Hardware, P.O. Box 94, Kimbe, WNB  
**Save laikim:** Pilai musik, prenim wantok, laikim olgeta,

**Nem:** Nickson TK  
**Krismas:** 17 (man)  
**Adres:** Koyabu Community School, P.O. Box 17, Pangia, Sauten Hailens provins  
**Save laikim:** Wok gaden, laikim olgeta, musik na danis.

**Nem:** Yakili Loraima  
**Krismas:** 20 (man)  
**Adres:** Koyabu Community School, P.O. Box 11, Tripini, Pangia, SHP  
**Save laikim:** wok, hairm musik, stori tumbuna, laikim olgeta pren na pilai.

NAU dispela em i stori bilong maunten Tonaiya. Wanpela snek tasol i slip long dispela maunten. Dispela snek nem bilong em i Kama Kama i stap long maunten. Dispela snek i save kilim man na kaikai. Na sampela taim snek i senis na kamap man na pilai wantaim ol meri. Em i save mekim olsem i go.

Tasol wanpela taim wanpela meri i go long gaden bilong em. Na dispela snek Kama Kama i lukluk i go daunbilo na i lukim wanpela meri i kamautim kaukau long gaden. Em i lukim ya i go daun na i kmap long tarangu meri k kamautim kaukau long gaden bilong em.

Tasol dispela snek i senisim kamap man pinis na meri i ting olsem em man. Na meri ya i lukim dispela i gutpela man tru. Tasol snek i tokim meri olsem gutde long em.

Na meri i bekim gutde long man. Na snek i tokim meri olsem: "Mi laikim yu, na meri i tok orait. Nau snek i tokim meri olsem em i laik sindaun antap long yu. Na turangu meri i slip na snek i sindaun antap long em. Tupela i pilai i go na snek i laik i go na kis long meri ya.

Na snek i go. Na turangu meri i slip i stap na kirap lukim snek i wokabaut i go.

Nau meri tingting planti i stap na bihain em i go long ples bilong em. Na em i tokim man bilong em na pipel bilong ples bilong em tu. Na meri i tokim man bilong em olsem maunten Tonaiya i kam na toktok wantaim mi na i go. Tasol ol man i save snek bilong maunten Tonaiya i kam na toktok wantaim em. Ol i laik go tasol tudak na ol i slip.

Long moningtaim tru ol i wokabaut i go long maunten Tonaiya. Ol i kamap long dispela maunten. Nau ol i karim diwai na mekim step pinis, orait ol man i was long haphal.



## Mi wari long gro bilong mi

Mipela i luksave olsem yu wari bikos gro bilong yu i liklik taim ol arapela poro bilong yu i bikpela. Bai yu kirap nogut olsem ol lain wantaim bikpela gro i gat wankain wari bikos ol man i wok long lukluk tumas long ol.

Sampela lain i save wari long yau bilong ol i bikpela, sampela i wari bikos kela i kamap taim ol i yangpela yet na ol kain samting moa olsem. Yumi i no wankain bikos yumi gat ol kain sais, kain lukluk na yumi i no kamap olsem we yumi i laikim.

I gutpela long yumi i wokim eksasais na kaikai ol gutpela kaikai. Tasol sapos yu wanpela bun nating man o meri, i moabeta long luksave long en bikos bai yu save stap olsem yet.

Tasol pilai na eksasais, moa yet weit lifting o karim ol strongpela samting bai strongim bros na ol masel bilong yu. Ron na ron long wilwil bai stromngim lek na swim atletiks bai helpim yu tu.

Ekstra kaikai i ken helpim sampela long putim moa skin. Sapos yu stap long skul na kaikai long mes, bai em i hat bikos yu no gat sans long makim ol kaikai yu laikim. Olsem na sapos yu go long haus long

wiken o skul malolo. kaikaim ol dispela (kaikai) we yu laikim olsem kumu, kiau, mit, kaukau, rais na ol arapela moa we bai strongim bel bilong yu.

Ol dokta i tok em i gutpela moa long stap bun na i no fatpela. Ol bun lain i save gat longpela laip na ol i fit moa winim ol fatpela pipel husat i save kaikai tumas na kamap ovasais.

Noken wari taim maus gras i kamap nau. Em i nomol long manki i gat 16 krismas long gat maus gras. Long sampela manki, ekstra bodi gras i save kamap hariap na long sampela em save kamap bihain. Tasol i nogat samting we yu o mi i ken mekim long stapim gras long gro. Yu ken rausim mausgras wanpela taim insait long wanpela wik o moa sapos yu laik. Tasol planti manki i save amamas long maus gras bilong ol bikos dispela i mekim ol i luk olsem ol i bikpela man.

Sapos olsem wanem, yu ken toktok wantaim ol arapela sumatin o hauslain na kisim tingting bilong ol long dispela samting.

**Laiplain**



**LAIPLAIN**

### Dia Laiplain

Mi gat 16-pela krismas tasol mausgras i stat pinis long gro na mi les. Mi no laikim bikos mi liklik yet na mi bun nating. Bai mi stapim mausgras long gro olsem wanem?

Mi save wokim planti eksasais tasol mi no putim bikpela skin liklik yet.

Bai mi wokim wanem na kaikai wanem long gat bikpela masel olsem sampela ol arapela wanklas bilong mi.

### HOW TO GROW

**Dia Pren**



**Morobe Provinsal Gavman**

Morobe Provinsal Gavman em i was papa bilong Morobe Sevings na Lons Sosaiti;

- Em i givim mani long Sosaiti long karimaut wok olsem:
- (a) Peim ol wokmanmeri long lukautim wok bilong sosaiti.
- (b) Peim Opis Rent bilong Sosaiti.
- (c) Peim ol arapela ekspens bilong Sosaiti olsem ol pepa bilong opis, opis masin na ol tebol na sia.
- (d) Peim wok long bringim wok bilong Sosaiti we bai i ken kamap klia long ol manmeri long asples.
- (e) Gavman bai peim wok long bringim na kamap benk klostu long ol asples.

**Wok kamap long Sosaiti Stat long mun Mas 99 inap Mas 2000**

Namba bilong ol memba long Ssoaiti 2,526  
Sea mani ol memba bungim

K 802,000.00  
Namba long ol dinau Sosaiti givim 1,671  
Hap dinau mani stap long han bilong ol memba K 457.652.00  
Strong bilong mani ol memba bungim K1.013.109.00

Sosaiti tokaut long wok bilong givim dinau:  
Brukim ol dinau stat long man Jan 99 i go Mas 2000  
(a) Ekonomik Developmen - 1020 lons K 371,365.00  
(b) Sosel Developmen - 425 lons

# Morobe Sevings na Lon Sosaiti

## Stia tok "A2000" na kaikai bilong tingting

Mipela ol Bod ov Dairekta bilong Morobe Sevings na Lons Sosaiti i makim pinis Edukesen Komiti. Tripela dairekta na Pablik Rilesen Opisa bilong Sosaiti i kamapim ol memba bilong dispela komiti. Dispela komiti bai mekim na karim aut wok long tok save na givim stia long ol memba. Bai o i mekim dispela wok na yusim redio, niuspepa na TV na tu ol bai yusim stia tok "2000" niuspepa bilong sosaiti long toksave na tu skulim olgeta memba na ripot long Morobe

provins.  
Edukesen komiti bilong sosaiti i laik ol memba i mas kisim stretpela na gutpela tok klia long wok sosaiti i wok long mekim long dispela taim stat long Mas 1999 i kam inap long Disemba 1999. Toktok bilong stretim tu bel o tupela tingting bilong sampela manmeri i stap tu long Stia Tok pepa wantaim tingting o plen bilong ol wok bai Sosaiti laik wokim long yia 2000 na ol yia i kam bihain.

## Projek na wok plen bilong yia 2000 na ol yia i kam bihain em long:

- Lukluk na bringim benk i go klostu long ol sosaiti memba isnait long ol wanwan distrik;
- Lukluk long helpim ol memba long helpim ol yet long kamapim na strongim wok long Sosel na Ekonomik Developmen long ol asples;
- Lukluk long skulim ol memba long stretpela pasin long ronim bisnis, bihainim pasin na astingting

- bilong God hsuat i papa long olgeta hap graun na ol manmeri;
- Mekim moa wok long skulim ol memba long gutpela rot na stretpela pasin long kisim na bekim dinau;
- Lukluk long helpim ol Sosaiti memba long kamap gut ol lkonmik projek bilong ol long Agrikalsa Komes na Bisnis Developmen.

## Toksave long wok bilong mani long mun Januari i go Mas 2000

Mani i kam insait		Mani i go ausait	
Memba putim sia mani		Memba kism sia mani	
Memba bekim dinau	Olgeta	Memba kism dinau	Olgeta
mani kam hait		mani go ausait	
K384,540.00		K 79,572.00	
K116,576.00		K349,238.00	
K501,116.00		K428,810.00	

## Ol polisi bilong sevings na lons Sosaiti

Hia em haphap polisi bilong Sosaiti long helpim ol manmeri husat i laik kamap memba.	memba K 2.00	Kisim dinau long wanem as?	- Ol kos bilong baim ol ka na trak.
<b>Membasip</b>	• Mak bilong mani long opim nupela akaun K200.00	- Baim skul fi.	- Wokim kakaruk banis.
Membasip em i op long ol manmeri i stap long Morobe na ol manmeri bilong Morobe husat i stap long ol arapela provins.	<b>Toksave long Sevings</b>	- Baim kopra, kakao na kopi.	- Ol kain samting bilong wok didiman.
• Fi bilong kamap	• Memba bai kisim pasbuk.	- Kisim pis.	- Bekim ol dinau.
	• Pe didaksen long ol wokmanmeri.	- Ol samting bilong wokim haus slip.	- Baim meri na kos bilong marit.
		- Ol kos bilong planim ol daiman.	- Dokta na marasin samting.

# Sevings na lons sosaiti i kirap bek gen

SAPOS yu wanpela olgeta memba bilong Sevings na Lons Sosaiti na yu ting olsem sosaiti ya i no inap long go het gen na operet long givim gutpela sevis long yu na ol arapela olpela memba, sori tru, yupela i mas tingting gut gen na kam bek long kamap memba wanpela moa taim.

Nau yet wantaim politikel sapat na tu sapat bilong bikpela PNG Benk, Sevings na Lons Sosaiti i kirap bek wantaim moa strong na bai givim moa gutpela sevis long yu. Na sapos sosaiti insait long wanpela yia tasol i kamapim pinis moa long K1.013milien taim em i bin kirap bek long stat bilong las yia (1999), dispela i soim olsem Sevings na Lons Sosaiti bai i go het na kamap bikuela moa long karim aut ol wok bilong en long ol yia i kam bihain.

Nau yet bihain long sosaiti i bin stat long operet insait long wanpela yia tasol, na bikos long ol gutpela sevis em i givim long ol membas bilong en, planti lain i laik save long dispela na i wok long kamap na joinim lain na bai ol i pulim lain yet long kamap memba bilong sosaiti.

Dispela em sampela toktok Jenerel Menesa bilong Sevings na Lons Federesen, Luke Polongou i bin mekim long taim Sevings na Lons Sosaiti i bin holim wanpela Dairektas na Menesmen woksop long Bundun Konferens Senta insait long Morobe provins long mun i go pinis.

Mista Polongou i bin kam wantaim trening opisa bilong PNG Benk long Pot Mosbi. Tambua Kariko long sindaun wantaim ol Dairektas na Menesmen bilong Sevings na Lons Sosaiti insait long dispela woksop. Mista Polongou i tok lukluk long wok bilong Sevings na Lons Sosaiti nau em long givim sevis i go long trangu ol lain pipel long grasrut levul husat o i stap long viles na hauslain.

Em i tok planti taim taim trangu ol dispela grasrut lain, maski sapos ol i memba long ol bikpela komesol benk na aplai o askim long dinau mani, ol benk ya i save pasim ai na i no save givim helpim long ol. Na dispela em i wanpela samting we i save givim bikpela hevi tru ong ol dispela lain.

Mista Polongou i tok nau yet Sevings na Lons Sosaiti i kamapim pinis wanpela sistem em ol i kolim "Putim na Kisim."

Na dispela sistem bai i ken givim bikpela helpim tru long ol lain husat i kamap memba long sosaiti, maski sapos ol i grasrut lain man na meri na memba long Sevings na Lons Sosaiti, taim ol aplai na askim long kisim dinau mani, ol bai kisim tasol. Na Sevings na Lons Sosaiti bai i no inap pasim ai long ol.

Mista Polongou tok piksa na i tok "taim ol manmeri i kamap memba long Sevings na Lons Sosaiti na sapos ol i putim K200.00 i go insait long sevings akaun o pasbuk bilong ol na sapos ol i laik kisim K200.00 dinau mani, dua em i op i stap we ol i ken aplai na kisim isi tasol."

Em i tok ol memba bai i no inap kisim hat taim moa long wanem Sosaiti-bai givim dinau mani long ol, maski sapos ol i stap long siti, taun, viles o hauslain. Bikpela samting em sapos ol i kamap memba long sosaiti, sosaiti bai givim ful sapat na helpim bilong Papua Niugini.

Nau yet operesen i go het strong insait long bikpela senta olsem Lae siti (Morobe Sevings na Lons Sosaiti) na ol liklik distrik insait long insait long Morobe provins yet olsem Tewae/Siassi, Finsafen, Pindiu na Menyama. Mista Polongou i tok plen i stap pinis long sosaiti bai kamapim tu ol brens long ol provins olsem Is na Wes Nu Briten, Niu Ailan, Manus, Isten Hailans na Sauten Hailans.

## Benk bilong Papua Niugini

Benk bilong gavman bilong Papua Niugini (Benk of PNG) em i olsem glasman bilong olgeta benk na haus mani bilong kantri. Em i bin tok orait long Morobe Sevings na Lons Sosaiti long kamap olsem benk na haus mani bilong ol manmeri bilong Morobe provins na Lae siti benk ol PNG tu i wok long glasim (audit) ol buk na wok bilong Morobe Sevings na Lons Sosaiti na em bin helpim Sosaiti tu long taim wanpela ka bilong ol wokman long yusim na mekim wok bilong sosaiti.

## Toktok bilong stretim tu-bel

Menesmen bilong Morobe Sevings na Lons Sosaiti i stap nau long han bilong tupela eksprens opisa husat i bin wok wantaim Benk ol PNG na tu Federesen ov Sevings na Lons Sosaiti.

Mista Basanu em i Intarim Menesa na Mista Passingan em i Maketing na Pablik Rilesen Opisa Gavman i bin luksave long tupela na makim ol long lukautim wok bilong Sosaiti, em tupela projek aninit long Komes Divisen long gavman bilong Morobe provins.

Tupela opisa i no bin menesa long ol olpela sosaiti long Morobe husat nau i slip i dai pinis. Mista Basanu i bin traime long helpim Lae Industri Sevings na Lons Sosaiti long kamap gut gen, tasol sik bilong dinau nogut i bin kilim idai olgeta wok.

Wok bilong Basanu na Pasingan long Federesen ov Sevings na Lons Sosaiti i kam inap long 1984 na 1985. Long dispela taim tupela i save glasim wok bilong ol sosaiti insait long Papua Niugini. Wok bilong wanwan Sosaiti long PNG i bin i stap long menesmen bilong

wanwan sosaiti yet na bod ov dairektas bilong ol

Pundaun bilong ol olpela sosaiti long Morobe provins na PNG i bin i stap long han bilong menesmen bilong ol yet. Mista Basanu i bin askim Benk ol PNG long pasim olgeta sosaiti long Morobe provins long 1986, ol olpela Sevings na Lons Sosaiti long Morobe provins bai stat long yia 2001.

Dispela em bai namba tu hap bilong kirapim nupela sosaiti na stretim ol olpela sosaiti long provins. Namba wan hap bilong dispela projek em nau Morobe Sevings na Lons Sosaiti i sanap pinis na mekim wok. Olsem na ol memba bilong ol olpela sosaiti na husat i wok long i gat tu bel long kamap memba bilong Morobe Sevings na Lons Sosaiti i noken sutim nating tok long Mista Basanu na Mista Passingan long bagarapim wok long ol olpela sosaiti.

Ol dairekta yet na ol memba husat i no bin bekim dinau bagarapim wok bilong ol olpela Sevings na Lons Sosaiti.

## Pasin bilong sevings

As wok bilong Morobe Sevings na Lons Sosaiti em long kirapim tingting na helpim yu long sevim mani. Na sapos yu wantaim lenili bilong yu i bungim o painim sampela hevi, dispela mani yu sevim i ken helpim yu taim hevi i kamap. Ol kain samting olsem skul fi bilong pikinini na haus sik na ol marasin na wok bienis o haus slip em yu laik stretim na kamapim gut.

Dispela kampani yu wok long en inap helpim yu long katim pe long olgeta insait na salim stret long sosaiti.

Ol wokmanmeri bilong sosaiti bai i ken givim yu stia na gutpela tingting long sevim gut mani bilong yu. Wanem mani yu laik putim long sosaiti em stap long laik na tingting bilong yu yet. Gutpela pasin na tingting em long redim yu yet long kankain hevi we bai i ken kamap long yu long bihain taim.

Morobe Sevings na Lons Sosaiti em i no benk. Em i wok bung tasol bilong ol manmeri husat i memba.

## Dinau

Ol memba husat i soim gutpela pasin long redim em yet, em tasol inap long kisim dinau mani long sosaiti. Hamas dinau memba i laik kisim em i wankain tasol long sevings memba yet i bungim pinis long sosaiti. Yu noken tekewe sea na sevings bilong yu. Kisim tasol dinau na bekim long mak yu ting yu inap. Larim sevings bilong yu i wok long sosaiti na yu i ken kisim dividen o win (interes) mani.

Interes o liklik pe bilong bekim dinau em wan pesen long wanwan mun. Bilong wanwan yia em i 12 pesen (12 pesen).

Nau yet Memba Sevings na Lons Sosaiti i wok long givim planti helpim i go aut long ol pipel husat i wok long kamapim ol gutpela projek long ol komuniti insait ong Morobe provins. Ol helpim olsem lukautim na kamapim ol laipstok samting olsem kakaruk na pik, helpim i go long liklik tred stua na tu sapatim long kamapim wanpela skul projek.



# KANAGE



**K**anage em wanpela boi Kandrian. Wanpela taim em i kisim Airlink balus i kam pundaun long Hoskins apot. Orait em i kisim bas rout 3 na tekov i go long Kimbe. Trangu em pes taim tu ya long lukim taun olem na em i go insait long haus kaikai i stap. Na yu save plawa pis i swit na Kanage i les long wokim na hap i pundaun olem na baga i kaikai i go na Kanage i laik kisim dring long dring.

Na han bilong em i wokim na trapeia hap pis plawa i pundaun na baga i lukluk long ol meri save wok ong haus kaikai, nau isi isi tru han bilong baga i go daun long kisim hap pis e i pundaun na ol meri i wok long haus kaikai i singaut. "Papa just leave it alone." Na baga i tok ples na em tok olem. "Tavom wa na ngo." Na meri ya i tok Inglis na askim paps, "Can you repeating you question again.?" Na baga i serious nogut tru na em i kaikai tit bilong em na em i tokim meri ya long bruk Inglis na em i tok, "Hey! Hey! suse you know that I am coming with leaves of Malas. Na meri ya i tok. "Your face looks like Malas." Na Kanage i kisim hifilings na em i tok ol manmeri insait long haus kaikai olem. "Meri i mas dai pinis long mi ya," na em i smel na tekov.

**Paul Kumbo Kandrian**

Junia Kanage em bilong Simbu. Em i save go skul tasol em i no save long wanpela samtling. Kriemas holide i klostu pinis nau na paps Kanage i tokim Junia olem. "Yu mas brukim het bilong yu long dispela ya." Na Junia Kanage paul na tng bai em brukim het bilong em tupela hap. Wanpela moning em kirap na kisim naip na katim het bilong em na em dal olgeta. Meri bilong Kanage kirap na ronim Kanage long haus.

**Jeremi Nelson Hoskins**

Kanage i bilong hap long Ningerum long Klunga, Westen provins. Wanpela taim pikinini meri bilong Kanage i go long stoa na baim wanpela bik sista cake rol tin na katim i kam long haus.

Em opim na kaikai pinis wantaim ol arapela susa bilong em. Meri bilong Kanage i kam laik tok hey pinini hap bik sista i kam ya nogat em abrus na em tok. "Hey pikinini hap bik mada i kam." Hariap tru tasol paps Kanage bikmaus na i laik tok. "Olgea taim yu save begger long pikinini bilong mi ya," nogat em abrus na tok, "Hey yu flai olgeta taim yu save biak aut long pikinini meri bilong mi. Yu no save givim sans liklik long mi long biak aut long pikinini meri bilong mi." Taim ol meri pikinini bilong paps Kanage harim, ol i kilim skin stret long lap.

**Oscar Sendruy Klunga**

Kanage em man bilong Siporaval, Tinputz. Em i marit na i gat 12-pela pikinini olgeta. Long 80s na 70s em i wok olem man bilong karim toksave i go insait long bikbus taim kolonial gavman i go gen long ol ples i stap insait long bikbus. Yu save, taim kiap bilong bipo i tok wanem, yu noken bihet, maski ren o nait yu mas go yet.

Nogat bai ol i kilim yu o senisim pa bilong yu. Paps Kanage i tingim dispela na em i go. Yu save, paps Kanage i man bilong pret tu ya. Orait em i laitim wanpela bombom na i wokabut. Rot we em i wok long bhainim i go olem long matmat.

Em i wokabut i go, dispela taim tu tambu bilong em i wok long kam bhainim dipela rot. Taim Kanage i no kamap long matmat, tingting i kisim tambu bilong Kanage olem em i laik pilal long dispela na i wokaaut i kam, tasol tambu bilong em i no save olem dipela man i kam em tambu bilong em Kanage.

Orait tambu bilong Kanage i ron i go insait long matmat na stat long krai olem wanpela tewel. Kanage i harim na i pret liklik tasol yu save kiap i tokim em long karim dispela toksave i go na bin tokim em olem em mas noken kam bek nating olem na maski em i pret, em subim het na wanbel long i go yet.

Bihain taim tambu bilong Kanage i lukim olem man i wokabut i kam klostu long ples matmat, em i stat krai gen olem wanpela masalai. Kanage i tingim ples matmat na i stat long singsing isi long halitim pret. Tambu bilong Kanage i krai gen. Kanage nau i stat long krai bikpela maos long ples matmat stret. Tambu bilong Kanage i krai gen, oloman! Kanage i singling bikpela long karamapim pret. Bihaun lusim matmat liklik gen. Oloman! Papa Kanage ya pinisim olgeta spit bilong em stret i go kamap long ples na dai stret long ai bilong haus.

**Titus Varims Tinputz**

Kanage em bilong Aitape liklik ples bilong em we. Wanpela taim na baga save ya i save nogat tru na i go antap long Rabu long haus aik long kisim marasin. Poro ya i kisim taim nogut tru long aik na sindaun sor i stap. Na i no long taim wanpela nes meri i kam na askim em. Papa yu bilong we na poro ya i bekim olem mi bilong we. Na em i askim gen. Na poro ya bekim wantaim tasol. Nem trangu nes meri ya i paul olgeta na kirap tokim poro Kanage olem yu stupit lapun poro ya tanim na bekim em olem lapun mama. Trangu nes harim na sem piapia na lus isi tasol.

**Kanage Prendo Aitape**

Kanage em i wanpela qualifal ref bilong Pot Mosbi long wanpela taun ol i haiarim em long pilaim wanpela sempionsip long Aitape. So em bin wokim wok bilong em gut tru olem wanpela kap. Tasol i no long taim pilal pinis. Poro ya sanap na kaikai ret buai i stap kirap nogut. Wanpela meri i kirap na palitim poro na em i pundaun na liklik pekpek wara i sut i go antap long bodi bilong poro Kanage na poro bilong Kanage kirap na singaut oh poro

yu bagarapim mi na samting tru em ret buai i kapsait long trausis ya.

**Kanage Pren Aitape**

Kanage bilong Simbu insait long Sinasina distrik Kanage wanpela wokman bilong Sivil na Enjarin bilong Boila. Tasol trangu Kanage i no kisim anpela wok yet long Simbu. Long ya 1989 Kanage i painim wok i kam daun long Lae Kanage painim wok long Lae olem 3-pela mun olgeta. Kanage i nogat mani long wokim busjes. Na Kanage i wok long tingting planti. Wanpela taim ong bikmoning Kanage i slip kirap long Mabutaven na i wokabut i go isi isi olem snel i go daun long Voko Poin.

Long hap Kanage i sindaun long wanpela bikpela Karanas na i lukim solwara i silp sor i na Kanage i tingting planti nau bai mi i painim wok long hapwe bilong Kanage i kwik taim sut stret long wanpela smatpela meri swit Finsafen na taim swit Finsafen i lukim Kanage. Kanage kotim lewa bilong em yet. Kanage i wok long tingting planti long swit Finsafen na lusim voko poin.

Taim Kanage i lusim voko poin Kanage painim bubu bilong em i wok long 8 Mail Pukpuk fam. Kanage kirap nogut tru na holim pas wantaim bubu bilong em na krai wantaim nogat ai wara pundaun long ai bilong Kanage. Bubu i tokim Kanage olem kampani i nedim wanpela wokman long Boila. Bubu i tokim Kanage kwik taim yu mas kam antap long Mande moning. Kanage wok long 8 Mail Pukpuk fam olem 4-pela mun olgeta na kwik taim Kanage promotim em yet olem Boila Sivil Enjarin.

**A.G. Kurax Simbu**

Kanage em i bilong Aitape long liklik ples bilong em Malo Jack-Point long Aitape Ailan. Na em i wanpela supavaisa bilong kakao groa. Long wanpela taim kasen bilong Kanage i bin bagarapim sindaun bilong susa bilong Kanage. Orait Kanage i bin kotim kasen bilong em na tupela i bin kamap long gret 5 kot. Taim ol i sanap long kot ol i painim papa Kanage tasol paps ya i gat liklik komitmen na bikpela brata bilong Kanage i kamap long kisim ples bilong em long kot wantaim liklik brata bilong em olem pekpek bilong kakaruk. Na em i dree olem wanpela loya stret na i putim wanpela retpela nektal. Tasol trangu ya i hariap long i go long kot na i no save olem ret pela nektal ya em retpela penti bilong meri bilong em.

**Kanage Pren Aitape**

Yangpela pikinini meri bilong Kanage i laik go long danis tasol em i no save long danis olem na em askim Mis Kanage long laikim em long danis. Orait Mis i laikim em pinis na em olem papa Kanage long kisim em i go long danis. Long rot pikinini askim papa sapos mi gat laik long wanpela man, hau bai mi askim em long Inglis. Papa kirap na tokim em long tok "I lav yu." Long danis ples pikinini i danis wantaim wanpela waitman na taim tupela i senis em kirap na tokim waitman olem "I lav yu" na waitman i tok, Well I lav yu too, meri bekim an tok I lav yu three, man waitman i paul olgeta na i askim "What for" rfa pikinini meri i tok "Oh five six." Kanage

sem pipia na lusim danis.

**Fred Moro Aitape**

Kanage em bilong Nimbu kantri long Aitape. Em i save dresap olem wanpela wokman na i save raun long Aitape taun. Samting tru em wanpela get 3 dropout. Wanpela moning Kanage i stap insait long rum na wok long rausim maugras bilong em na redi long go ong taun. I no long taim na ren i pundaun. Man Kanage em belhat nogut tru, long wanem em i laik spin liklik long taun. Em stap yet long rum na wanpela dyna i spit i kam na kilim wanpela pk na brata bilong Kanage i kirap na bikman long draiva, i no ong taim papa ya surik isi tasol kamdaun long haus na tok olem, alyo draiva em i orait taim bilong ren na ka i lensaid na kras to put the pik. Samting tru em i laik tok olem ka i slaid na painim pik tasol yu save pasin bilong ol lapun ya maus i abrus liklik.

**Kanage Prendo Aitape**

Kanage bilong Simbu. Kanage em wanpela Sief Sivil Enjarin bilong Boila. Kanage wok insait long Pukpuk Fam olem 5-pela ya olgeta. Taim bilong wok insait Mande tu Fraide Kanage save visitim femili olgeta 30 minit. Kanage save wari tumas long pikinini boi bilong em, olem na sampela taim Kanage save kreatim fani na tok pilal wantaim femili. Kanage save em yet i Sief Sivil Enjarin bilong Boila na i no save wari tumas long wok bilong em. Bikos em ting olem em yet i bos. Wanpela taim long potnait Fraide. Kanage i dresap na em werim waitpela buten siot wantaim longpela balito trausis. Bihaun long dispela Kanage i karim pikinini boi bilong em long nek bilong em. Pikinini boi i no werim wanpela lapiap long pasim liklik as peks bilong em. Kanage i laik mikim wantok i stap long Kundiawa so kwik taim Kanage wantaim pikinini boi i stap long nek na tupela i go long opie. Long opie Kanage i miting wana tok na wantok i holim pon tupela Kanage i tok go kam. Kanage i no pinisim tok yet na kwik taim pikinini stopim yelopela pekpek wara antap long waitpela siot na bodi bilong Kanage i wet nogut tru. Kwik taim Kanage i tok nogut na dropim pikinini i go daun long pilo. Wantok long Kundiawa ting olem Kanage i tok nogutim em. Olem na em tu dropim pon. Samting waitman i lukim Kanage i tok nogut long pon na tu yelopela pekpek wara pundaun long pilo. Dispela taim Kanage i luk pipia olgeta.

**Ambane Glige Kurax Simbu**

Kanage em supavaisa long wanpela kokonas plentesen long Wewak. Wanpela bikbos i tokim Kanage long em wantaim ol boi i ken karim ol kokonas i go salim long Wewak taun. Taim Kanage na ol boi i go salim kokonas pinis, ol i kisim mani na dring spak long Wewak na olgeta mani i pinis. Taim ol i go kamap bek long plentesen, bos i askim, "where is the money?". Na Kanage save olem ol i rong pinis olem na em i karamapim toktok na tokim bos, "I the school or you the school. You the home liver, I make you the money so get back to your dead father."

**Ezekiel Hecko Hagen**

Kanage i laik go long disko olem na em bilas nais tru na putim kain kain smel marasin na pefium long bodi bilong em. Em yusim Brut, baby oil, pauda, seving krim na kain kain smel marasin long olgeta hap bilong bodi na kolos bilong em. Em mekim olem i stap na poro bilong em i sindaun long sait na lukim i stap na isi tasol poro i tokim Kanage, "plis mi laik tokim yu olem, sapos yu laik lukim tumoro, noken sanap klostu long paia."

Em i min olem kain kain smel marasin long bodi bilong Kanage inap kisim paia bikos olgeta marasin i bung na kik bilong ol i kamap olem petrol. Na smel bilong ol i ron olem ges.

**Masta Wal Mosbi**

Lapun Kanage i go long haus bilong tambu long apinun na ol i stori istap. Pikinini meri i boilim ti na em skelim long Kanage tupela tambu i dring. Pikinini meri i save long amas spun suga em tambu isave dring tasol em i no kila long amas spun suga bilong lapun Kanage. Olem na em i askim, "paps, amas spun suga yu laikim long ti?" Na lapun Kanage i bekim, "pikinini, prais bilong suga i go antap olem na namba bilong spun suga tu i go antap." Pikinini meri i harim na lap i kilim em nogut tru.

**Masta Wal Mosbi**

Mun bilong ol dok na ol dok i no pilal pilal long bung long rot. Ol sanap raun na mekim planti nois na lapun Kanage i les tru long harim nois bilong ol dok. Olem na em i kam sanap ausait long veranda bilong haus na lukim ya, ol dok i no pilal pilal. Planti dok tru. Kanage kisim wanpela tingting nau na em i go kisim ol bun bilong kakaruk ol i kaikai long haus na pasim long rop na pulim long rot. Ol dok i lukim tasol ol i no bisi long kaikai na ol i sanap yet. Kanage bel i hat na em i go painim tupela tin motin na em kukim long sait bilong rot. Taim tin motin i laik bruk na pairap, ol dok i bruk nabaut nabaut na ron nabaut long haus wanwan. Sampela dok i pulim trella bilong ol na i go pundaun nabaut long baret. Kanage isi tasol em lap long em yet na tok, "yupela gat moa ah, neks taim go holim miting bilong yupela long narapela hap". Lapun mama Kanage lukim na tokim paps Kanage, "lapun pinis tasol jeles i no pinis yet long yu". Kanage belhat na tokim mams Kanage, "wanem, yu laik lukim na kisim wanem kain skul, taim yu em pinis bika yet. Mi tasol em bateri i no kol yet". Ol lain long neks haus i harim na lap indai tru long stall na toktok bilong lapun Kanage.

**Kanage pren Mosbi**

Kanage bilong Sepik na em wantaim poro bilong em i karim ol kaving na i go salim long haus bilong ol waitman long Wewak. Tupela kamap long haus bilong wanpela waitman na nok long dua. Taim waitman i kam, em i luksave olem tupela man ya i laik salim kaving olem na em i tok Inglis long tupela olem, "hang on a minute, I'll be back soon." Poro bilong Kanage em skul long gret 2 na save liklik long Inglis olem na em i tokim Kanage olem, "waitman i tok

• I go moa long pes 26

# KANAGE



kaskas stret na kirapim tokim Kanage olsem. "Yu wantaim meri bilong yu save karim pikinini ol Sepik wara i save tait." Kanage harim na em belhat na bikmaus long hetmasta olsem, "Yu maski, yu olsem wel saksak long bus i no save kamapim pikinini." Olgeta papamama i harim na lap indai olgeta.

Joel gamba

### Ambunti

Kanage wantaim misis bilong em i laik harim nius olsem na Kanage i go kisim redio bilong poro bilong em i kam putim long haus. Orait long 8 kilok nait nius i kamap na redio anaunsa i ridim nius igo pinis na em i mekim las toktok olsem, "nius i kam long Redio Kalang FM nius". Taim misis bilong Kanage harim olsem em i askim Kanage, "papa, redio palang em wanem samting?". Kanage harim na tokim meri bilong em, "sapos papa bilong yu i bin salim yu i go skul liklik em bai yu save. Tasol sori tru, stap isi na harim tasol o mi tokim yu na yu bihainim. I no redio palang, em Redio Kalang." Misis Kanage belhat nogut tru na tekov i go long rum na slip.

Jacob Joe Kimbe

Kanage i bin pren wantaim wanpela yangpela meri bilong ples yet na wanpela taim tupela i strong na go stap wantaim long haus. Mama bilong yangpela meri ya i no laikim tru pikinini meri bilong em i maritim Kanage

olsem na em i kros nogut tru na rausim Kanage. Tasol mama bilong Kanage i hariap tasol go ripot long viles kot na ol igo long kot. Viles Kot i askim ol long toktok long hevi bilong ol na Kanage i harim igo na em kalap tasol holim pas meri bilong em na krai nogut tru na tok, "sapos yupela i no laikim mi maritim Agnes bai mi kilim mi yet i dai". Olgeta lain i harim na pret na viles kot mejistret i kirap na pasim tok olsem, "mi pret long Kanage bai kilim em yet na i dai na bai bikipela trabel bai kisim yupela olgeta. Olsem na maski, larim tupela marit tasol. Toktok i pinis na olgeta i go long haus na Kanage wantaim meri bilong em holim han na amamas tru na go long haus.

Nelson Peter Maprik

Kanage wantaim meri bilong em i go painim pis long nambis na nek bilong Kanage i drai olsem na em i laik painim kokonas long dring. Em i lukim wanpela kokonas i stap na em i tokim misis long wet na em i go antap. Taim Kanage i go antap long kokonas em i kisim kulau pinis na kam daun. Tasol abrus lek i wel na em i welim olgeta bodi bilong em long kokonas na kam daun. Sori bros na bel bilong Kanage i tekewe na ret nogut tru na misis Kanage i lap nogut tru long man bilong em. Kanage belhat na tokim meri bilong em, "i no bros na bel tasol i bagarap, hetkota tu i smes nabaut ya." Sore, misis Kanage tanim na stat krai gen long Kanage.

Ronsey Meiya Vanimo

Kanage wok long Ela Motors long Kimbe taun na wanpela potnait meri bilong em long ples i kam long lukim em. Kanage kisim pe na tokim meri bilong em long wetim ausait long ples wok na em bai go long stua pastaim.

Taim Kanage go long stua, em i bungim gel pren bilong em long Kimbe taun na tupela gris na hait long beksait bilong stua na ronawe. Misis Kanage wet wet i go nogat na em go bek long ples. Long moning taim Kanage i kamap long ples na tupela mekim bikipela kros na pait i bruk. Meri bilong Kanage belhat na holim hetkota bilong Kanage na tokim em, "nau bai mi katim masin gan bilong yu".

Na Kanage tok, em orait tasol. Katim wanpela bom na tromoi na larim wanpela bom wantaim masin gan i stap bilong narapela taim. Nogut woa bai kamap gen na yumi nogat samting bilong pait." Ol manmeri i harim na lap i dai nogut tru long toktok bilong Kanage.

Paul Tele Kimbe

Kanage i save skul tasol tisa i rausim em bikos em i man bilong bikhet na ronawe planti taim long skul.

Olsem na Kanage i raus long skul na go bek long ples. Tasol gel pren bilong em i stap long skul olsem na em i save go bek olgeta taim long lukim em.

Wanpela taim em i no go lukim gelpren bilong em wanpela mun olsem na meri ya i straik na tok em i no laik lukim Kanage gen. Kanage i harim dispela nius na lewa bilong em i bruk nogut tru.

Em slip tanim tanim long bet i go na em tingim wanpela plen bai em i mekim na bai gelpren i ken laikim em gen. Olsem na em i slip hariap tru na bikmoning yet em i go kamap long skul na salim tok long Maria i kam lukim em. Taim Maria i kam em straik wantaim na i no toktok gut.

Tasol Kanage kwiktaim em holim han bilong Maria na tokim em, "mi kaikai lewa bilong yu. Neks wik bai mi go joinim Difens fos ya. Ol i rikrut na kisim mi ya." Taim Mara harim em amamas tru na holim pas Kanage na kis long em. Kanage kisim bikipela filings na amamas tru bikos em pilaim trik tasol na Maria i mekim samting tru.

Nelson Peter Ambunti

Kanage marit long Rabaul na wanpela taim em wantaim tambu bilong em i ronim spit bot na i go long bikiples long disko. Tupela dring wantaim na danis i go inap tupela i tait olgeta na i laik go bek long ples. Tupela kalap long spit bot na tekov. Kanage i amamas tru na wok long tokim tambu bilong em, "tambu, pamim, pamim". Tambu i harim na em i no isi long spit bot. Spit bot i flai olsem roket stret na kalap kalap antap long ol weivs.

Tupela bikmaus na singsing wantaim na amamas nogut tru na spit bot em flai nogut tru. Tasol tupela i no luksave olsem tupela i kamap long ples na spit bot i givim i go antap long wasan na Kanage wantaim tambu i flai olsem pipia i go pundaun long lain kokonas.

Dominic K. Kainantu



## Memba bilong Okapa Open Castan Maibawa dai pinis o?

**Dia Edita,**  
Mi wanpela mangi Okapa tasol mi stap long Rabaul na mi save i go i kam long ples Okapa na mi save lukim, rot bilong Henganofi na Lufa em ol putim Kolda pinis. Dispela memba man bilong Okapa Casten em dai pinis na stap long 6 pit o olsem wanem? Nem bilong Hon MP Viviso Seravo na Mathias Karani i save pairap na tu mi save lukim tupela long niuspepa, na han mak bilong tupela em planti tru, tasol Casten em hait yet na stap. Dispela yia 2002 ileksen mi les long wanpela man Fore tokples bai kempein kam insait long Keyagana.

Yupela ol Fore inap pinis long Gavman na nogat han mak. Yupela save apim yupela yet yupela ol saveman, save bilong yupela em nating. Yupela i no inap putim long eksen. Yupela ol liklik rat tu i save tok mipela ol save lain. Save bilong yupela em samting nating. Lukluk long ol nid bilong ol pipel. Yupela ol lain long Okapa mas tingting gut na votim man husat bai kisim sevis kam long Okapa. Yumi stil stap olsem ol tumbuna bilong yumi. So nau tingting na vot. Mi les long ka bai lusim yumi long kuru mauten na mi les long yumi kam kisim ka long Kuru.

Plis no ken mekim Kuru Mauten olsem bas stop bilong yumi. Mi les long karim kofi bag kam long Mauten Kuru. Yupela save Casten em no bisi long yu husat. Luk olsem long ileksen 2002 em no ken sanap. Em mas risain em gutpela na ol nupela man tasol bai resis. Las minit komiti sapota bilong Casten baim yu long moni, brukim han bilong em. Em tasol belhevi bilong mi. Sapos yu husat laik sapotim o egensim, rait tasol i kam long Wantok niuspepa.

**Eron Belden Nowani, Kokopo, ENBP.**

## Amamas i go long Raihu helt woka

**Dia Edita,**  
PLIS givim mi wanpela hap spes olsem bai mi ken sapotim na tu stretim tingting bilong brata bilong yumi i raitim long Wantok niuspepa long Me 15, 2000. Dokta, nes opisa na nes aids na ol arapela helt woka ol i holim na lukautim laip bilong wanwan bilong yumi. Tenkyu tru long yu brata Ben Kavani long luksave long ol helt woka. Ol i holim baibel, long taim ol i kisim wok long mekim insait long pablik sevis, dispela promis ol i kolim oath. Ol i go het, tasol maski les, maski pablik holide. Mi amamas tru long lukim ol nes na dokta bikos ol i save wok wantaim presa.

Katolik Daioses i holim strong tingting bilong lukautim dispela haus sik. Raihu helt senta. Mi ting, em taim, dispela helt senta i mas kamap haus sik bikos long dispela, nesanel gavman bai i luksave na helpim moa moa yet. Ben Kavani ol tok bilong yu i gutpela tasol Raihu em i helt senta yet olsem na em i samting bilong provin-sel assembli na Katolik Helt Atoriti long lukluk na skelim. Memba bilong yu na ol Nesanel Gavman i salim mani pinis long provinsel helt opis long Vanimo. Sapos ol i paulim mani, plis toktok wantaim ol long provin-sel level.

**Andrew Ungan Madang**

## Stretim Yonki!

**Dia Edita**  
Mi wanpela grasruts pikinini bilong Yonki yet na em i pestaim bilong mi long rait long Wantok niuspepa. Wari bilong mi olsem. Mi wanpela pikinini long Yonki mi save lukim long niuspepa o harim long redio na ol man meri long PNG stret i save tok Yonki em wanpela rait ples long PNG na tu em i get we bilong Hailens. Tasol mi save lukluk long Yonki. Yonki em i olsem wanpela setelmen na tu bus i karamapim olgeta hap kona na das i pulap. Na em i no wanpela rait ples long PNG stret. Taim mi harim olsem Yonki em rait ples o get wei bilong Hailens, mi save sem pipia stret. Na Elcom save winim bikipela profit moni long Yonki puaa long wanwan yia. Tasol Elcom i no save lukluk gut long ol pipel bilong Yonki eria na stretim ol samting na mekim ol i amamas. Na senis mas kamap long Yonki pipel. Elcom i mas senisim ples liklik bikos Yonki em i wanpela senta long PNG na em i get wei bilong Hailens. Nogut yia 2000 bai pundaun nating na ples i luk olsem tasol i stap. Em tasol na husat i laik egensim o husat i laik sapotim bai mi wet tasol long kisim bekim bilong yu long Wantok niuspepa.

**Jones T Yonki**

Sapos yu laik salim ol pas bilong yu i kam long dispela niuspepa.  
Salim i kam long dispela adres:  
**THE EDITOR  
WANTOK NEWSPAPER  
PO BOX 1982, BOROKO, NCD.**

## Sosaiti o wanwan yet kamapim sik AIDS?

**Dia Edita,**  
Mi laik autim tingting bilong mi tu long toktok i bin kamap long niuspepa olsem yumi em Victim bilong Sosaiti, i no sik AIDS. Dispela tok em i kamap long wanpela semina long Mosbi. Wanpela meri Tahiti tu i stap na em i tok strong long dispela tok Victims bilong AIDS. Mi pilim sori long ol manmeri husat i gat hevi long dispela birua sik. Mi ting yumi mas glasim ol pasin na eksen bilong yumi pastaim long yumi poinim finga. Sosaiti em i nogat lek, han, ai, maus o bodi. Nogat. Sosaiti em i stap laip taim em i gat man i stap. Man em i lek, han, ai o bodi bilong sosaiti. Man bagarap, sosaiti tu i bagarap. Wanwan mameri em i

kamapim dispela. Mi sapotim toktok bilong Maira, dispela meri Tahiti. Tasol husat i kamapim AIDS Victim?. Sosaiti o husat tru i kamapim dispela hevi nau i kamap?. Inap sampela dokta o ol save-manmeri i ken tok klia moa long mi. Nogut mi tu i wanpela bilong ol Victim bilong sik AIDS. Long wanem kain rot bai yumi ken helpim narapela long helpim ol yet?. Em tasol liklik toktok bilong mi na husat i laik sapot o egensim em welkam long rait tasol bai mi tu i ken lukim tingting bilong yu long dispela bikipela toktok bilong sik AIDS.

**John Andy Singer Wewak**

## Hon Stahl Musah kisim salens

**Dia Edita,**  
Mi wanpela pikinini Raikos. Mi i stap long Dregerhaten hai skul. Mi laik autim wari bilong mi i go long Memba bilong Raikos open Stahl Musa. Em save go raun liklik long ples bilong en insait long Tapen na luksave long wari bilong ol pipel o nogat? Trangu ol lapun manmeri ol kamap olsem camel bipo na nau tu i stap, na karim ol kago i go daun long nambis go antap long bus olsem i stap. Sampela dai na sampela karim sem hevi yet. Ating memba ai bilong em pas o slip? Plis opim ai na lukluk go long we insait long yia 2000. Nupela yia na yusim gut. Mi bin bungim hevi insait long Krismas holide na mi gat bikipela wari long ol papama-ma. Mipela sampela skul sumatin painim hat tru long go bek hariap long skul. Skul stat pinis na mipela i stap 2, 3 wik bihain mipela go las long skul. Na tu ol papamama bagarapim kumu bilong ol long go salim long Madang. Sapos yu memba tru bilong mipela. Tingim manmeri skul pikinini na rot. Tingim 2002 bai yu skelim long wok bilong yu wantaim. Em tasol yu husat i laik sapotim o egensim. Yu rait tasol long Wantok niuspepa. Mi amamas tasol long lukim.

**Irope Levie Finschhafen.**

## Wari bilong Yus pipel

**Dia Edita,**  
Mi wanpela lida bilong Yupno, i no hamamas nau long tupela lida bilong mipela Ginson Soanu wantaim Miepemu long i no bin toktok na painim hap graun na kirapim mipela. Nau mipela i luksave olsem, Teptep sap districk em bilong Saidor distrik na bai mipela i go pas long Teptep o Kabum. Kabum em i longwe tumas. Olsem na mi askim tupela lida long kirap nau na mekim samting. Tupela i noken putim skin long Teptep stesin. Tenkyu mi kisim maus bilong maus pas pipel bilong Yus na raitim dispela pas.

**B. Boworice Yupno**

## Eddy Saweni kisim sapot



• Eddy Saweni.

**Dia Edita,**  
PLIS givim m i liklik spes long Wantok niuspepa, olsem mi ken bekim pas bilong Towa Ninge, bilong em long Epril 6th 2000. Mista Towa Ninge. Yu harim brata, planti yia i go pinis, yumi wok long votim na kamapim nupela memba bihain long 5-pela yia. Yumi ting yumi smat tru long mekim olsem, tasol i luk olsem yumi stupit. Yumi i no givim sans long em inap 5-pela moa o 10 yia moa bilong dispela memba bilong yumi i ken soim save bilong em. Sapos dispela memba i no inap bihain long 10-pela yia, Ok. Yumi ken tokim em, sori yu i no inap. Eddy Saweni em i strongpela man tru. Long sot-pela taim em i kamapim ol plen bilong em, so that long yia 2002 na i go bai plen bilong em i wok na karim kaikai. Wotpo yu laik senisim kain man olsem, na maski long semim narapela brata long praivet laip bilong em. Olsem man bilong maritim tupela meri. Yu wanem, yu i nogat sin tru, a? Yu laik bekim pas bilong mi, Towa Ninge? God bles yu.

**A. Frank Ulan Mok Madang**

## Gavman na pipel

**Dia Edita,**  
PLIS inap yu givim mi hap spes long pas i kam long ol pipel long putimaut dispela toktok bilong mi. Em i olsem, planti taim mi i save harim ol pipel na tu ol lida bilong gavman na ol wokmanmeri bilong ol gavman dipatmen na ol kampani. Ol i save tok olsem, oh gavman i bagarap, gavman i korap, gavman i no mekim ol gutpela ol tingting bilong en na i go olsem. Yumi i mas save olsem gavman tude kantri i gat long en we ol pipel i save i go pas tru long kamap tru long votim ol memba, em ol i save kolim olsem demokratik gavman. Sapos yumi i lukluk gut orait bai yumi i lukim tru klia dispela samting yumi i save toktok long en na kolim tu olsem gavman. Gavman em i no man o meri olsem yu na mi nogat, ol dispela ol memba em ol tasol i dispela ol lida we i go long ronim dispela sistem bilong dispela kain gavman. Gavman i min olsem lukautim na ronim wantaim kain lo we i gutpela long laip bilong ol pipel na ol samting bilong ol na kantri o mak dispela gavman i lukautim. Nau yumi i gat em, pawa na pasin bilong fridom bilong laip bilong ol pipel

long lukautim o Inglis. So olsem mi i raitim pinis em gavman em i prinsepel o lo tasol ol lida husat i save i go na kisim ol wok bilong dispela gavman i no save bihainim stret na dispela i save mekim yumi i tok olsem gavman i bagarap. Tasol nau long stretim gut, yumi i ken tok olsem lida i bagarapim gavman na gavman i no bagarapim ol pipel na lida, nogat. So long dispela yumi i ken lukim tru wok na kala bilong ol lida bilong yumi na gavman sistem. So long kamapim ol gutpela ol namba wan prinsipel em namba wan samting tru yu mas i gat long en em save bilong kamapim ol dispela ol lo na tu ritim na skelim na stretim gut, sapos em i no bihainim stret dispela kain sistem. I nogat wanpela gutpela samting i save kamap nating, nogat long save tasol i save kamap ol dispela ol samting. Man husat i nogat save em i olsem aipas man tasol, na yu tingim sapos aipas i wokabout i go long ples nogut em i ken abrusim o nogat? Baibel long Rom 13, i tok gavman em God i putim i stap long bosim laip na sindaun bilong ol pipel. Planti taim ol savemanmeri tru i save

pret long i no laik toktok long samting we ol i lukim i nogat save long en na inap tru long bagarapim gavman o samting. So dispela lida i mas i gat lidasip kwali-ti na strong long yusim dispela save God i givim em long toktok, stretim samting na wokim samting i go gut long save bilong en. Planti taim ol pipel i save pret long votim gen gavman bikos long ol kain tok-tok we i no i save stret na i bagarapim rait bilong laip bilong ol long harim gut-pela toktok na votim gutpela lida. We dispela lida i gat save na strong na lidasip pasin inap long ronim dispela gavman we prinsipel bilong laip bilong ol pipel i stap long en. Gavman tu em i laip bilong ol pipel long sait bilong ol developmen na sapos ol lida i nogat het na i bamim wantaim pasin nogut bai dispela pasin nogut tasol i mekim save stret long ol pipel. Yumi i mas putim wanpela tingting tasol na beten strong long God wantaim bilip long Jisas Kraus long helpim yumi. God i ken helpim yumi long wisdom, strong na pawa bilong en.

**Philip Pais Vanimo**



11-pela Klen i tok

# NOGAT

## NOGAT

long sainim FMA wantaim Forest Atoriti

## NOGAT

long sainim agrimen bilong kisim diwai aninit  
long *TIMBA ATORITI (TA)*

## YES

long ol yet i go pas long Graun na Laip bilong ol.

## YES

long ol pikinini bilong ol long nau na bihain

### *Ol dispela Klen em:*

- Alkapke Klen
- Kaipsakang Klen
- Wanasakang Klen
- Katam Klen
- Mudd Klen
- Kmevung Klen
- Babugu Klen
- Kambasakang Klen
- Iga Klen
- Kai Klen
- Igumana Klen

Sainim ligel Agrimen namel long ol yet long pinis long dispela disisen.  
Jun 1, 2000 long wanpela pablik miting ol i  
bin holim long Wanang ples long Sogeram Ol dispela klen i wok long kamapim namba  
eria bilong Madang provins. wan Konsevesen Eria insait long PNG aninit  
long Konsevesen Eria Ekt (lo).

Ol dispela Klen i wanbellong *NOKEN* sainim Mipela tok amamas long ol long dispela  
FMA wantaim Forest Atoriti na wanbel long disisen  
*NOKEN* go insait long wanem kain agrimen  
bilong kisim diwai bilong ol aninit long  
Timba Atoriti (TA).

Ol rait atoriti long Lokol Level Gavman i go  
long Forest Atoriti i bin kisim dispela toksave

*Yat*  
YAT PAOL  
Siaman







# WANTOK SPOT



## Lig sempion em i sempion tim: Posman

**HENRY MORABANG i raitim**

PAPUA Niugini soka i mas senis sapos em i laik stap wankain olsem ol arapela soka kantri long wol.

Olpela nesanel kosa Kisakiu Posman i autim dispela toktok long tok klia long mining bilong lig sempionsip na main primia.

Posman i tokaut olsem long arapela soka kantri long wol, ol i save long lig sempion. Dispela em tim i stap namba wan bihain long soka sisen i pinis. Maina primia em i no toktok bilong soka, nogat em toktok bilong ragbi lig, yunion na basketbal.

PNG i wok long toktok long maina primia bikos soka bilong PNG i wok long bihainim kain sistem i wok long kamap long Australia. Tasol samting tru, Australia tu i wok long brukim bus.

Posman i tok ol lig sempion tasol bai resis long nesanel klab sempionsip. Sempionsip bilong meri bai kamap long Julai 21-24 long Lae, na sempionsip bilong man bai kamap

long Independens wiken. PNGFA i no makim yet wanpela ples long holim dispela sempionsip.

Tasol nau yet planti soka edministreta i wok long bihainim sistem bilong pilai long gren fainel long painim sempion tim. Arapela kantri olsem Ingran, sempion tim em wanpela tim i stap namba wan ples bihain long sisen propa i pinis.

Posman husat em i teknikel dairekta bilong PNGFA i bilip olsem lig sempionsip bai helpim tru stendad bilong soka. Tingting bilong planti soka edministreta i no senis na dispela tasol i wok long daurim tru wok soka.

Posman i ting sapos PNGFA i strongim toktok bilong FIFA long olgeta memba kantri i mas bihainim lig sempionsip sistem, ating soka bilong PNG bai kamap gut. Lig sempionsip sistem i namba wan. Dispela sistem i wok gut long arapela kantri na watpo i no long PNG.

Em i toktok strong tru long skelim ol bikpela tonamen olsem Wol Klab sempionsip

we i bin kamap long Brazil. Na i no gat sempion (primia sempionsip)

Insait long Euro 2000, ol sempion klab insait long UEFA i wok long brukim bun na dispela i soim tru olsem ol i bihain lo bilong FIFA.

Manchester United i pinis namba wan long Ingran long kamap lig sempion na em i resis nau long Euro 2000 klab sempionsip. I wankain tu long Valenzia long Spain na Lazio bilong Itali.

Posman i tok soka i no inap senis inap ol soka edministreta i senisim tingting long kamapim nupela sistem. Em i laik tok klia olsem lig sempion em i no nupela samting. Dispela em olpela sistem tasol PNGFA i mekim bikpela asua tru long kamapim gren-fainel sistem.

PMSA i bin traim long kamapim dispela sistem taim Posman i presiden tasol em i no kisim gutpela sapot long ol eksekutiv na tu ol memba klia bikos tingting i stap long gren fainel yet.

## Tripela tim bai sambai long SP Kap

TRIPLEA tim Rabaul Guria, Waghi Tumbe na Mendi Muruks bai sambai long dispela wiken taim SP Kap inta siti statim namba foa raun bilong em long dispela wiken.

Dispela raun em spesel tu bikos YumiFM bai sponsorim tripela raun taim redio stesin ya bai givim K100 prais mani na tu sampela samting olsem bag.

Dispela tingting bilong wokim dispela spesel promosen em long apim nem bilong PNG pilaia we ol yangpela mangi i ken bihainim olsem biknem pilaia ol i laikim.

Promosen ya em bilong helpim ol pilaia bilong PNG long traim mekim ragbi lig olsem wanpela wokmani.

Stat long dispela wiken long Goroka, Wabag na Lae, YumiFM bai givim prais long ol. Man i save ritim ragbi lig kompetisen long redim bilong YumiFM lamutu


Kere bai givim namba wan prais long Goroka.

Orait YumiFM tu bai makim sampela mausman long Wabag na tu long Lae.

Jenerel menesa bilong PNGFM Peter Aitsi i tok dispela promosen em long givim sans bilong ol PNG pilaia long kamap olsem biknem pilaia we ol yangpela i ken lukluk long ol long bihain taim.

Kevin Murphy, jenerel menesa bilong PNGRFL i tok olsem dispela promosen i kamap long rait taim we ol pilaia i wok long resis long traim winim spes long go long Wol Kap long Yurop.

Na tu em i laik tok klia watpo tripela tim i bai em long bikos nau ol i stap long tripela pul. Ol tim insait long pul wan em Rabaul Guria, Pot Mosbi Vipers na Lae Bombers, na long pul tu - Goroka Lahanis, Simbu Warriors na Waghi Tumbe na long pul tri em Mendi Muruks, Mt Hagen Eagles na Enga Mioks.



• Tupela pilaia bilong Goroka Lahanis i givim strongpela takol long wanpela fowet bilong Pot Mosbi Vipers. Tupela tim bin dro 20-20.

## Kas bilong Ainman

DISPELA kain takol ya (het i go pas long graun) i no helpim tru ol yangpela long pilai ragbi lig. Dispela takol i kamap long insait long wanpela semi profesenel ragbi lig resis, SP Kap inta siti.

I no longtaim planti toktok i kamap long redio, TV na niuspepa olsem ol edministreta i

painim rot long traim pulim bek ol yangpela na famili long go lukim pilai.

Plantil ol yangpela mangi laik pilai ragbi tasol ol i no save o klia gut sapos ragbi lig i ken bringim gutpela sindaun long bihain taim. Dispela tupela ainman bilong Goroka Lahanis i mas sem long kain

takol. Rot bilong takol i no long mekim spia takol nogat, mekim gutpela takol tasol.

Bikpela singaut nau i go long PNGRFL na tu ol kosa long mekim gutpela skul long pasin bilong takol. Kain piksa ya i no inap tru helpim spot long go fowat.

# Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.